





A.
1419


Ex Bibliotheca
majori Coll. Rom.
Societ. Jesu

74.5.52.

74
80

19
19
55





BIBLIOTECA NAZ.
ROMA
VITTORIO EMANUELE.



Georg. Abraham. Mercklinus
De
Ortu et Occasu
Transfusionis Sanguinis.

Cornelis. Nicolin. Sculpsit.

TRACTATIO MED. CURIOSA,
De
Ortu & Occasu
TRANSFUSIONIS
SANGUINIS,

Quâ
hæc, quæ fit è bruto in
brutum, à foro Medico penitus eli-
minatur; illa, quæ è bruto in hominem
peragitur, refutatur; & ista, quæ ex homine
in hominem exercetur, ad experientiæ
examen relegatur:

Authore

GEORG. ABRAHAM. MERCKLINO,
Jun. Doct. Medic. Norimbergensi Ord. &
in S. R. J. Academiâ Natur, Curios.
dict. Chirone.



NORIMBERGÆ,

Sumptibus JOHANNIS ZIEGERI,
Bibliopolæ.

Typis CHRISTOPHORI GERHARDI.





—❦— —❦— —❦—
VIRIS

*Nobilissimis, Maxime Strenuis,
Magnificis, & Prudentissimis,*

DOMINIS,

DN. GABRIELI NÜTZELIO,

ab & in Sündersbühl,

Ecclesiarum Ephoro,

DN. GEORG. FRIDERICO BEHAIM,

UTRIQUE VII. VIRO,

DN. WILHELMO IMHOFF,

DN. GEORG. PAULO PAUM-

GARTNER,

ab Holenstein, & Lohnerstadt, in Grünsberg,

Scholarchis;

DN. CHRISTOPHORO FÜRER,

ab Heimendorff, in Wolckersdorff,

DN. CAROLO WELSER,

à Neunhoff,

UTRIQUE Collegii Med. & Pharmac.

PRÆSIDI;

Singulis Reipubl. Norimbergensis

Senatoribus Gravisimis,

Dominis & Patronis Opt. Maximis

S. F. Q. P.

(2

Nescio



Nescio, quo arcano Naturæ consilio fiat, ut pleriq; mortaliū quævis nova, inauditaq; quævis impensius admirentur, & altius suspiciant; idq; sæpe sæpius, non quòd ita mereantur; sed tantum quia nova ac inaudita sunt. Vulgò constat, vix aliâ ullâ ratione hominum animos facilius capi, & quasi inescari, quàm insolentium rerum illecebris. Inò omnes penè sensus novitate delectantur, & haud raro ita occæcantur, ut præ illâ rectum judiciū ferre nesciant, extollantq; cominendatione licet indignum, tantum quia novum.

Oculus nunquam lautius se pascit, quàm jucundo antea non visarum rerum spectaculo. Scilicet

Vilia sunt nobis, quacumq; prioribus annis

Vidimus, & sordet, quod novitate caret.

Auris

DEDICATIO.

Auris nunquam blandius demulcetur, quàm suavi inauditarum rerum sono.

*Cantio enim hæc hominum longè est celeberrima vulgo,
& gratissima, qua nuperrime venit in aures.*

Nec verò his nostris demum temporibus hic novitatis amor humana incescit pectora; viguit utique in Majorum etiam nostrorum animis, tamq; vehementer, ut etiam fuerint, qui, nescio, quo argumēto persuasi, omne, quod est novum, etiam optimum pronuntiare, non dubitarunt. Fortassis quâdam successionis consuetudine, quasi per traducem, à retrorsioribus seculis in hæc nostra propagatus, eundo vires acquisivit, &, adhuc magis, magisq; sese multiplicando, fortior interea evasit. Quandoquidem hodieq; pleræque Artes ac Disciplinæ novitatem redolens, illarumq; Cultores avidissime eam inhiant, & adhuc omnes

DEDICATIO.

ingenii sui nervos intendunt, aliquid excogitandi, ac inveniendi, quod Veteribus fuit incognitum; spe, fore, ut inde præcipuam gloriam ac nominis famam sibi concilient.

Fit autem hoc & libero, & laudabilissimo studio, ubi modus in his servatur rebus. Nam non omnia fecere, qui ante nos fuere, nulli; unquam aliquid inveniendi, aut adjiciendi, via præcludetur. Quod si verò licentiùs exorbitetur, & ingrata accedat affectatio, dici non potest, quàm ingens non solum in Discentes, sed & in Docentes, exinde resultet damnum. Et illi quidem, in tanto novitatis pruritu, novarumq; sententiarum numero, ita confunduntur, ut, quam è tot diversissimis arripiant, planè incerti, perniciosissimo sufflamine in stadio suo retardentur, & discendo aut nihil discant, aut certè parum proficiant. Nec minùs Docentes sibi nec ipsis nocent,

DEDICATIO.

nocent, quando præ summa opinio-
num multitudine, vel, quid doceant,
ipsi ignorant, vel, quod hodiè docent,
cras iterum dedocent; non sine pro-
brosâ malæ institutionis notâ.

Atque hæc innovandi libertas nu-
spiam ferè, si Philosophos excipias, li-
berius hodie grasatur, quàm inter
Apollinæ Artis Mystas. Hic enim
quia cuique, citra piaculum, suo abun-
dare licet sensu, fit, ut penè quivis
unus gloriolæ cupidus, ejus aucu-
pandæ gratiâ, aliquid novi excogi-
tet; aliquid mutet; aliquid corrigat;
sæpè non tam publicum commodum
juvandi, curatiùsq; Medicinam exco-
lendi, quàm ingenium suum offen-
tandi studio. Hic aut novam, aut
compendiosorem, quâ Ars tradatur,
excogitat Methodum. Ille in morbo-
rum à Veteribus datis refutandis, no-
visq; ac inauditis investigandis causis
occupatur. Alius, animantium extis

DEDICATIO.

accuratiùs lustratis, inaccessos aliàs ,
Veteribusq; minùs notos , rimatur
ductùs, iisq; singulares usùs ingeniosè
affingit. Alius ex Chymicorum fur-
nis, nescio, quid novi excutit. Alius
Chirurgum aptiora adhibere docet
Instrumenta. Alius novam Horticul-
turam adornat. Alium alia innovan-
di trahit voluptas; crepantq; hodie
plerique Medicorum nil nisi nova In-
venta. Ut dubitare subeat, an, si Ve-
teribus reditus in hunc Mundum da-
retur, Medicinam hoc novitatis pallio
indutam ampliùs agniture essent.

Et, quod maximè mirandum, fit
plerunque, ut recens inventæ rei ap-
plaudatur, assensusq; accommode-
tur; idq; nonnunquam quidem for-
tasiss non immeritò; nonnunquam
verò vel solam ob novitatem: quod
hinc animadvertere licet, quia ca-
dem res mox iterum omnem gra-
tiam amittit, quamprimùm novita-
tis

DEDICATIO.

tis fucum exuit ; juxta illud Oweni:

*Qua nova sunt, hodieq; placent, non usq;
placebunt :*

*Cur ? quia, qua nova sunt, non nova
semper erunt.*

Absit autem, ut omnia nova Inventa damnem, nihilque prorsus immutandum, innovandumq; , sed id duntaxat rigidissime retinendum esse velim, quod soli docuere Veteres. Absit, ut sic sentiam, ne notum illud Oweni exprobrari mihi possit:

Stulta hac invidia est, cui cuncta recentia sordent :

Invida stultitia est, cui nova sola placent.

Nolo imitari Thracicum illum Rusticum, qui, cum vicinum putantem vires oleasq; vidisset, ipse à stirpe omnes incidit ; probè gnarus, quòd illustria quædam nostrâ demum ætate excogitata Inventa tam egregii in ipsa etiam praxi sint usûs, ut ab iis, qui ultra vulgus Medicorum sapere videri volunt, ignorari nequeant.

)(S.

Ant.

DEDICATIO.

Annon verò vicissim curiosa quædam Commenta sint, quæ, quia in praxi, ipsoq; opere nullius, aut certè perexigui usus deprehenduntur, rejicere, quàm retinere, satius sit, me intelligentioribus dijudicandum relinquo. Unicum tantùm impræsentiarum me nominare juvat. Nonne Transfusio Sanguinis, cùm primùm coepisset, in omnium penè, & quidem eorum præcipuè, qui Curiosi videri volebant, ore fuit, & partim etiam adhuc est? Nonne ejus utilitas tantùm non ad omnes graviores humani corporis affectûs p. n. deturbandos, ipsamq; vitam prolongandam exportrecta est? At quæ, rectâ sinceræ rationis lance ductâ, reapse vel perexigua, vel omninò nulla hodiè deprehenditur. Nonne sui & Defensores, & Propagatores, & Imitatores primùm nacta est quàm plurimos? At quæ hodie ab æquè multis defensione ac imitatione

DEDICATIO.

tatione vix ac ne vix quidem digna deputatur. Cur verò aliis placeat; aliis contrà displiceat, præsens hæc dabit Tractatio.

Hæc dum Patronos ac Tutelares Deos poscere mihi videbatur, de iis circumspicienti, inter omnes, quotquot mihi propitios novi, nullos Literis, Literatisq; magis faventes invenire licuit, quàm *Vos, Viri Incluti!* Unde hac ipsâ spe, *Vos* nec hunc meum conatum penitus despecturos esse, idem, cum aliis, ad *Vos* vadum tentare, & hujus quoque Libelli frontispicio Nobilissima Nomina Vestra similiter affigere volui, idq; partim, ut inde in ipsam Opellam, ex se omni verborum nitore rerumq; gratiâ carentem, aliqui Vestri splendoris radii se diffundant; partim ut orga *Vos, Magnifici Dnn. Scholarchæ!* qui olim Studia mea benignissimè enutrivistis,

DEDICATIO.

vistis, publica grati animi mei testificatio extet, & *Vobis, Spectatissimi Collegii nostri Dnn. Præsides!* devotum, &, quale Præsidio Cliens debet, venerationis documentum à me exhibeatur.

Accipite ergo, *Senatores Gravissimi!* pro decantatissima Vestra humanitate, & propensissimâ in Literatos benevolentiam, quod eo, quo debeo, submissionis cultu offero, benignâ mente manûq;

Deus sanguinem, in Nobilissimis Corporibus Vestris, ad seros usque vitæque saturos annos intaminatum fervet, ut nec alieni sanguinis Transfusionem, nec multo medicaminum usum opus habeatis.

Norimberg.
D. XII. Cal. April.
M. DC. LXXIX.

NN. SS. PP.

MM. VV.

quoad sanguis in meis
calebit venis

devotissimus

Georg. Abraham. Mercklinus,
Jun. D.

— ❦ — — ❦ — — ❦ —

PRÆFATIO

ad

Æquum, & sinceri judicii Lectorem.

Integrum circiter octennium procesfit, ex quo primum, ex Italia noviter redux, succisiviis horis, à me conscriptam Transfusionis Sanguinis Historiam typis destinaveram; idq; hâc potissimum fini, ut Curiosorum, novitatisq; avidorum hominum desiderio quadantenus satisfaceret, quippe quos tum de nova hac Operatione frequentissimè apud nos musitare sensi. At enim verò, cum eam manu tantum adhuc scriptam, antequàm prelo submitteretur, aliquot doctorum Virorum amicis censuris, Veterum mare, exponere, non sine ratione, placeret, ecce! apud eorum aliquem harenis, nescio, quâ incuriâ, ab exorto in Museo incendio, ita, cum aliis Scriptis, corrupta atq; consumpta est, ut, præter pauxilla folia, nihil ejus remanserit; unde id, illo tempore, effectum dare, quod in animo habui, non licuit. Atque hac jactura fecit, ut postmodum de Scripti hujus editione nunquam amplius cogitârim, maximè, ubi animadverti, Transfusionem Sanguinis jam exolescere, inq; animis cordatiorum vilesce-
re incipere.

Quod

P R Æ F A T I O.

Quod verò nihilominus idem Opus denuò ruminatus, nunc demum in publicam lucem emittam, non una est causa: & quidem primò, quia aliqui eorum, qui præsentem Tractationem adhuc ineditam olim viderunt, eam in publicis Scriptis suis hinc inde allegarunt; imò & ipsemet in Annotationibus meis ad Joseph. Pandolphini, ante quinquennium à me editum Tractatum, de Ventositate Spinæ, cap. 4. citavi: deinde quia aliquot jam abhinc annis nonnulli magni nominis Viri, quorum nutus atq; voluntas promitti quasi imperio mihi esse solet, ejusdem Codicis editionem urserunt: & tertio quia mihi, in Inclutam S. R. J. Academiam Naturæ Curiosorum haud ita pridem solemni ritu adoptato, vi Legum, incumbit, Specimen aliquod, sive ex Regno Minerali, sive Vegetabili, sive Animalì desumptum exhibere; unde fidem meam aliquantùm liberaturus, debitumq; expuncturus, deliberato consilio, apud animum meum conclusi, hanc ipsam cramben recoquere, hacq; singularis, protractioribus his hyemis demùm noctibus, à me elucubrata Tractationis formâ iterum aperire, haud ita dubiâ spe, eam non usq; adeò ingratham fore. Quandoquidem ipsa novitatis specie, quæ hodiè sola plerosq; delectat,

P R Æ F A T I O.

lectat, & tantum non fascinat, non minùs se commendabit.

Mei enim instituti cardo in hoc potissimum versatur, ut, præmisso brevi, de Ortu ac Modis Transfusionis Sanguinis, sermone, eam, qua fit è bruto in hominem, non immeritò suspectam haberi, aleâq; periculosâ plenam, minùsq; tutam, ac inutilem Operationem esse, ut ut fortassis non penitus impossibilem, argumentis, meâ quidem opinione, non adeo elumbibus, evincam atq; contendam; id quod datâ operâ atq; ex professo nondum à quoquam in Germania factum memini.

Hôc autem, tantum abest, ut quenquam ladere, aliudve sentientem acerbius traducere, multò minùs indignis convitiis proscindere, quod à me alienissimum est, studiò intenderim; ut potiùs, liberâ cuius, quidvis sentiendi, relicta potestate, sedulò operam dederim, eâ modestiâ atq; continentiâ agere, quam non possit non etiam Adversarius probare; quo ipso consilio studiosè me continui, in personas debacchari, eosq; , contra quorum sententias dimico, suis nominibus exprimere.

Quid? quòd impendiò dolerem, si quod fortè durius excidisset verbum, quo se ququam offensum putare posset. Ipse verò contrà gauderem, si sufficienti, multiplicium, felici

XX

eventu

P R Æ F A T I O.

eventu, factorum experimentorum, inductione nova hujus Operationis utilitas, ad Medica rei complementum, vel, pro vita prolongandâ, vel, pro quibusdam morbis profligandis, bonis mortalium rebus, postliminiò vindicaretur, atq; adeo meas suspiciones, inanes, falsas, & frustra fictas, nullumq; periculum, quod me tenet anxium, hic metuendum esse, contrariis rationibus ostenderetur. Verbo: hæc illa sunt difficultates, quibus mihi Transfusio Sanguinis, quæ sit è bruto in hominem, premi videbatur, quas hæc ipsa scriptio complecti libuit, ut, ubi pondus habere, calculumq; mereri videbuntur, nemini non innotescat, Transfusionem hanc, ceu futilem, tollendis morbis imparem, ac periculosam, posthæc penitus exulare debere, & omninò abrogandam, repudiandam, ac aversandam esse; sin minus, collectis hisce dubiis, rectius obviam ire, & oppositorum argumentorum non minus, quam sufficientium experimentorum robore, contrarium confirmare, Inventorq; pristinam authoritatem, cuicunq; libuerit, commodius asserere liceat. Apodictica autem sive infallibilia argumenta hic ego nulla vendito. Abundet quilibet suo sensu, certòq; sibi persuadeat, perinde mihi esse, siue meam sententiam ratam habeat, siue irritam, modo eam impugnatu-

P R Æ F A T I O.

rus id similiter sine acerbitate aut amarulentiâ faciat; & , quod rogitò , non sigillatim ad unum tantùm atq; alterum argumentum , sed ad omnia & singula ordine respondeat. Non enim omnia ejusdem sunt ponderis , sed ita comparata , ut saepe unum ex altero fluat ; haud rarò unum etiam alterum prolixius explicet ; quò non aliter fieri potest , quin unum altero fortiùs aut debiliùs stringat ; adeo , ut omnium argumentorum , phænomenorum , atq; similitudinum , collectio demum sententiæ nostræ summam constituat.

Nec ideo solùm vapulabo , quòd sollicitè ab aliis excogitatum Inventum ego diruere audeam , diligentius potiùs excolendum , ne facunda & ad inveniendas res felicia ingenia , malo hoc exemplo , posthac deterreantur. Sed enim si nuspiam de nulla re unquam dubitandum , quod nos unicè hîc facimus , unde amabo ! tot diversissima nata sunt opiniones ? unde ortum traxit illud , quod communiter dici solet , omnia quidem esse probanda , sed illud tantùm , quod bonum est , tenendum ? Eccur Cartesius , Subtilissimus ille Philosophus , de omnibus dubitandum praecepit ? Nonne reciproca disputatione veritas elicitur ? Hoccine unicum Inventum illâ sorte , quæ plerasq; , si non omnes res novas ,

P R Æ F A T I O.

in omnibus disciplinis, ipsâq; etiam in Medicinâ manere solet, ut primum vexentur, exemptum sit? Nonne à rigido hoc mancipii genere omnis sanior Philosophia nunquam non abhorruit, quo nudè, sine ulla contradictione, sineq; ulla dubitatione, uni soli credatur, inq; sola Magistri verba, sine propria rationis adhibitione, juretur?

Confido ergo, neminem fore, nisi invidum, nisi præconceptæ opinionis caligine occæcatum, nisiq; morosum admodum, qui hanc dubitandi rationem vitio mihi vertat. Imò nec bonum, etiamsi refutatum se senserit, mihi ea propter succensurum spero.

Interea Inventionis hujus laudem nihilominus illi, cui debetur, relinquimus libenter, concedimus cumulatè, & deferimus liberaliter. Vale, Lector Benivole! & hac in limine monuisse, a qui boniq; consule.



Fragmen-

Fragmenta Epistolarum, quibus
præsentis Tractationis Author, de
ejus editione, à Clariss. quibusdam Viris,
per Literarum commercium, jam olim
admonitus est.

Johan. Christian. Frommannus,
D. Medic. Provincial. Saxo - Coburgic.
& Profess. Publ.

MUlas Tuas splendidas saluta-
turus, præmissâ salutis officio-
rumq; nuncupatione, imò & gra-
tiarum actione, pro Tractationis Tuae
doctissimæ, de Transfusionè Sanguinis,
quam remitto, communicatione, redeo.
Scriptum sesamo & papavere consper-
sum, hoc est, acutè elaboratum, voraci-
bus oculis hausi, & ex eo, quod animi fa-
mem sedare potuit, liberrimè reportavi.
Ut verum fatear, suspectum mihi quo-
que jam olim fuit idem hoc negotium.
Medicæ Artis lusum & exercitium curio-
sum appellavi; propterea tamen non in-
usum trahendum, familiarem judicavi;
& jam nervosæ, quas Tractatio Tua
Curiosa profert, rationes me magis ma-
gisq; confirmarunt; &c. *Et sub finem:*
Verum & omnem conatum ingenii Tui
) (X 3 calore

F R A G M E N T A

calore fractum, &, si Scripto huic (cujus editionem & suadeo & desidero) ullus insultaverit, eodem repulsum iri, nullus pariter dubito.

Coburgi, D. 18. April.

M. DC. LXXII.

Idem.

Relatio, quæ me latuit, de Transfusionis interdicto, Romæ, sub statuta poenâ, promulgato, lectu mihi fuit jucunda. Ne autem eruditam Tuam, de ea, manu scriptam Tractationem propterea, & propter mea Tibi communicata dubia, oblivioni tradas, amicè rogo: imò alios idem sentientes opera Tua literaria, ut confirmantur, invitabit, & interdicti sui, se non poenitere, fatebuntur illius Authores. Itaque opinionum monstro domando semper quærenda & reservanda est Herculis clava, quam si docto orbi eruditâ manu subministraveris, seu in superando isto Hercules ipse fueris, nomen & gratiam non exiguam referes.

Coburgi, D. 21. Novembr.

M. DC. LXXII.

Georg.

EPISTOLARUM.

Georg. Hieronym. Velschius,
Medicus Augustan. & in S. R. J. Academ.
Natur. Curios. dictus Nestor.

TRactatum Tuum, de Transfusione Sanguinis, vidi. Probo eum, & seridè hortor, ut edas. Etsi enim Pontificis Romani jussu abrogata sit, succedente omnium silentio, interest tamen Medicæ historiæ, hunc quoque inseri.

Augusta Vindelic.
Ipsis Idibus Decembribus.
M. DC. LXXII.

Lucas Schröckius, Luc. Fil. Med.
Doct. Physicus Augustan. & in S. R. J.
Academ. Natur. Curios. dictus
Celsus.

Non esse Te otiosum, Discursus, de Transfusione Sanguinis, oppidò, ut credo, eruditissimus, unde Literatis eum placere posse, nullus dubito, sufficienter comprobat. Nobilem illam materiam percurrere haud detrecto; non alium tamen in finem, quàm ut doctior inde evadam.

Augusta Vindelic.
D. 7. Novembr. Styl. nov.
M. DC. LXXII.

Idem.

Tractationem Tuam, de Transfusionē Sanguinis, infidam consumpsisse flammam, tantoq; labori ac diligentiae tam inspiratam tribuisse mercedem, doleo. Sic non semper tutum est, res meditatae premere in annos. Tu fortius itaque insta, & quæ alia, luce publicâ digna, habes, Vulcano, cæterisq; fortunæ technis eripe, fructumq; debitum expecta.

*August. Vindob.**D. 29. Decembr. Styl. nov.**M. DC. LXXIV.*

*Johannes Laurentius Fehr,
Job. Mich. Fil. Med. Doct. Practic. Svin-
furt. & S. R. J. Academ. Natur.
Curiosus.*

Dominus Parens meus, qui multam & Tuo Domino Parenti & Tibi denunciare salutem jussit, Tractatum Tuum, de Sanguinis Transfusionē, satis ingeniosè atque nervosè elaboratum, legit, dignumq; omninè judicavit, qui luci publicæ exponeretur. Tu sanè Operam Orbi literario haud inutilem collocasti. Integrum autem Tractatum hunc Typographo Collegii Natur. Curios. offerre non audeo,
quia

EPISTOLARUM.

quia forsan videbitur nimius; & aliquid exinde excerpere, ob intimam unius cum altero connexionem, non licebit, ne mutilum ac mancum reddatur Opus. Non tamen dubito, quin & hæc materia egregiè enucleata suum posthac habitura sit promotorem. Gratias interim ago pro communicatione, atque hâc commodâ occasione oblata remitto totum Tractatum.

Sninfurti, D. 13. Maij.

M. DC. LXXIV.

Paulus Francisci, Transylvanus,
cum hac scriberet, Medicin. Candidatus Alt-
dörph, nunc Doctor, & Physicus Ordin.
Wonsiedlensis.

Nunc, quod ulterius iusseras, præstandum esset, nimirum Tractatio Tua, de Transfusionè Sanguinis, remittenda. Sed, heu! me infelicem: flamma vorax devoravit eam. Nox erat (ut infortunii mei rationem Tibi reddam) ipsa nimirum, quæ precedebat Festum Academicum Petro Paulinum, cum ego cubitum iturus, vestibusq; deponendis jam occupatus, ab exortis subito clamoribus quibusdam, cum quali quali Musicâ, permixtis, ad auscultandum avocarer, relicto interim candelabro candelam ardentem sustinente in



Con-

F R A G M E N T A

Conclavi meo. Paulum itaque commo-
 ratus apud fenestram vestibuli, & rursus
 ingressus Museum, prohi dolor! Vul-
 canum insatiabilem, luculento igne, in Mu-
 sas meas furem video. Unde insolito
 terrore perculsus, ne ulterius pergeret,
 partim aqua; partim pedibus, manibusq;
 furorem ipsius compescui, cubitumq;
 ut somnus, si quis succederet, dolorem
 leniret, me contuli. Mane summo pau-
 perculas meas reulas revisens, bonam ea-
 rum partem consumptam, corruptam, &
 usui ineptam reperio; sed quod maximè
 cruciat, & tantum non consumit me,
 Tuam ipsam Tractationem, de Trans-
 fusione Sanguinis (quam ante aliquot dies
 ab Excell. Dn. D. Brunone, Tuo jussu, ac-
 ceperam) iis adnumeratam video. O me
 infelicem! inquam: hoc cene pulchrum
 illud natalitium est, quod ipsis nomina-
 libus meis mihi offertur? Nulla calamitas
 sola. Ita humanæ sortis insidiator & pau-
 cula, quæ possideo, & Fautores mihi
 rapere vehementer conatur. Sed quid
 ego Tibi? Vir Excellentissime! Quibus
 ego verbis culpam hanc Tibi deprecet?
 Præ summo certè animi dolore vix, quid
 vel nunc scribo, scio. Animus angitur;
 manus tremit; calamus vacillat. Verbu-
 lum

EPISTOLARUM.

lum dico: ignosce Fautor, (siquidem adhuc pati poteris, me hoc nomine Te compellare) Suspiciende! & commiserere infelici. Fateor quidem (hoc enim est, quod doleo) hâc ipsâ jacturâ jacturam passam esse Rempublic. literariam, nisi Tu modum adhuc scias & habeas, quo ea sit compensanda. Considera, quantum ipsi Celeberrimo Thom. Bartholino ex Bibliothecæ suæ combustionem damnum accesserit, & hujus utere solatio; mihi verò, veniam submisit petenti, parce.

Altdorphi, D. 19. August.

M. DC. LXXIV.

SYLLABUS CAPITUM.

CAPUT I.

Transfusio Sanguinis quid? quæplex sit? quibus Instrumentis, & quomodo illa è bruto in hominem fiat?

CAPUT II.

An Ovidio, Marfil. Ficino, Joh. Colli, Andr. Libavio, jam olim nota & probata fuerit? Ejus hodierni Inventores recensentur.

CAPUT III.

Ejus præcipuus usus in prolongatione vitæ, & morborum quorundam curatione consistere dicitur; sed refutatur uterque. Sanguinis è bruto in brutum Transfusio ad Medicum non pertinet. Illa, quæ fit è bruto in hominem, non medetur corruptioni Mentis: non Lethargo: non Phthisi: non ulli Februm speciei. Non adhibenda

SYLLABUS CAPITULI.

hibenda us, qui integrâ valetudine gaudent. Non adeo facile exerceri potest, sed multis difficultatibus implicita est. Non facit contra Leporam, qua describitur: non contra Lucem Veneream: non contra Cancrum, Erysipelas, aliaque Ulcera externa: non contra Variolas: non contra Pleuritidem, aliasve internas Inflammationes: non contra Hemorrhagias: non contra Rabiem, nec denique contra ul- lum alium morbum.

CAPUT IV.

Quatuor secundarii usus examinantur, & rejiciuntur.

CAPUT V.

Phænomena, numero sex, pro Transfusionem adducta ventilantur, & ad ea ita respondetur, ut cuncta nihil probare ostendatur.

CAPUT VI.

Positiones, sive argumenta aliquot ex sacris & pro- fanis Scriptoribus, contra Transfusionem, affe- runtur; qua Romæ & Lutetiis Paris. interdicta est; & ab aliis etiam Cl. Viris improbat. Duplici gravissima occurritur objectioni.

CAPUT VII.

Aliquot Similitudinibus nostra sententia contra Transfus. Sanguin. illustratur.

CAPUT VIII.

Reliqua damna atque pericula, ex Transfusionem me- tuenda, in medium proferuntur.

CAPUT IX.

Transfusio Sanguinis ex homine in hominem duplici modo fieri potest: nec approbatur, nec impro- batur, sed in medio relinquitur, & ad expe- rientia examen relegatur.

CAP. I.



CAPUT I.

*Transfusio Sanguinis quid ? quotuplex sit ?
quibus instrumentis, & quomodo illa è bruto
in hominem fiat ?*

Quid Sanguinis sit Transfusio ;
quo ea fiat modo ; & quibus ad-
ministrari soleat instrumentis ,
vix opus esse puto particulatim
prolixè hîc deducere. Neminem enim cor-
diorum Medicorum hodiè esse scio, cui de
hoc non constet Invento. Ne tamen sine
omni methodo agam , primumq; hoc mem-
brum confuso saltu superem , paucissimis me
expedire , consultissimum duxi. Scilicet est
Transfusio Sanguinis nihil aliud , quàm san-
guinis unius animalis , in sanguifluum vas
alterius animalis , per intermedios artificio-
se paratos canaliculos sive tubulos , facta de-
rivatio ; ad illius animalis , in quod sanguis
transfunditur , vel vitam prolongandam , vel
morbos averruncandos potissimum excogi-
tata.

Animal à quo , & in quod sanguis trans-
funditur , vel est rationale , id est , homo ;
vel irrationale sive brutum ; & quidem vel

A

utrum-

utrumque ejusdem inter se speciei; vel diversæ. Ita transfunditur v. g. ex homine in hominem: è bruto in hominem: & è bruto in brutum: idq; iterum vel è cane in canem: ex agno in agnum: è vitulo in vitulum: vel è cane in agnum: ex agno in vitulum, & vice versâ; prout nempe res atque varius ejus, qui operationem hanc instituit, præfixus poscit finis.

Per sanguisuum vas intelligitur vel vena; vel arteria. Ex homine in hominem instituturus Transfusionem, in dorso manus eligere solet venam, ex qua tusâ sanguis scaturiens vel itidem in venam dorsî manus, vel in venam cubiti, ut decet, apertam alterius hominis elutrietur. Eandem verò Operationem è bruto in hominem qui celebrare fatagit, diffindit vel bruti arteriam carotidem, vel ejusdem arteriam cruralem, quippe quam aptiorem posteri deprehenderunt, vel etiam, ut aliis placet, venam jugularem; derivatq; inde sanguinem in patentiorem venam cubiti hominis.

Instrumentorum loco, per quæ, cœcæ media, ab uno animali in aliud transire debet sanguis, primo Inventi exortu tenuis pennæ cauliculi adhibiti sunt. Quia autem eos paulo post alii minus idoneos deprehenderunt, ideo mox in illorum vicem substituerunt canaliculos sive tubulos, eosq; vel argenteos, vel æreos, vel orichalceos, vel denique vitreos sive crystallinos; & quidem iterum, vel
rectos,

rectos, vel unâ tantum extremitate, vel utrâque, incurvatos, partimq; exiguâ fimbriâ, pro commodiore ligatione, instructos; partim verò eâ destitutos. Sunt tandem rursus alii, qui binis invicem insertis canaliculis, molli-
bus intestinorum frustulis, aut arteriæ cervicalis, ex equo vel bove aliquo exemptæ, segmentis, in medio obvolutis, pro majori, ne sanguis in itinere concreascit atque coeat, securitate, uti malunt; quem in finem etiam nonnulli non dubitant, canaliculis suis aliquot grana salis volatilis Cornu Cervi, aut florum salis Armoniaci indere, ut nempe transeuntis sanguinis coagulatio in iis prohibeatur. Longitudo autem horum tubulorum, pro varietate circumstantiarum, multum quidem variat, ita, ut nunc longioribus, nunc brevioribus opus sit; digitum tamen cum dimidio nullus unquam superat.

Fit ergo Transfusio Sanguinis (eujusè bruto in hominem instituendæ quandam quasi succinctam Sciagraphiam exhibere placuit) hoc propemodum modo: Extenditur v. g. Vitulus super tabulam ligneam, pedibus atq; capite diligenter alligatis, ne motu ac calcitracione Operantem remoretur; eoq; locatur positu, quo alterum ejus crus hominis cubito quàm proximè adaptari possit. Tum bruti arteria cruralis phlebotomo aut lancettâ, vel quodcumque alio idoneo instrumento aperitur, inq; eam actutum agillimâ manu canaliculus conveniens, cu-

spide tenuis, versus Cor immittitur, pollice & primo digito inter ipsam arteriam ita comprimendus, ut neutro deflectere aut exorbitare queat. Hoc dum fit, hominis vena cubiti magis conspicua sine morâ, injectâ duplici ligaturâ, qualis in vulgari venæ sectione fieri assolet, phlebotomico instrumento secatur, inq; eam, postquam tantundem sanguinis emissum est, quantum infundere de bruti sanguine, animo sedet, altera canaliculi extremitas, Cor itidem respiciens, dextrâ manuum promptitudine insinuatur, sicq; sanguis è Vitulo in hominem traducitur; probe nunquam non quovis modo præcavendo, ne is in transitu coeat atque grumescat.

CAP. II.

An Ovidio, Marsil. Ficino, Joh. Colli, Andr. Libavio, jam olim nota & probata fuerit? Ejus hodierni Inventores recensentur,

Explicatis breviter præcipuis in Definitione seu potius Descriptione expressis verbis, occasione reliquorum, in eâ additorum, finis quoque sive usus examinandus esset, nisi consultius fore judicarem, brevem prius, de Ortu atque Authoribus Transfusoriæ hujus Artis, præmittere narratiunculam; quo simul de ratione tituli Tractationi præfixi liquidius constet.

Abeunt autem aliqui longius, & ex priscis etiam seculis accersunt, quos vel multum lucis

cis huic Invento fœnerari, vel saltem ad idem non levem ansam aliis præbuisse credunt. Ipsum enim Ovidium in partes suas trahunt, perhibentes, eum fabuloso quodam commento hodiernæ sanguinis Transfusionis methodum simul ac effectum non adeò malè descripsisse, quando *Libr. 7. Metamorph.* Jasonium Patrem Æsonem ex decrepito, à Medeâ ejusdem penè præsidii beneficio, juvenem factum ita fingit:

— — *Stricto Medea recludit
ense Senis jugulum, veteremq; exire cruorem
passa, replet succis, quos postquam combibit
Æson,
aut ore exceptos, aut vulnere, barba comaq;
canitie posita, nigrum rapuere colorem.
Pulsa fugit macies: abeunt pallorq; situsq;
adjecto cava suppleantur corpore ruga,
membraq; luxuriant* — — —

vel quando alibi eandem Medeam ita introducit, ut Pelix filias de eodem artificio Parenti adhibendo commonefacere videatur.

— *Quid nunc dubitatis inertes?
Stringite, aut, gladios, veteremq; haurite cruorem,
ut repleam vacuas juvenili sanguine venas:
In manibus vestris vita est, ataq; Parentis.*

Nec defunt, qui, ex superiori seculo, Marfilium Ficinum quoque pro se allegare audent, etiamsi & Ovidius & hic Ficinus neutiquam derivationem sanguinis ab unius animalis arteria in venam alterius, sed tan-

tum sanguinis calentis recentisq; ex vena juvenis sive adolescentis suctionem, juvenescere cupientibus senibus, conceptis verbis, suadeat. Ita namq; de *Studioforum sanitate tuenda libr. 2. c. 11.* edit. Lugdun. anno 1560: Communis, inquit, quædam est & vetus opinio, aniculas quasdam sagas (quæ & Striges vulgari nomine nuncupantur) infantium sugere sanguinem, quo pro viribus juvenescant. Cur non & nostri senes, omni videlicet auxilio destituti, sanguinem adolescentis sugant; volentis, inquam, adolescentis, sani, læti, temperati, cui sanguis quidem sit optimus, sed forte nimius? Sugant igitur more hirudinum ex brachii sinistri vena vix apertâ unciam unam aut duas.

Propius sanè rem tangit Joh. Colle, non postremus, inter primos currentis seculi Scriptores Medicos, Scriptor, quo nescio an quisquam veterum Medicorum vividioribus coloribus novum hocce Commentum depinxerit; adeò, ut nullum pene sit dubium, quin de eo ab homine in hominem instituyendo jam olim revera cogitarit. Non tædet ipsa ejus verba transcribere, quæ reperire est in *Method. facile parandi jucunda, tuta, & nova medicamenta*, edit. Venet. anni 1628. & in specie de *jucundis & Spagyricis cibis ac medicamentis pro vita & senectute longius producenda cap. 7. p. m. 170.* Denuo, ait, insurget aliquis, frustra hæc esse tentanda, dum per pauciora æque & benè valemus consequi optata, veluti

veluti si quis sanguis è vena exiliens juvenis admodum salubris, per fistulam in venam senis permeet, insufflante juvene, & sene attrahente & inspirante; ut sanguis juvenis intus attrahatur à sene, & ne hujus egredia-
tur. Nam hic sanguis potest reparare humi-
dum primigenium & temperamentum, do-
cente Aristotele: si senex haberet oculum
adolescentis, videret ut juvenis. Hæc ille.
In hunc locum casu, & tanquam aliud agens,
incidi, quem ante me, quantum scio, nemo
publicè exstante Scripto indicavit.

Tandem & Andr. Libavius in scenam hanc
producitur. Quid autem is? Transfusionem
Sanguinis exsertis quidem verbis describit,
quando, *Appendic. Syntagmat. Arcan. Chymic.*
edit. Francofurt. 1615, cap. 4. Adsit, inquit,
juvenis robustus, sanus, sanguine spirituofo
plenus. Adstet exhaustus viribus, tenuis,
macilentus, vix animam trahens. Magister
artis habeat tubulos argenteos inter se con-
gruentes. Aperiat arteriam robusti, & tubu-
lum inserat, muniatq;: mox & ægroti arte-
riam findat, & tubulum femineum infigat:
jam duos tubulos sibi mutuo applicet, & ex
sano sanguis arterialis, calens & spirituosus
saliat in ægrotum, unæque vitæ fontem affe-
ret, omnemq; languorem pellet. Sed tan-
tum abest, ut Artem hanc imitandam præci-
piat, suoq; calculo approbet, ut potius, cum
ridiculam, absurdam ac inimitabilem mani-
festo rejiciat atque explodat. Quid enim sibi

vult hæc responsio, quam sibimet ipsi dat, quando quærit: an robustus ille non languescet? ubi non sine subfannatione jubet, ut ei exhibeantur bona confortantia atque cibi: Medico verò helleborus.

Verùm quid me moror veterum Authorum allegatione, cum nemo eorum, qui Inventi hujus laudem sibi vindicare solent, concessurus sit, veros ejus natales inde à retrorsioribus jam temporibus deducendos esse. Nondum, dicent illi, tantam ætatem nacta est hæc Ars. Non prioribus seculis; non avorum; non parentum nostrorum, sed nostræ demum memoriæ, & non nisi paucis abhinc lustris, nasci cæpit. Iccirco & in nostra tempora curatius inquirere, atque recentes rei Inventores in medium strictim proferre juvabit; ubi, in antecessum, notandum, Transfusionis Sanguinis è bruto in brutum exercendæ, Anglos; ejus verò è bruto in hominem, Gallos, primos Authores communiter dici. Et quidem inter Anglos nominari speciatim hic solent Timotheus Clerck, & D. Henshaw, ita tamen, ut uterque de novo hoc Invento, arreptâ ab Infusoria Chirurgiâ, cœu matre, an sâ, omnium quidem primum, idq; anno 1657. cogitarit, idem autem nunquam felici eventu adhibuerit, à quamplurimis difficultatibus usque impeditus. His verò difficultatibus post integrum demum decennium superatis, maximamq; partem sublatis, anno 1666. rem iterum primum exopta-

to successu aggressus est Richardus Lowerus, ille, edito, de Corde, curiosissimo Tractatu, celebris Medicus; cujus conatus mox Edmundus King & Coxius eadem felicitate imitati sunt; sed non nisi in solis brutis factis experimentis.

Galliautem illi fuerunt, qui, ultra progressi, eandem Operationem in bruto ac homine quoque, circa annum 1667. primitus tentare ausi sunt; quo nomine præcipue inclaruit Dionysius, celebris Mathem. & Phyc. Professor Parisiensis.

Hi, inquam, potissimam inventionis laudem à posteritate vulgò meruerunt. Nec tamen interea aliis etiam regionibus defuere, qui hanc honoris palmam tantum nō dubiam Anglis simul atque Gallis reddere videntur. Sic in ipsa Germania nostra Joh. Daniel Major, Medicinæ Professor Kiloniensis, acutissimi, rari ac curiosi ingenii Vir, Fautorq; & Amicus noster Honoratissimus, occasione Chirurgiæ Infusoriæ, quam ipse primus revera excogitavit, de transfundendo etiam è bruto in hominem sanguine non minùs deliberavit, idq; antequam de Anglorum Gallo- rumve Transfusionem quicquam constare ei potuerat. Taceo Mauricium Hoffmannum, diversorum Imperii Statuum Medicum & Professore Altdorphinum, Fautorem meum Venerandum, ex cujus publicis Prælectionibus monstrari potest, ei Sanguinis ab homine in hominem moliendam Transfusionem du-

dum antè, quàm de factis apud exteros circa eam qualibus qualibus experimentis rumor ad nos advolaverat, innotuisse; ut ut metu conscientiae lædendæ eandem exercere hætenus noluerit. Et in Italia Bononiæ sub ipsum statim inventæ Transfusionis initium similiter eam in duobus agnis factam esse, ex fide dignorum relatione indubitatum habetur. Sive ergo huic, sive illi, sive isti, sive cui demum-cunque horum inventionis gloria potiori jure competat, meum non est disquirere. Quid enim attinet, de Authore illius rei multum disceptare, de cujus utilitate hodie tantopere dubitatur?

CAP. III.

Ejus præcipuus usus in prolongatione vite, & morborum quorundam curatione consistere dicitur; sed refutatur uterque. Sanguinis è bruto in brutum Transfusio ad Medicum non pertinet. Illa, quæ sit è bruto in hominem, non medetur corruptioni Mentis: non Leithargo: non Phibisi: non ulli Februm speciei. Non adhibenda iis, qui integrâ valetudine gaudent. Non adeo facile exerceri potest, sed multis difficultatibus implicata est. Non facit contra Lepram, quæ describitur: non contra Luem Veneream: non contra Cancrum, Erysipelas, aliaque Ulcera externa: non contra Variolas: non contra Pleuritidem, aliasve internas Inflammationes: non contra Hemorrhagias: non contra Rachem, nec denique contra ullum alium morbum.

Quæ-

QUænam verò hæc utilitas, quæ quorundam hominum spem tam altè implet? Ejus præcipuam partem jam supra Cap. I. levi digito attigimus, paulò plenius nunc pertexuri. Ajunt, novum Transfusionis Sanguinis Inventum, vitam prolongare, & morbos amoliri, aptum natum esse. Inæstimabilis, me hercule! usus, à quo præcipuus totius Medicinæ finis pendet. Quò enim vita hominis sanitasq; pretiosius bonum est, eò illud præsidium, quod per sanguinis redintegrationem ejus prolongationem juvat, magnificentius meritò habendum. Atqui hoc Sanguinis Transfusio præstare posse dicitur, quando missis, ex deflocati senis venâ, aliquot emarctidi sanguinis unciiis, in ejus locum tantundem sanguinis integri, salubris, florentisque, aut ab animoso & optimâ sanitate prædito juvene emendicati (quæ una est Transfusionis Sanguinis species, de qua sub finem Cap. ultimo) aut ab intaminato bruto (quæ altera nostriq; unice instituti species est) desumpti substituitur, jamq; supra commemoratâ methodo in hominem annosum traducitur, quò ille, exutis inde senii exuviis, amissas vires, si non omnino, aliquantum tamen, recipiat, & induto amabili juventutis paludamento, quâdam quasi *παλιγγενεσία* redintegrescat.

Tertiam verò speciem, quâ sanguis à bruto in brutum transfunditur, à nostris cancel-
lia

lis prorsus exterminare nulli dubitamus, quippe quæ sub considerationem Medici omnino non cadit, & per se nunquam, sed semper eum tantum in finem celebrata est, ut, factis prius in brutis innoxiiis experimentis, deinceps & ad hominem progressus fieri posset securius. Quandoquidem non circa animal brutum, sed circa hominem versatur Medicus. Hic hominis vitam prolongare, sanitatem præsentem conservare, amisamq; restituere studet; non autem animalis bruti.

Alter usus seu finis generalis atque primarius novi hujus Præsidii consistit in profligatione morborum: & acquiri posse creditur, quoties ex vena hominis gravi aliquo morbo laborantis sanguis impurus, corruptus, aut aliâ ratione peccans, ad aliquot uncias evocatur, ejusq; loco sanguis beluinus, recens, illibatus, ac defœcatus, sed & ad humanum sanguinem immutandum aptus, atque sic contrarias qualitates possidens, Transfusionis consuetae methodo, infunditur; idq; hac fini, ut morbus hominis ab aliquo sanguineæ massæ vitio prognatus, ab infuso bruti sanguine, ceu salutari remediî materiâ, tollatur ac propulsetur, cum ægroti levamine, & succedente prosperâ valetudine. Ita v. g. maniaci sanguinem impetuosum, æstuantem, & præ inordinatissimo motu vix intra venas suas continere se scientem, insanoq; quasi fermento actum, compescere, coercere ac mitiorem tepidioremq; reddere posse perhibent

bent sanguinem asini aut agni, animalium quippe lentorum, segnium ac demissorum; ut adeo contrariarum virium remedium, veræ medendi methodi lege, morbificæ causæ opponatur, sicq; maniacus ad pristinam mentis simul ac corporis sanitatem inde redeat.

At enim verò, antequam ad alios eosq; secundarios usus procedamus, prius duplicem hunc jam adductum sub incudis examen revocabimus. Transfusionis ope quenquam cuiquam hominum vitam prolongasse, aut ulli seni juventutem restituisse, novasve saltem vires inspirasse, nondum constat, nec ullibi legitur. Ovidii testimonium, quo is, hujus præsidii adhibitione, Æsonem senem rursus adolevisse, cominiscitur, nihil probat. Fabula est, non vera historia. Et Marsilius Ficinus, dum jubet, ut senes ex vena brachii adolescentis unam alteramve sanguinis unciam, more hirudinum, ore sugant, quo inde pro viribus juvenescant, rem non solum ab hodierna Sanguinis Transfusionem multum diversam, sed & non minus perniciosam ac inimitabilem, ut infra declarabimus, probabili saltem ratione proponit, nulloq; experimento confirmat; quod ipsum etiam in Joh. Colle desideramus, qui quoniam nec ipse, nec alius quisquam, post eum, speciosum hunc ingenii lusum aliquo experimento posteritati commendare ausus est; non invitati adducimur, ut credamus, medicinam hanc

nun-

nunquam à quoquam tanti æstimatam esse, ut censuerit, ejus beneficio senium hominis revera retardari, vitamq; extendi posse. Multa à Veteribus juxta ac Recentioribus acutè excogitata sunt, quæ, etiamsi dexterimarum manuum operâ examinentur, tamè sperato nos successu frustrantur. Nempe enim sunt subtilia cerebri fragmenta, de quibus Philosophis quidem acriter disputare, non item Medicis idem tentare, ac ipso opere experiri licet; inter quæ si & hoc Inventum recensere placuerit, per me integrum erit.

Nec nos præterea quicquam movent illa exempla, quibus refertur, factâ Sanguinis Transfusione ex hœdo, aut agno, aut cane in vetulum canem, itemq; ex quatuor arietibus in annosum equum, illis animalibus, quibus sanguis alienus infusus est, multum inde roboris accessisse, virium integritatem, ipsumq; propemodum juventutis florem rediisse, fugato quoque languore, & excussis magnam partem illis symptomatibus, quibus cum animalia illa ante remedii hujus usum conflictabantur. Præterquam enim quod tertiam hanc Transfusionis speciem paulo antè prorsus à nobis remotam voluerimus, utpote ad forum Medicum neutiquam pertinentem, tanta insuper inter Transfusionem Sanguinis, quæ fit è bruto in brutum; & inter illam, quæ è bruto in hominem fit, interredit differentia, quanta est inter animal irrationale ac rationale. Ibi inter utrumque languis-

sanguinem maxima conformitas; hîc verò ingens disparitas. Ibi enim utrumque animal non nisi corporeâ ac materiali animâ, cujus præcipuum instrumentum sanguis est, gaudet; hîc autem brutum à corporea, atque homo ab incorporea, præterea etiam invisibili ac immortalis animâ regitur; cujus sanguis quoque non potest non aliter esse animatus, quam bruti. Hoc si ita est, uti revera est, quæ, amabo! ex beluini & humani sanguinis mistura speranda salus, quæ symmetria, quæ contemperatio? nonne potius in homine inde metuenda perniciofa alteratio, impetuosa ebullitio, aliâq; sexcenta exinde resultantia damna? de quibus infra speciatim; inexprabilem animarum confusionem, ut silentio hîc præteream. Nec dicam, quod omnis subita mutatio periculosa sit, quali Sanguinis Transfusionem non potest non sequi. Unicâ, non aliquoties reiteratâ, Transfusionem senium cedere, statuitur. Senectus autem quia non uno die invadit, sed lento gradu succedit, ideo etiam, si vel maxime fugari, aut saltem sisti posset, simul tamen & semel tolli nequiret; quemadmodum omnes chronici, aut illi morbi, qui lentè hominem atterunt, & diuturnitate magis, quam acutione excruciant, subito unicoq; remedio exturbari planè nesciunt, sed continuatum remediorum usum postulant; quicquid etiam inanes nonnulli Chymici oggerant, ignaræ plebi magnidicis verbis persuadentes,

tes, posse se unicâ tantum putatitiæ Panaceæ suæ dosi, ceu unico ictu, chronicum etiam quemvis morbum excindere ac prosternere; at quibus ego æquè difficulter credo, licet per omnes Deos Deasq; jurent ac dejerent.

Quid? quod ausim dicere, humanæ vitæ prolongationem non multo medicamento-
rum usu, multo minus generosiorum præsidiorum administratione, sed potissimum accuratâ Diætæ, & sub ea comprehensarum sex à Medicis sic dictarum Non-naturalium rerum observatione, impetrari. Hac enim, cæteris rectè se habentibus, flammæ vitalis perennationem, nativiq; temperamenti vigorem, à quo longævitas præcipuè dependet, sartum tectum servare omnium tutissimè licet. Sanitatem conservare, est à morbo tueri & vitam prolongare. Conservatur autem sanitas similibus, quæ diætâ suppeditat; non contrariis, quo nomine medicamenta veniunt. Et sic qui sanitatem suam conservat, à morbo immunem se præstat, omniq; alterantium medicamentorum, aliorumve præsidiorum fortiorum apparatu carere potest. Ergo Sanguinis è bruto in hominem Transfusio, ceu extremum remedium, meâ opinione, hominis vitam non prolongat.

Anne verò aliquos morbos curare potest? Morbum curare, non prorsus idem propriè est, quod vitam prolongare, licet aliquo sensu pro uno eodemq; accipi possit. Vitæ enim pro-

prolongatio etiam sine morbi curatione contingere potest. Hinc duo nata nobis sunt membra, quorum primum jam discussimus. Reliquum est, ut nunc quoque in alterum inquiramus. Hariolamur autem, neminem fore, qui pro aliis exturbandis p.n. affectibus Sanguinis Transfusionem cuipiam hominum administrare audeat, nisi illi sint graviores, penè desperati, & tales, de quibus constat, eos quibuscunque aliis in vulgus notis præsidiis domari non posse, vel plerorumque, si non omnium, vim jam elusisse. Nonne enim is cum ratione insaniret, qui morbum levem, nec adeo curatu difficilem insolito, ancipite, & periculoso, multisq; suspecto præsidio antè expugnare conaretur, quàm communia præmisisset. Aut quæ hæc temeritas esset, extremum principio statim illi morbo opponere remedium, quem mitia etiam medicamenta tollere possent? Omnia certè prius experiri decet, quàm ad extremum perveniatur remedium. Per mitia quod fieri potest, non debet fieri per vehementia. Ferrum & ignis id demum sanare debet, quod medicamentum non potest. Deinde necesse esse credimus, ut ægrotus ille, in quem bruti alicujus sanguinem transfundere animus est, viscera habeat *ἑυπλαγχνα*, & constantium adhuc, nec jam dum nimium exhaustarum sit virium, ne vel in ipsa Operatione deficiat, vel sub ea ceu innocens victima cadat.

His in antecessum fundamenti loco positis hypothesebus, ordine jam recensere juvabit illos morbus atque symptomata, pro quibus depellendis Sanguinis Transfusio vel vulgò commendari solet, vel jam ipso opere ab uno alterove adhibita est, ut constet, quid hoc ab experientia petitum tantiq; æstimatum ponderis habeat argumentum.

Corruptæ mentis homini, duplici vice, aliquot vitulini sanguinis unciz in brachii venam derivatæ sunt, & quidem, postquam ei multò plus proprii sanguinis ex eadem vena, pro consuetâ Artificii methodo, deductum esset; unde factum, ut homo ille, superatis maximam partem gravibus symptomatibus ex Operatione hac ortis, intemperie nempe calidâ, animi deliquio, acerbo renum dolore, vomitu, alvi fluxu, lassitudine, nigrae urinæ frequente excretionem, nariumq; hæmorrhagiâ, post tertium diem non modò melius habere, sed & ad sanio rem mentem rediisse visus fuerit. Sed quid porro contigit? Exacto himestri spatio febris misellum corripuit, & è medio sustulit, vel, ut alii suspicantur, subdolè propinatum venenum encavit. Quare decernere non licet, Transusine Sanguinis culpâ, an aliâ factorum inclementiâ obierit. Interea tamen, quicquid hujus sit, certum est, experimentum hoc tanti non esse momenti, ut quicquam eo probari possit, quod ad Transfusionis sanguinis stabilimen faciat. Etiam si enim concesserim, ipsum

ipsum transfusum vitulinum sanguinem homini vitam non eripuisse, tamen nullus dubito, asseverare, omnia enumerata symptomata inde unice pullulasse, tantaque fuisse, ut necemei inferre facile potuissent. Quis autem ab illa Operatione non abhorreat, quam tanta symptomatum enormitas sequi solet, cum vitæ etiam extremo discrimine stipatorum?

Enimverò si quisquam mortalium amentiam sive fatuitatem, mentisve stupiditatem humanâ arte tutò in homine eluere sciret, eò majorem is ab humano genere iniret gratiam, quò ipsa miserabilius malum est. At verò si idem amenti mentis sanitatem restituere satagens, eam symptomatum syndromen curatione suâ acceleraret, quæ ipsam internecionem minitarentur, nonne contra eò severius increpandus esset, quò gravius peccatum est, hominem in periculosum morbum, mortisq; periculum, temerario ausu, præcipitare? vel; nonne satius foret, ab illo præsidio penitus abstinere, à quo hæc metuenda sunt?

Insuper quæri hîc posset, an huic mente capto fatuitas nativa sive connata fuerit; an verò ex morbo, vel aliâ quâpiam causâ ei demum accesserit? Illud si dixerint, nihil agent suâ sanguinis Transfusionem. Quemadmodum enim naturæ vitia Ars corrigere nescit, ita etiam fatuitatis idealem à naturâ impressum characterem nec ulla medicina,

nec bruti alicujus transfusus sanguis obliterare atque delere poterit. Tota sanguinis massa immutanda, totaque hominis fabrica in aliam formam cogenda esset, ut alia quoque eaq; sanior resultet mentis bonitas; sed quod mihi æque impossibile videtur, ac impossibile est, dealbare corvum. Quod si verò ex morbo & post nativitatem alicunde ortum duxerit rationis depravatio, tunc sublato illo, ceu causâ, tolletur & hæc, ceu effectus. Ubi autem morbus, à quo rationis depravatio dependet, sollicitè excogitatis, & dextrè adhibitis ordinariis præsidiiis, ac selectis remediorum formulis curari nequiverit, ibi certè nec beluæ transfusus sanguis multum auxilii feret. Alteratione potissimum opus est, quam si consueta remedia præstare nescient, sanè nec bruti sanguis præstabit, quippe qui ipse non aliam, quam medicamenti alterantis vicem in hac Operatione sustinere debet. Jam verò quis dubitabit, dari medicamenta, quæ alterandi virtute brutorum sanguinem longè superent? Animationem enim brutorum sanguinis in hominem transfusi nemo desiderabit, veritus, ne anima bruti per sanguinem in homine similes actiones edat, quas edidit in bruto.

Nec inferre licet, præstò esse rerum testimonia, quibus luculenter probari possit, vitulinum sanguinem in hominem amentem transfusum sanam ei mentem restituisse. Unum enim hoc duntaxat exemplum est, quod

quod nondum sufficit. Multorum exemplorum inductio requiritur. Ad hæc quis scit, annon post bimestre spatium, quo integræ mentis usu polluisse vesanus ille visus est, pristina fatuitas, si longius produxisset vitam, rediisset? Taceo, quod adhuc sub iudice lis sit, an rationis redintegratio novo hoc præsidio revera ei contigerit? Cur enim, si ea reverâ inde contigit, de Transfusione tertium reiterandâ cogitatum est? Quid retinet, repetere præsidium, si prius fecit, quod debuit? Quid, si sanior tantum visus, re autem verâ æquè stultus homo ille fuisset, ac fuit olim? Certum est, quod, uti acutissimus ille ingeniorum scrutator, Barclajus, effert, plerique mortalium id faciliè credant, quod anxie sperant.

Alterum experimentum in juvene X VI. circiter annos nato factum est, qui, cum præter Lethargum aliis quoque gravissimis symptomatibus, ut, convulsionibus, vomitu, alviq; continuo fluxu, pancreatis item induratione, & gangrænosa intestinorum corruptione detentus, atque loquelâ, motuq; & sensu penè omni privatus, adeoq; effictim excruiatus, & ab aliis Medicis pro desperato habitus, extremo Transfusionis præsidio admissio, non nisi octo agnini sanguinis uncias recepisset, ecce! haud morâ non solum convulsionibus evanescere, vomitus cessavit, ventrisque profluvium exaruit; sed & ipse æger, adscito novo virium robore, ad-

stantes diversis linguis allocutus, & multò melius, quàm antè habere visus est. Efficax profectò argumentum! quo beluini sanguinis in hominem Transfusionis authoritas asseratur. In deploratis enim affectibus, quolibet ipse Lethargicus hic laboravit, iisq; , qui communia remedia maximam partem jam eluserunt, potissimùm adhibendam eam esse, si unquam adhibenda, paulò suprà supposuimus. Verùm enim verò narrationis clausulà iterum claudicat, quâ scilicet significatur, misellum hunc juvenem, alvi profluvio post breve X X I V. horarum spatium re-verlo, pauloq; antè nonnihil remissis, jam verò iterum auctis symptomatibus, occubuisse, vitamq; cum morte commutasse. Quare nec hoc experimentum multum in recessu habet, nec probat, beluinum in hominem traductum sanguinem contra Lethargum quicquam valere. Nam etsi, factâ Transfusionem, Lethargus illicò discussus, (fortassis magis illatâ per Operationem consternatione, quam novi præsidii ope) & quæcum comitata sunt symptomata, ex templo mitigata fuerint, nondum tamen biduo superato fortiori impetu rediêre, ipsamq; inter necionem accelerarunt. Quodnam verò hoc remedium, quod vix ad unum diem fraudulentè dolorem levat, ut postea omnes vitæ dies homini truculenter suffuretur? Dubito, an quisquam Christianorum sit, qui tale sibi optet remedium, ne dum pecuniâ redimat.

Haud

Haud quidem difficulter largior, Juvenem hunc tantâ lethalium symptomatum catervâ impetum, etiam si sine Sanguinis Transfusionem fuisset, tamen non potuisse evadere; attamen contra vicissim persuasissimum mihi habeo, agnium sanguinem neminem hominem à Lethargo aliove soporoso affectu liberare posse, etsi is tantis tamq; diris symptomatibus non sit stipatus. Lethargus cæteri q; soporosi affectus causam agnoscunt spirituum animalium in cerebro genitorum sufflamen, motumq; impeditum, aut conge-lationem fixationemve; quo fit, ut homo subinde dormituriat, vel in somnum propen-deat; unde etiam illa remedia optima hæc habentur, quæ spirituum animalium activitatem promovere, eos excitare, mobiliiores reddere, & exaltare apta nata sunt; quo nomine pleraque eorum se commendant, quæ tenuium ac spirituosarum sunt partium, vi-rumq; penetrantium, sive illa externè, sive internè adhibeantur. Jam ipsi Transfusionis Patroni judicent, num huic indicationi satisfacere possit agnus in Lethargicum derivatus sanguis? Nonne omnis Sanguinis Transfusio primariò tantam in mutatione & correctione sanguinis illius hominis, in quem bruti alicujus sanguis transfunditur, occupata est? Nonne sanguis bruti hæc tantum fini in infirmum hominem traducitur, ut, quemadmodum immediatè sanguini hominis affunditur, ita etiam immediatè eum

alteret ac emendet? In spiritum autem animale non nisi per sanguinem, & lentissimo demum circuitu agit; unde persuaderi nondumpatior, ut credam, illud levamen, quod Lethargicus ille mox post administratam Transfusionis Operationem ex transfuso agnino sanguine sensisse visus est, inde reverâ ei contigisse; quandoquidem, ut à beluino sanguine in venas hominis derivato spiritus animales alterentur simul ac corrigantur, multò longius temporis spatium requiritur, quàm quo hoc Lethargici levamentum ab agnino transfuso sanguine evenisse dicitur. Cur non, qui vult, ut immediatè ac subitò spiritus animales minus rectè se habentes emendentur, artem excogitat, quâ in cerebrum alicujus liquoris infusio immediatè fieri possit, ut spiritus animales momento quasi inde refocillentur. Sed quod iterum fortassis non minus ridiculum videbitur.

Imò etiamsi ponerem, Sanguinis Transfusionem hunc Juvenem à Lethargo liberasse, nondum tamen sequitur, propterea & nobis idem imitari licere, aut in hac minimum Lethargi specie Transfusionem locum habere. Non idem nobis imitari licet, quia funestus Operationis eventus, ipseque Juvenis obitus in simili morbo idem tentare nobis dissuadet. Nec in hac singulari tantum Lethargi specie locum habet Sanguinis Transfusio, etsi ortum duxerit à largiori sanguinis

nis profusione, cui maximè mederi potuisse aliùs sanguinis restitutionem fortassis videri possit. Nam quia brevissimas has inducias, quas Juvenis infirmus à Lethargo habuit, mox alia, eaq; lethalia exceperunt symptomata, ideo nec in hac Lethargi specie, nec in alia quacunq;, ex rationibus paulò suprà adductis, Sanguinis è bruto in hominem Transfusio tutò adhiberi posse videtur.

In Phthisicum unum, alterumq; febre quotidianâ, & adhuc alium tertianâ duplici, affectum, è trium vervecum arteriis sanguinem, Transfusoriæ Artis lege, elutriavit Joan. Guilielm. Riva, satis peritus aliàs apud Romanos Chirurgus, idq; eâ felicitate, si Diis placet, ut bini priores paulò post extremum vitæ diem morte confecerint, solusq; postremus incolumis evaserit; veluti ex Testimonio anno 1667. Mens. Decembr. typis excuso, præcipuorumq; Medicinæ Professorum subscriptione confirmato, & ea propter ipsi dato videre est. Hoc Testimonium cum primùm in Italia legissem, tantum non risum mihi excussit. Ecquod enim hoc pro Transfusione Sanguinis Testimonium? Tale ego contra eam producere non erubescerem. Vix enim potentiori argumento uti possem, quàm si ostenderem, infausto successu celebratam eam esse. Duo conciderunt, unusq; solus eluctatus est, isq; ipse, quem mitiora etiam remedia facili procul dubio negotio salvare potuissent. Nonne hoc est experi-

menta per mortes facere? Phthificus obiit: morbine vehementiâ, an Transfusi sanguinis culpâ, in allegato Testimonio conceptis quidem verbis non exprimitur; non tamen vana suspicio est, Operationem hanc ægrotantis vires jam tum morbi vi valde attritas adeo exhaustisse, ut non potuerit non animæ & corporis separatio citiùs contingere, quàm si Operatio hæc omissa fuisset; id quod ut faciliùs credam, inter cætera id quoque maximè facit, quòd in Testimonio legatur, Phthificum paulò post Transfusionem Sanguinis mortuum esse. Equidem phthisis vera atque perfecta talis morbus est, quem nemo facile curabit; unde ambabus manibus concedo, solam Sanguinis Transfusionem suo gladio Phthificum illum non quidem jugulasse, interim tamen certò credo; illam mihi sero à statuo vitæ termino aliquot dies abrupuisse, eique compendiosorem ad Elysios campos viam pandisse. Præterea ut phthisis ob has potissimum rationes celebratissimis etiam remediis haud rarò cedere recusat, primò, quia medicaminum vires integræ ad pulmones non descendunt, sed antequam eo pertingant, maximam partem evanescent; & deinde quia exulcerati pulmones continuè moventur, hocq; motu à consolidatione impediuntur; ita ob easdem rationes bruti alicujus sanguis in phthificum frustra transfundetur, vitiumq; in pulmonibus radicaliter hærens eluere nesciet.

Febris

Febris quotidiana non quidem curatu adeo facilis, raro tamen impossibilis, multò minùs prorsus lethalis est. Iccirco non videtur, opus esse, Sanguinis Transfusionem, ceu præsidium anceps, extremum & periculo plenissimum, pro arcendâ hujus farinæ febre, in usum adsciscere, quippe quam mitioribus etiam, non nudiùs demum tertius inventis, sed ex vulgato triplici fonte haustis, debitoq; ordine ac modo usurpatis, abigere licet. Nec dubium est, hunc ipsum hominem à quotidiana febre, quâ laboravit, multò jucundiùs, citiùsq; liberari potuisse, nisi Transfusio Sanguinis intempestivè & perperam instituta omnem curationis spem ita ademisset, ut postea non ampliùs de eo curando, sed tempori sepeliendo, quò Operationis hujus Authoris errores terrategat, cogitare necesse fuerit. Unde quid commodi novum hoc Inventum hîc præstiterit, quidve pro eo defendendo hoc exemplum valeat, ego certè non video.

Tantò ergo plus tertium valebit exemplum, quod de febre tertianâ duplici Transfusi vervecini Sanguinis ope curatâ attestatur. In hoc inquiremus breviter. Tertiana duplex febris raro adeo periculosa est, ut continuatum huc facientium communium remediorum usum eludat, nec adeo chronica esse solet, ut Medicus ordinariæ curationis methodi pertæsus, hâc saltu quasi superatâ, mox ad insolita, ancipitia & extrema præ-

præsidia transire debeat. Unde temeritatis notam non effugiet, quisquis febrem tertianam duplicem Sanguinis Transfusione solvere conatur; inq; eâ opinione sum, illum ipsum, qui eâ laboravit, æquè feliciter convalescere potuisse, etiamsi Sanguinis Transfusio non fuisset administrata. Quid ergo eâ opus fuit? aut quid eâ præstitum? Sic dici non potest: Transfusionis Sanguinis beneficio curatum esse febrem tertianâ duplici afflicto; quandoquidem etiam sine ea ad pristinum sanitatis statum dubio procul reduci potuisset. Et quis fidem suam interponere audebit, eandem morbi speciem postea non rediisse? nec aliud, idq; fortassis longè majus, incommodum, si non paulò post, tractu tamen temporis, successisse? Nam etiamsi nulla hujus in citato Testimonio fiat mentio, quid tamen obstat, quo minus suspicemur, post datum demum Testimonium damna, Transfusionis Operationem excipere plerunque solita, hîc quoque secuta esse? Riva certè, non dubito, quin omni studio ea retineat, & ne in Testimonio nominentur, aut publica fiant, sollicitè præcaverit, quod è tribus factis experimentis, unico minimum felici, si non aliud, saltem hoc probatum ire posset, celebratam à se triplicem Transfusionem uni non nocuisse.

Præter has jam enarratas rationes, etiam ob hanc causam neque in hac, neque in illa, neque in ulla alia quacunque febre, si dicen-

dum,

dum, quod res est, convenire videtur Sanguinis Transfusio. Sicut enim unica vini boni mensura vini fermentantis & ad corruptionem vergentis amphoram placare, corrigere, inque integrum restituere nequit; ita nec beluini sanguinis aliquot unciae sanguineam hominis massam præter naturaliter effervescentem (est enim febris omnis in genere nihil aliud, quam p. n. sanguinis effervescencia) demulcere, & ad naturalem statum reducere valebunt. Non desunt nobis alterantia medicamenta, quibus hanc sanguinis effervescenciam compescere licet, quam, tantum abest, ut bruti alicujus in hominis venas derivatus adhuc calens sanguis mitigare ac coercere posse, ut potius eam multò magis aucturus, &, ceu novum fermentum, vehementius demum excitaturus videatur. Habemus etiam mitiora simul ac tutiora Chirurgica præsidia, quibus sanguinis imminutionem, quâ in febribus sæpe sæpius, additione autem nunquam, opus est, impetrare possumus. Et in malignis febribus omne penè curationis ferunt punctum alexipharmaca, inter quæ vituli, agni, aliusve bruti sanguinem nemo sanus referre audebit. Ut adeo nullâ prorsus ratione Sanguinis Transfusio in febribus locum habere videatur.

Tandem quod illam Transfusionem attinet, quâ sanguis agninus in venas duorum virorum integrâ sanitate gavissorum, Artifici

ficii hujus lege, traductus est, non majoris illa momenti habetur, quàm illa, quæ à quibusdam à bruto in brutum facta est; quam quemadmodum ideo à nostra Andromache removimus, quia Medicus non versatur circa brutum, sed circa hominem vel sanitatem præditum, vel morbis obnoxium, (qui unice Medicinæ subiectum constituit;) ita illam Transfusionis speciem, quâ bruti sanguis in optimè se habentem, deq; nullâ præter naturali affectione conquerentem derivatur, hanc ob causam hîc loci non attendimus, quia non fit propter finem, quem hac Operatione ii consequi aliàs studuerunt, qui eam primitus invenerunt. Finis autem novi hujus Inventi præcipuus est sanitatis restitutio, seu morbi curatio, quâ ubi opus non est, frustra quoque ipsum præsidium administratur. Itaque hæc Sanguinis Transfusio curiositatis tantum gratiâ celebrata est, nullumq; habuit usum, nisi fortassis illum, ut inde ejus possibilitas duntaxat evinceretur. Verum quid juvat, speciosis aliquot experimentis demonstrasse, quàm facili negotio hæc, vel illa res perfici possit, si ejus interea usus opere ipso nullus prorsus deprehendatur?

Nolo scrupulosius controverti, an possibilis sit, nec ne, Transfusionis Operatio? Largiar, sine magno apparatu, sineque multo labore fieri eam posse, tantisque difficultatibus non obnoxiam esse, ut eas propter intermitteri debeat, maxime, si is, qui Opus molitur,

tur, manuum dexteritate polleat, &, antequam eam aggrediatur, circumspiciat opera omnia obstacula, haud rarò intervenire solita, declinare studuerit. (Ut ut alias non ignotum sit, quoties in hac similiq; Arte probè etiam versati nunc ab hac, nunc ab illa remorà præpediti medio in opere abrumperè coacti fuerint.) Ast hoc nondum satis est; etiam prodesse debet novum Inventum, suumq; habere usum, quo sine ne hili quidem illud æstimandum. His addo, non mirum esse, quod duobus robustis his Viris ex transfuso agnino sanguine nullum damnum enatum fuerit; id quod non nisi inde dubio procul factum, quia hominum illorum optimâ valetudine præditorum flamma vitalis tam potens atque activa fuit, ut agninum, ceu minus potentem, & fortassis etiam parcius transfusum sanguinem faciliè subjugare, in sui naturam sine ingenti discrimine convertere, infringere, & prohibere potuerit, ne in humanis illis corporibus se explicaret, inq; ea severius ageret. Ut proinde ex hoc experimento nondum inferre liceat, Sanguinis Transfusionem omni prorsus vacare periculo. Nam quemadmodum noxium aliquod pharmacum ab hoc vel illo sine notabili noxa quandoque sumi solet, quod tamen, si ab alio imbecillioris naturæ malèq; disposito ingurgitaretur, non leve etiam vitæ discrimen accelerare ei posset; sic fieri potuit, ut hi duo in venas suas deri-

derivatum agnimum sanguinem innoxie quidem tulerint, quem tamen alius quispiam, & potissimum morbo aliquo jam affectus, sine detrimento perferre non potuisset, Idcirco quia nullum commodum in hoc bonâ valetudine prædicatorum hominum par ex Transfuso beluino sanguine redundavit, ideo nec hoc experimento, etiamsi non infelici, concluditur id, quod concludendum merito esset.

Atque hæc illa sunt experimenta, quæ circa Transfusionem Sanguinis è bruto in hominem, pro debellandis variis morbis, celebratam facta hinc inde literis consignata hætenus reperire licuit; à quorum instituto usque huc examine nunc delabimur ad illorum præternaturalium corporis humani affectuum ventilationem, qui, ejusdem Artificii ope, non minùs tolli posse, à quibusdam dicuntur.

Primum experietur examen Lepra & Elephantiasis. Hæc ubi hominem adoriri demum cœpit, dubiæ est curationis, & vix ac ne vix quidem in vulgus notis remediis extirpari potest; & illa, quæ altiores jam egit radices, omnium Medicorum consensu, prorsus immedicabilis habetur. Tantò igitur ardentius optandum esset, ut novum excogitaretur præsidium, quo exitialis hæc abes averruncari queat; id quod Sanguinis Transfusionem præstare posse nonnulli haud inglorii alii Medici arbitrantur. Verum

rūm enim verò si & hīc dicere licet, quod libet, non minus vereor, ne in hoc quoque casu nova hæc Operatio inutilis simul ac intuta futura sit. Siquidem Lepra cum peculiarī, specificā, suiq; generis malignitate conjuncta est, quā tota sanguinis massa, omniaq; propemodum viscera, cum primis verò nutritioni dicata, imbuuntur. Hanc itaque prævaricationem corrigere non licet, nisi totus totius sanguineæ massæ præcipuorumque viscerum vitiosus habitus immutetur ac emendetur; sed quod uti vix ullius medicamenti continua etiam atque diligens adhibitio efficere potest; ita multò minùs potest unica bruti alicujus sanguinis in venam Leprosi facta infusio. Nam etiamsi plures uncix, imò & libræ, beluini sanguinis transfunderentur, tamen is à Leprosi corrupto sanguine, cum quo permisceretur, in sui naturam mox verteretur, similiterq; corrumpere; haud multò aliter, ac acescere solet quicquid in dolium, quod acidum vinum prius continuit, infunditur. Nempe enim

*quæ semel est imbuta recens, servabit odorem,
testa, diu* — — — — —

Hoc si ita est, næ ! irritus erit Omnis labor illius, qui hanc Operationem, pro curandā Leprā, suscepit. At si omnis omnino sanguis ex venis Leprosi educeretur, eo consilio, ut tantundem beluini sanguinis contrā substitui posset, atque adeo Leprosus nullo
C alio,

alio, quàm beluino sanguine noviter infuso deinceps gauderet, nonne verendum esset, ne Leprosus deficeret atque interiret, antequam bruti sanguinem loco sui emissi recepisset, sibiq; ac suæ naturæ proprium reddidisset? Sanguinem enim Leprosi omnem mittere, ac tantundem bruti alicujus transfundere, simul & semel unâq; operâ fieri nequit; unde medio temporis spatio impossibile videtur, Leprosum ita reficere, ne animam unâ cum sanguine suo amittat. Taceo alia pericula hîc metuenda, etiamsi emissio humani, & infusio beluini sanguinis momentaneo quasi eodemq; temporis articulo vel maxime fieri posset, quorum mentionem jam supra aliquantò fecimus, & faciemus suo loco explicatiùs infra. Taceo etiam, quòd, ut Lepra non citò, sed lentè fit, sic quoque non cito, quale Transfusio est, sed lentè operantibus remediis continuatoq; eorum usu assultanda sit, aliàs plerunque inexpugnabilis.

Idem ferè judicium ferendum de Lue Venerea, quam itidem Transfusoriæ Artis ope nonnulli ejus Patroni curare audent. At enim verò præter jam adducta, hucq; contra hunc pro dictæ Luis curatione speratum usum facientia argumenta, hoc quoque non aspernandum videtur, quòd Morbus Gallicus recens adhuc atque liber à gravioribus symptomatibus non nisi appropriata sua & multo usu experta remedia, non autem brutorum

torum sanguinem, qui tali virtute anti-venereâ minimè gaudet, postulet; horum quippe vi haud adeo difficulter pellendus. Inveteratus verò, & qui jam varias exulcerationes, gummata, tumores, exostoses, &, nescio quos alios externos peperit affectus, curationis rationem exigit, quæ ad dicta symptomata potissimum dirigatur, non tam internis, quam externis localibus remediis oppugnanda; quando morbum ipsum canonicis etiam remediis, ne dum incognito hoc, atque in his similibusq; casibus dubio præsidio funditus eradicare non licet.

Sic nec in Cancro, nec in Erysipelate, nec in aliis Ulceribus (nam & adversus hæc novum hoc commendatur Inventum) ex eadem ratione locum habere potest beluini Sanguinis in hominem Transfusio. Externis sive localibus potissimum opus hîc est, nullis autem internis, exceptis quibusdam purificantibus in Cancro & Ulceribus malignis, nec non calorem hepatis sanguinisq; temperantibus, & diaphoresin blandè promoventibus, in Erysipelate. Atqui Transfusionem ego quidem ad interna, quam externa præsidia referre malle, quia sanguis beluinus, qui in hominem derivatur, ab eo intra corpus assumitur, inq; hominis sanguinem intra venas atque arterias fluctuantem unice agere dicitur. Quis ergo non videt, vanos illos quoque esse, qui Ulceribus nominatis Sanguinis Transfusionem mederi posse

jaſtitant? Alias rationes, quas aliunde huc trahere poſſem, ejusdem medicinæ uſum in his atque ſimilibus externis affectibus non minus diſſuadentes, ſilentio ut præteream.

In Variolis, nec non Pleuritide, impenſè mirari ſubit, quosdam eo vecordiæ perveniſſe, ut ſeriò exiſtimarint, Transfuſionem Sanguinis commodè adminiſtrari poſſe. Illæ tenellam ætatem plerunque adoriuntur, quæ uti Venæſectionem ob nimiam inde metuendam virium ſolutionem non facilè tolerat; ita multò minùs hanc, ceu vehementiorem Operationem tolerabit, cui nimirum ferendæ prorsus impar videtur, maximè, Variolis infeſtata; quibus apparentibus ſanguinis miſſionem etiam in adultis, ne dum in pueris nunquam non ſatiùs eſt intermittere, quàm celebrare; ut ut ſanguinem in iis ebullientem non nihil compescere (compescere autem & Venæſectio aliàs ſolet) non poſtrema Medici ſit cura. At ſanguinem ex ebullitione in cute, Variolarum formâ, effloſcentem per additionem augere, vi contrariorum, nulla prorsus ſuadet indicatio. Auget autem Sanguis Transfuſus, non imminuit, nec coercescēt offerveſcentem in homine ſanguinem. Suâ proinde ſluit ſponte, conſultiùs omnino eſſe, in Variolis, ſive recentes adhuc ſint, ſive jam maturatæ, hætenus conſuetis uti remediis, tritaq; incedere viâ, quàm ad novum hoc Artificium cum ancipitis eventus metu temerè pro-
perare,

perare, sicq; de corio hominis ludere.

In Pleuritide verò omnibusq; Inflammationibus internis Venæsectio non suadetur, sed plerunque imperatur. Jam ubi Venæsectio, atque adeo sanguinis imminutio locum habet, ibi ejus contrarium, id est, augmentatio sive sanguinis multiplicatio exulare utique debet. Quid autem aliud Transfusionem intenditur, quam vel augere, vel alterare sanguinem? Auctionis ergo ratione Sanguinis Transfusio in Pleuritide adhiberi nequit; & si alterare sanguinem animus fuerit, alterabunt eum longè potentiùs medicamenta à Practicis hinc inde commendata, jamq; experta, quam sanguis bruti alicujus adhuc calens in venam Pleuritici traductus.

Contra in insignibus Hæmorrhagiis sive narium, sive uteri, sive vulnerum, sive demum aliis quibuscunq;, non tam alteratione, quam citissimâ sanguinis restitutione opus est; unde in iis ad Transfusionem Sanguinis, ceu ad sacram anchoram, omnibus aliis incassum tentatis remediis, quidam ejus Vindices currere præcipiunt, quò in profusi & adhuc effluentis sanguinis vicem, sine morâ, alius, si non hominis, saltem bruti alicujus sanguis surrogetur, ne cum ultimo sanguinis flumine ipsa quoque anima tandem secedat. Hic duplicem imprimis curationis scopum præfixum habere sibi debet rationalis Medicus, ut scilicet vel primò sangui-

nem aerem, ichorosum, tenuem, tumultuantem, ac inordinate effervescentem, (à quo pleræque hæmorrhagiæ ortum trahunt,) convenientibus medicamentis edulcoret, incrasset, demulceat atque figat, siue præcipitet; vel secundo subito auxilio sanguinem refarciat, ut vires jam labascentes conserventur. Primo scopo Transfusionis Sanguinis ope satisfieri posse, nemo facile affirmare audebit. Alter autem scopus vix felicius quam hæc ipsa noviter inventa Operatione impetrari posse videtur, quâ scilicet bruti alicujus sanguis in venas hominis hæmorrhagiam patientis immediate & sine longâ morâ derivetur. Sed videtur. Ne enim quid dicam de novo tumultu, novoq; immoderatiore motu, quem bruti sanguis humano sanguini noviter admixtus, ceu heterogeneus, in homine adhuc magis sine dubio cieret; quid, quæso, prodesset, licet alius sanguis loco ejus, qui jam ex venis hominis emanavit, infunderetur, si ipse quoque beluinus sanguis recens demum hæmorrhagiâ laboranti infusus per easdem siue narium, siue uteri, siue vulneris alicujus dehiscentes venas efflueret? quod futurum certò crederem, nisi illa rimula, ex qua humanus sanguis prorupit, prius obstiparetur. At si obstipare eam jam potes, cur non obstipasti antè, quàm tantum sanguinis ex vena hominis exivit, ut Transfusione Sanguinis supersedere potuisses? Quod si verò nec jam
obstipare

obstipare rimulam illam licet, effluet per eam, ut dixi, etiam is beluinus cruor, qui recens demum infusus est, sicq; rediret inanis labor actus in orbem. Dicis: non prius deveniendum esse ad Transfusionis præsidium, quam plurima pars sanguinis per Hæmorrhagiam jam profusa videbitur, tuncq; demum convenire, beluinum sanguinem substituere, ceu talem, qui crassior sit, quam fuit ille humanus jam jam egressus, adeoq; tenuia sanguinis vascula tam facile penetrare, exedere, reserare atque hæmorrhagiam excitare nequeat. Verum ut taceam, esse, qui non sine ratione adhuc dubitant, utrum brutorum sanguis crassior sit, quam hominum? (quam tamen litem nunc meam facere nolo) omnium minimè administranda videtur nova hæc Operatio, quando plurimam sanguinis sui partem per Hæmorrhagiam homo jam amisit, eò quòd tunc homo viribus admodum exhaustus animoq; subinde linquere solitus, tam vehementem Operationem non ampliùs sustenturus sit; aut, si vel maximè sustineret, verendum esset, ne obbrutesceret, ob rationes infra prolixius deducendas.

Rabies seu Hydrophobia, quæ homo correptus ob venenatum à rabido animali, sive morfu, sive salivâ, ipsi illatum atque impressum fermentum, incenso quasi sanguine & spiritibus, peculiari ac specifico modo deliratur, duplicem imprimis curandi rationem

postulare videtur ; nimirum, vel, ut à rabido bruto in hominem transmissum malignum fermentum mox extrahatur, aut specifico-
rum diaphoreticorum beneficio per ambi-
tum corporis expellatur ; vel ut idem appro-
priatis alterantibus funditus subigatur,
enecetur, suffocetur quasi, ac annihiletur.
Neutrum Transfusio præstat. Non illud, quia
non id agit, ut extrahat aliquid, aut elimi-
net è corpore humano, sed potius addit seu
apponit aliquid, nempe sanguinem belui-
num. Nec alterando subigit rabidum in ho-
mine vicens fermentum. Non enim tanta
beluino sanguini alterandi vis inest. Appro-
priatâ facultate pollere oportet ea medica-
mina, quæ hîc prodesse debent, qualem nul-
lius certè bruti sanguis possidet ; unde ite-
rum vereor, ne oleum & operam perditurus,
ne dicam, graviolem adhuc noxam rabido
homini illaturus sit, qui bruti alicujus san-
guinem, Transfusionis methodo, in eum deri-
vare audebit. Confer, hucq; trahe quæ dixi-
mus jam supra hinc & hinc, præcipuè verò
ad illud circa corruptæ mentis hominem
factum experimentum.

Postremò ut colophonem huic Capiti impo-
namus, laudatur etiam hæc Sanguinis Trans-
fusio contra truculentum illum morbum, qui
communiter Epilepsia dicitur, quæ ut cæte-
ris remediis raro cedit ; ita omnibus votis
optandum esset, ut aliquando excogitaretur
tutum præsidium, quod ei perdomandæ par-
esse

esse possit. Sed quod toties veritus sum, id iterum atque iterum vereor, ne scilicet & hîc frustra sint, quicunque hoc nomine Sanguinis è bruto in hominem instituendam Transfusionem jactitant. Nondum hoc in casu factum ullum est felix experimentum circa hanc Operationem; nec suadet ratio, fieri posse, qualem paulò supra contra Lethargum & alibi jam dedimus, hîc suo modo applicandam. Ad hæc denuo repetimus, quod semel dixisse, non satis est: quod tot decantatissima ant-epileptica non possunt, id multò minùs poterit sanguis beluinus, ceu illis, quoad alterandi, sanguinemq; aliquo modo peccantem corrigendi virtutem, multò inferior, nullâq; ant-epilepticâ facultate pollens.

Paucis, ut plura complectar: Omnes affectus, p. n. corporis humani, ad quos debellandos Transfusio Sanguinis hætenus facere credita est, vel sunt leviores, minùsq; periculosi, hoc est, cum tanto à statu suo naturali massæ sanguineæ recessu, & plerorumque viscerum corruptione nondum conjuncti; (& tunc consuetis jamq; notis & appropriatis remediis uti, quàm anceps hoc, periculo plenum, ac novum Præsidium in usum adsciscere, utique satius erit:) vel sunt graviores, admodum periculosi ac lethales, id est, cum totius massæ sanguineæ partiumq; principalium habituali dyscrasia ac corruptione sociati, atque tales, qui re-

C s

liqua

liqua communia, selectissima tamen & methodicè adhibita pleraque remedia jam eluferunt; quo in casu iterum inutilem deputarem Sanguinis Transfusionem, cum quia vilcera non amplius sunt *εὐσπλαγχνά*, (quod tamen necessariò requirimus) tum etiam quia flamma vitalis ferè tantummodò gliscit, hincq; natura à morbi vehementia jam antè adeo oppressa est, ut verendum sit, ne coadjuvare nescia, in ipsa Operatione succubitura, & infirmus, dum insuper vena ab integumentis suis liberatur, vel saltem, ut in Venæsectione fieri solet, ligatur, inciditur, & sanguinis portio extrahitur, præ dolore aliisq; inde metuendis symptomatibus adhuc in deterius ruiturus & fortassis etiam exspiraturus sit. Vel tandem medio quidem modo se habent morbi, sed ejus commatis sunt, ut à beluino sanguine emendari atque expelli nequaquam valeant; veluti jam supra satis superq; ostensum puto.

CAP. IV.

Quatuor secundarii usus examinantur & rejiciuntur.

Postquam generalem sive primarium, eumq; duplicem Transfusionis Sanguinis usum, in vitæ prolongatione, & morborum curatione, consistentem usque huc ventilavimus, atque ceu inanem non adco inanibus fortassis argumentis reprobavimus

vimus; reliquum nunc est, ut ad secundarios etiam usus descendamus, similiter visuri, quid hi in recessu, quantumq; ponderis habeant.

Nonnunquam fit, ut Ventriculus malè affectus cibum per os ingestum rectè concoquere, digerere, ejusq; puriorem partem in chylum convertere nequeat; quo fit, ut nec chylus, uti decet, in venas tenuibus intestinis adhærentes protrudatur, nec cum sanguine in Corde permisceatur; unde consequenter nec vigor corporis conservatur; nec ejus partes subinde depasci solitæ novo nutrimento, quod omnes desiderant, reficiuntur; quo in casu Transfusionem Sanguinis ejus Assertores mirificè extollunt, rati, ejus beneficio longè compendiosiori viâ bruti alicujus sanguineum ceu rectissimè coctum & optimæ notæ liquorem venæ ægrotantis immediatè instillari posset, adeo, ut Ventriculi intestinorumq; malè se habentium chylicandi officio ne quidem opus habeamus, maxime, cum inter alimenta ore delibanda, nullum penè sit, quod cum puris probisq; portionibus non etiam impuras suas particulas foveat, Ventriculo intestinisq; incommodare solitas. Speciosissimè, per fidem! excogitatus & non contemnendus usus, si cum Transfusio Sanguinis beluini reverà præstare posset.

Jam supra monuimus; hoc Præsidium, si unquam locum haberet, non nisi in extremis morbis

morbis habere posse. Illud itaque Ventriculi
intestinatorumq; vitium, quod fingitur, per-
magnum esse oportet, atque tale, de quo ne
quidem spes reliqua est, fore, ut id mitiori-
bus iisq; communibus remediis, sive internis,
sive externis, emendari possit. Sit autem
quodcunque sit; sit aliis auxiliis prorsus
indomabile; sit vulnus, ulcus, tumor, in-
flammatiō, intemperies p. n. quæcunque, sit
anorexia, sit vomitus continuus, deglutitio
læsa, præfocatio, sit aliud gravius malum,
quo Ventriculus intestinaq; ab officio suo
penitus dejiciuntur, ita, ut appetitus inde
omnino prosteratur, concoctio nulla fiat,
digestio nulla. Hoc, inquam, ponam. Atqui
si Tu Transfusionem tali in casu, quo Ven-
triculus, intestinaq; munere suo fungi-
nesciunt, in usum adscisceres, hâc opinio-
ne, ut ejus beneficio æger beluino sanguine
in ejus venas proximè infuso nihilominus
nutriatur, ejusq; corpus sartum tectum con-
servetur, necesse esset, ut hanc Operatio-
nem quotidie ad minimum semel repeteres.
Quemadmodum enim nos communiter bis
in die cibum sumere solemus; sic toties quo-
que, vel certè semel singulis diebus sanguis
bruti in hominem derivandus; siquidem hac
Sanguinis Transfusionē eundem consequi
finem, propter quem Ventriculo quotidie ci-
bum obtrudere consuescimus, id est, corpus
nostrum reficere, simul ac nutrire, velimus.
Etenim quamvis sat magnam sanguinis inte-
gerrimi

gerrimi quantitatem unâ vice infunderes, tamen, nî idem indies repeteres, nihil ageres; ratio in promptu est, nempe quia flamma vitalis sive calidum nativum nunquam otatur, sed continuè depascit & absumit, vel, ut Hippocratis verbis efferam, quia idem calor interficit, qui corpora produxit; hincq; brevi temporis spatio consumeret omnem illam sanguinis quantitatem, quam primùm infunderas. Quare his sic se habentibus, Transfusio vel inutilis, & pro alimento jam jam cocto, id est, beluino jam præparato sanguine in venam infirmi sufficienter derivando impar est, vel crebrius & penè indies iterari debet. At verò si toties eam repeteres, quoties homo per os alimentum assumere amat, nonne crudelius hoc tuo remedio hominem torqueres, quàm vel acerbissimus morbus excruciare eum posset?

Accedit, quòd beluinus sanguis hominis venæ infusus ejus partibus nutriendis prorsus inidoneus videatur, idq; præcipuè cum ob diversitatem, quæ inter flammam vitalem sanguini adhærentem hominis atque bruti intercedit, tum etiam quia omne id, quod animali in nutrimentum cedere debet, necessario prius in ejus Ventriculo intestinisq; in chylum excoqui, digeri, ac ita præparari debere videatur, ut ejus partibus nutriendis hac, quam interea necit, morâ, familiarius reddatur, ne, si focus fieret, disconveniens & subita, quæ plerunque periculosa est, inde oriatur

oriatur mutatio. Quo responso simul etiam illi assertioni satisfieri putamus, quâ nobis persuadere non nemo conatur, quòd sanguificatio in vasis alterius cujusdam animalis facta, eam admodum sit adjutura, quæ sit in sanguifluis vasis illius hominis, in quem sanguis alienus transfusus est; haud secus, ac proba exterior culinaris ciborum coctio eorum in Ventriculo hominis necessariam in chylum conversionem ac digestionem plurimum facilitare & promovere soleat. Tantum enim abest, ut sanguis bruti recens in venam hominis transfusus in eo sanguificationem promoturus, ut potius oppido impediturus ac turbaturus sit, prout id infra declarabitur explicatiùs.

Ad hæc, quis nescit, quantum discriminis intersit inter medicamentum & alimentum? Quis nescit, medicamentum alterare; alimentum verò tantum nutrire? Idcirco quoniam sanguis bruti in venam hominis recens transfusus nonimenti, sed medicamenti respectum habet, uti ex jam supra dictis constat; hinc suâ sponte fluit, beluinum in hominem, Transfusionis lege, derivatum sanguinem humanis partibus nutriendis neyquam aptum esse; alias plures, quæ adduci possent, rationes, ut silentio præteream.

Quid? quod ipse Deus, sapientissimus Artifex, imprudentiæ (horreo dicere!) hac ratione argueretur, ac si is, dum cruda sæpe adhuc, minus pura, & nondum præparata

alimen-

alimenta per os assumimus, dehinc in debilem Ventriculum demum atque intestina detrudenda, longiorem viam, donec ad sanguinem, ejusq; focus, Cor, pertingant, & partibus nutriendis apponantur, monstrasset, cum longè compendiosiori hodie uti viâ, & Ventriculi officio carere nobis liceat, illâ nempe ipsâ viâ, quâ noviter inventæ Transfusoriæ hujus Artis ope alimentum jam coctum, purum, & ritè elaboratum, quale sanguis beluinus fingitur, citra tantas ambages venæ hominis infundi queat, in nutrimentum partium proximè cessurum. Verum enim verò ut Is, qui omnia rectè fecit, nihil temerè, nihil sine prudentissimo consilio fecit; ita etiam hanc tritissimam viam, quâ Idem omnia animantia cibum pro nutritione ac conservatione corporis sui, naturâ duce, capere voluit, rectissimam optimamq; esse, quoquo etiam modo Ventriculo affecto, nemo non pius divini Numinis operum æstimator, nemo non sanus facillimè agnosceret. Brevior quidem, fatendum, hæc Transfusionis via est, sed violenta, nec securior, neque naturæ convenientior; idemq; videtur, ac si quis è tertia domus contignatione per scalas descendere pertæsus, quò viam abbreviaret, sine gravi causâ per fenestram se præcipitare vellet. Videat itaque, qui aliquo Stomachi vitio laboranti, communem medendi methodum præteriens, hanc novam, beluinum sanguinem transfundendi, Artem

Artem suadet, ne simile ei damnum acceleret, quod ille incurrit, qui gradatim descendere nolens, ex fenestra se dat præcipitem.

Hoc quidem verum est, vix quicquam edulium aut potabilium rerum esse, quod non impurioribus portionibus pluribus, paucioribusve inquinatum sit. At quid tum? Parata sunt emunctoria, & quidem hunc ipsum in finem, ut pereat, quod impurius est, & corpori nutriendo minus aptum, eliminetur; hinc fæces alvinæ, hinc urina, hinc sudor, quibus ritè suis locis sequestratis, sanguis æquè evadit purus, ac si purissimum alimentum venæ hominis immediatè instillaretur. Frustra ergo emunctoria hæc fecisset natura, quæ tamen nihil facit frustra, si id, quo nos vesci solemus, omnis omninò impuritatis immune esset, aut purissimum alimentum, posthabitis Ventriculo ac intestinis, venæ alicui hominis proximè immitti posset.

Deinde novi hujus Inventi hic esse usus dicitur, ut, dum venâ sectâ corruptus sanguis educitur, indeq; , ut plerunque contingere solet, vires hominis fatiscunt, variis haud rarò succedentibus morbis, illæ novi ac laudabilis sanguinis restitutione, quam Transfusio præstare putatur, recuperentur resarcianturq;. Quis verò cordatus Medicus ideo venæsectionem imperat, ut sanguis corruptus ac vitiosus per sectam venam extrahatur? Non certè is venæsectionis usus seu scopus est, qui, si nescis, in hoc potissimum

con-

consistit, ut eâ sanguis abundans imminuatur. Sic indicans, hoc est, sanguinis abundantia, & indicatum, nempe sanguinis imminutio, quæ venæsectione primariò intenditur, contrarietatis ratione ritè invicem respondent. Sanguis autem corruptus vel corrigentia postulat, vel, ubi corrigi nequit, eliminari debet, non quidem per venam sectam, sed per alvum, urinam, poros cutis, aliâq; humani corporis parata emunctoria. Nunquam enim capere potui, quî fieri possit, ut, sectâ venâ, solus corruptus sanguis effluat? Quin seriò hætenus credidi, talem reverâ effluere sanguinem, qualis in venis præstò est, sive is sit corruptus, sive integer probæq; notæ. Corruptus solus si profiliret, singularem quandam intelligentiam subesse oporteret, quæ vitiosum sanguinem per medium bonum educeret; sed quod inane cerebri figmentum nemo sani cerebri facilè admittet; cum ejus rei modum, quo fiat, ne ratione quidem assequi liceat. Imò si dicendum, quod res est, ille potius sanguis per inflictam venæ plagulam nunquam non prodire videtur, qui reliquum activitate, integritate, motuq; superat; vel saltem, qui rimulæ in vena à Chirurgo factæ proximè adsit. Peccat igitur & graviter peccat, quicumque pro sanguinis corruptione emendandâ venæsectionem in usum adsciscit, nullumq; est mirum, si sinistram sanguinis missionis adhibitionem virium debilitas excipiat; quæ ipsa

D

malè

male usurpati cujuscunque præsidii indicium esse solet; quemadmodum contra venæsectionis aliorumq; generosiorum dextræ administratorum remedium viti ægri tolerantia ac conferentia sequi consuevit.

Quare cum infirmâ Transfusionis Propugnatores nitantur hypothefi, falso rati, sanguinis corruptionem venæsectionis beneficio redintegrandam esse, non potest non ruere etiam illud, quod ei subnexum est, minusq; rectè putatur, vires hominis inde fatifcentes aliis sanguinis restitutione, hoc est, beluini transfusione recuperari posse, ac debere. Præterquam enim quòd, si vel maximè hominis vires sanguinis fortè missione labefactatas restituere conveniret, id efficacium medicamentorum ope multò jucundius, tutius & æque citò efficere liceat, quàm operosâ hac & inter legitima præsidia nondum receptâ beluini sanguinis Transfusionē; inconsultissimum etiam videtur, sanguinem sive corruptum, sive integrum mittere, si postea alium ab alio animali mutuatû substituere necesse habeas. Paucis: sanguinem corruptum alterantibus medicamentis, si quidem possibile fuerit, corrigere; & abundantem imminuere decet, sive hoc fiat Venæsectione, sive cucurbitularum applicatione, sive hirudinum appositione, sive inedia. Re enim verâ Venæsectio, quia propriè non est auxilium, sed tantum materia auxilii, nunquam indicatur. Jam verò quæ hæc demen-

dementia esset, sanguinem in vasis suis abundantem Venæsectionis ope imminuere, & alium beluinum in emissi locum iterum subrogare velle? etiamsi vires hominis ab administrata Venæsectione paululum vacillare videantur. Ad quid hæc sanguinis imminutio? Ad quid venæsectio? Nonne frustra fuisset suscepta? Nonne satius fuisset, eâ penitus supersedisse, quàm adhibitâ illâ alienum sanguinem eidem venæ infundere, ex qua proprius evocatus est? Cur non potius proprius sanguis in vasis suis relictus est? Nonne hoc aliâ manu detrahere, aliâq; idem, vel deterius substituere, adeoq; actum agere esset? Sic sentient, qui me, re benè reputatâ, rectè intelligent, simulq; mecum fatebuntur, & hunc Transfusioni attributum usum nullum esse frustra; commentatum.

Notum porro est, & in confesso, quòd, dum potiones medicamentosæ aliâq; medicamina Ventriculû ac intestina pervadunt, in iis insignes pati mutationes necesse habeant, &, antequam ad sanguinem, ipsamq; partem affectam pertingant, maximam virtutum suarum partem amittant. Constat quoque & hoc, plurima eorum medicamentorum, quæ per os assumi debent, vi singularium fermentorum suorum Ventriculû & intestina haud rarò ita labefactare, ut non possint non perniciosæ inde enasci cruditates. Quod si verò crebrior Transfusionis Sanguinis usus apud nos invalesce-

ret, non solum ejus beneficio integram transfusi beluini & quidem maxime convenientis sanguinis virtutem velut medicamentosam sine tantis ambagibus, & saltu quasi superato Ventriculo, cum ægrotantis hominis sanguine, ad ejus partem affectam deducere liceret, sed & omnis simul querimonia, quæ de Ventriculi cruditate ac imbecillitate à multo medicaminum usu alias pronasci nonnunquam solita haberi consuevit, averti posset. Hoc eorum argumentum, qui novi hujus Inventi causam agunt, bimembre est, & consistit partim in commodo, quod Transfusio præstare putatur; partim etiam in incommodo, quod ejusdem Operationis ope evitari posse perhibetur.

Equidem nemo facile inficias ibit, quin omnia propemodum interna medicamenta in Ventriculo suas patiantur mutationes defectionesq; , & multum virium suarum amittant, antequam ad illam perveniant partem, cui potissimum dicata sunt. Concedimus quoque, multa esse pharminaca, quæ Ventriculo non parum incommodare solent. Anne verò tantæ causæ hæ sunt, ut eas propter omnia medicamina ore delibanda proscribamus, ac susque deque habeamus? quod certè fieri deberet, si dictum commodum ex Sanguinis Transfusione impetrare velimus, quia omnium, vel saltem plerorumque medicamentorum vis aliquantisper exspirare solet, priusquam affecta pars eam sentiat, multa;

taq; pharmaca nausanti Stomacho sæpe sæpius obtrudi debent, quæ minùs ei benefactura certò scimus. Quòd verò hoc *μὴ αὐτὴν ἀγῆμα?*

Si quis in jugulo arteriam asperam eum in finem perforaret, ut per intrusum canaliculum appropriatos liquores infundere posset, quò medicamentosa eorum virtus, quæ in longiori aliàs viâ multum evanescit, integris viribus malè affectis pulmonibus sine ullo circuitu offeratur, quid commodi inde ægotantem percepturum crederes? commodum verò? imò ineluctabile damnum & præsentissimum suffocationis periculum ei acceleraretur, qui fortassis adhuc aliquandiu servari potuisset, sine temeraria illâ si fuisset perforatione. Sic quoque res se habere videtur cum Transfusionē, quæ etiam memorati commodi ergo adhibita plus damni, quam utilitatis ægotanti afferet. Evaporet interdum benè multa medicamentosæ virtutis portio, antequam ad affectam perveniat partem; aggraventq; aliquantò Stomachum fastidiosa pharmaca; quando aliter fieri non potest. Ergone propterea toties beluinus sanguis transfundendus, quoties integris medicamenti viribus opus est, aut Ventrículo indignationem pertimescimus? id quod si faceres, nonne insanire, & ægrum datâ operâ exêrutiare ac interimere velle videreris? Certò mihi persuadeo, ægrum quidvis potius perlaturum, & vel sine ullo remedio

morbū exitum, funestum licet certò futurum, patienti animo expectaturum, quàm sæpiùs iteratam Sanguinis Transfusionem admissurum esse. Hanc enim si semel sine emolumento frustra; experiretur, (experiretur autem frustra, & sine dubio cum damno etiam) postea, certò scio, nec vi, nec precibus ullis amplius eam admissurus esset. Continuetur potius dexter convenientium medicamentorum usus, & longè tutius, jucundius atque certius ille defectus eo resarciatur, qui ex medicamento per longiorem circuitum metuendā expiratione contingere solet. Sic namque & ab usurpati remedii usu minus, quàm à Transfusionē ægrotanti imminet periculum, & tolletur nihilo secius morbus, siquidem aliàs possibile fuerit, etiamsi in longiori à Ventriculo ad partem usque affectam viâ non nihil virtutis medicamento decedat, aut Ventriculo acerbior paulò bolus nonnunquam obtrudendus sit. Quis enim nescit, quantum continuatus medicamentorum usus in domandis morbis possit? Et quis non malit remedium ut ut aliquandiu continuandum, tutum tamen, quàm citum quidem, sed periculosum, anceps, dubiūque eventus? Quid juvat, Transfusionē facere, ut integris viribus beluinus sanguis ad locum affectum pertingat, si adhuc incertum est, an is unquam affectam hominis partem à morbo liberaverit, aut liberaturus sit? de quo jam suprà dubitavimus; neque adhuc

adhuc ejus pœnitet: Vel, quid juvat, Sanguinis Transfusionem evitare, ne aliena labe Ventriculo à medicamento affricetur, inter ea autem aliis humani corporis partibus, ipsique etiam menti, vim ac inevitabile damnum inferre? Annon magis è re foret, stomachantem fortè ab assumpto pharmaco Stomachum communibus roborantibus, & decantatis Stomachicis iterum placare, quam novi hujus Transfusorii Præsidi administratione ægrotum manifesto exponere periculo? Non tanta apud nos medicamentorum penuria est, ut uni alterive Ventriculo minus amico adhærere necessario cogamur. Seligere ex innumero eorum numero licet, quæ maximè ad præsentem morbum debellandum facere videbuntur. Parvam medicamentorum penam illum struxisse, oportet, qui, ubi Ventriculus paulò imbecillior arguitur, talia invenire medicamina nesciat, quæ Ventriculum minus lædere, & tamen causam morbificam æque tollere solent, ac illa, quæ Ventriculo non nihil adversantur, eandemq; morbi causam demere apta nata alias dicuntur. Nempe enim non satis est, in omni morborum curatione, considerare, ut morbus præsens, si possibile, auferatur, sed & decet, altero quoque oculo videre, ne illâ curatione alii morbo ansa præbeatur, neve præsentis morbo opposita remedia aliam quampiam noxam inferant. Sic improvidi minusq; circumspècti Medici

oriatur mutatio. Quo responso simul etiam illi assertioni satisfieri putamus, quâ nobis persuadere non nemo conatur, quod sanguificatio in vasis alterius cujusdam animalis facta, eam admodum sit adjutura, quæ sit in sanguifluis vasis illius hominis, in quem sanguis alienus transfusus est; haud secus, ac proba exterior culinæ ciborum coctio eorum in Ventriculo hominis necessariam in chylum conversionem ac digestionem plurimum facilitare & promovere soleat. Tantum enim abest, ut sanguis bruti recens in venam hominis transfusus in eo sanguificationem promoturus, ut potius oppido impediturus ac turbaturus sit, prout id infra declarabitur explicatiùs.

Ad hæc, quis nescit, quantum discriminis intersit inter medicamentum & alimentum? Quis nescit, medicamentum alterare; alimentum verò tantum nutrire? Idcirco quoniam sanguis bruti in venam hominis recens transfusus non alimenti, sed medicamenti respectum habet, uti ex jam supra dictis constat; hinc suâ sponte fluit, beluinum in hominem, Transfusionis lege, derivatum sanguinem humanis partibus nutriendis ne utique aptum esse; alias plures, quæ adduci possent, rationes, ut silentio præteream.

Quid? quod ipse Deus, sapientissimus Artifex, imprudentiæ (horreo dicere!) hac ratione argueretur, ac si is, dum cruda sæpe adhuc, minus pura, & nondum præparata

alimen-

alimenta per os assumimus, dehinc in debilem Ventriculum demum atque intestina detrudenda, longiorem viam, donec ad sanguinem, ejusq; focum, Cor, pertingant, & partibus nutriendis apponantur, monstrasset, cum longè compendiosiori hodie uti viâ, & Ventriculi officio carere nobis liceat, illâ nempe ipsâ viâ, quâ noviter inventæ Transfusoriæ hujus Artis ope alimentum jam coctum, purum, & ritè elaboratum, quale sanguis beluinus fingitur, citra tantas ambages venæ hominis infundi queat, in nutrimentum partium proximè cessurum. Verum enim verò ut Is, qui omnia rectè fecit, nihil temerè, nihil sine prudentissimo consilio fecit; ita etiam hanc tritissimam viam, quâ Idem omnia animantia cibum pro nutritione ac conservatione corporis sui, naturâ duce, capere voluit, rectissimam optimamq; esse, quoquo etiam modo Ventriculo affecto, nemo non pius divini Numinis operum æstimator, nemo non sanus facillimè agnosceret. Brevior quidem, fatendum, hæc Transfusionis via est, sed violenta, nec securior, neque naturæ convenientior; idemq; videtur, ac si quis è tertia domus contignatione per scalas descendere pertæsus, quò viam abbreviaret, sine gravi causâ per fenestram se præcipitare vellet. Videat itaque, qui aliquo Stomachi vitio laboranti, communem medendi methodum præteriens, hanc novam, beluinum sanguinem transfundendi, Artem

Artem suadet, ne simile ei damnum acce-
ret, quod ille incurrit, qui gradatim descen-
dere nolens, ex fenestra se dat præcipitem.

Hoc quidem verum est, vix quicquam
edulium aut potabilium rerum esse, quod non
impurioribus portionibus pluribus, paucio-
ribusve inquinatum sit. At quid tum? Parata
sunt emunctoria, & quidem hunc ipsum in
finem, ut pereat, quod impurius est, & cor-
pori nutriendo minus aptum, eliminetur;
hinc fæces alvinæ, hinc urina, hinc sudor,
quibus ritè suis locis sequestratis, sanguis
æquè evadit purus, ac si purissimum alimen-
tum venæ hominis immediatè instillaretur.
Frustra ergo emunctoria hæc fecisset natura,
quæ tamen nihil facit frustra, si id, quo nos
vesci solemus, omnis omnino impuritatis
immune esset, aut purissimum alimentum,
posthabitis Ventriculo ac intestinis, venæ
alicui hominis proximè immitti posset.

Deinde novi hujus Inventi hic esse usus
dicitur, ut, dum venâ sectâ corruptus sanguis
educitur, indeq; , ut plerunque contingere
solet, vires hominis fatiscunt, variis haud
rarò succedentibus morbis, illæ novi ac lau-
dabilis sanguinis restitutione, quam Trans-
fusio præstare putatur, recuperentur resar-
cianturq;. Quis verò cordatus Medicus
ideo venæsectionem imperat, ut sanguis cor-
ruptus ac vitiosus per sectam venam extra-
hatur? Non certè is venæsectionis usus seu
scopus est, qui, si nescis, in hoc potissimum
con-

consistit, ut eâ sanguis abundans imminuat-
tur. Sic indicans, hoc est, sanguinis abun-
dantia, & indicatum, nempe sanguinis im-
minutio, quæ venæsectione primariò inten-
ditur, contrarietatis ratione ritè invicem
respondent. Sanguis autem corruptus vel
corrigentia postulat, vel, ubi corrigi nequit,
eliminari debet, non quidem per venam
sectam, sed per alvum, urinam, poros cutis,
aliaq; humani corporis parata emunctoria.
Nunquam enim capere potui, quî fieri pos-
sit, ut, sectâ venâ, solus corruptus sanguis
effluat? Quin seriò hætenus credidi, talem
reverâ effluere sanguinem, qualis in venis
præstò est, sive is sit corruptus, sive integer
probæq; notæ. Corruptus solus si profiliret,
singularem quandam intelligentiam subesse
oporteret, quæ vitiosum sanguinem per me-
dium bonum educeret; sed quod inane ce-
rebri figmentum nemo sani cerebri facilè
admittet; cum ejus rei modum, quo fiat, ne
ratione quidem assequi liceat. Imò si dicen-
dum, quod res est, ille potius sanguis per in-
flictam venæ plagulam nunquam non prodi-
re videtur, qui reliquum activitate, integri-
tate, motuq; superat; vel saltem, qui rimulæ
in vena à Chirurgo factæ proximè adsit.
Peccat igitur & graviter peccat, quicumque
pro sanguinis corruptione emendandâ ve-
næsectionem in usum adsciscit, nullumq; est
mirum, si sinistram sanguinis missionis adhi-
bitionem virium debilitas excipiat; quæ ipsa

dementia esset, sanguinem in vasis suis abundantem Venæsectionis ope imminuere, & alium beluinum in emissi locum iterum subrogare velle? etiamsi vires hominis ab administrata Venæsectione paululum vacillare videantur. Ad quid hæc sanguinis imminutio? Ad quid venæsectio? Nonne frustra fuisset suscepta? Nonne satius fuisset, eâ penitus supersedisse, quàm adhibitâ illâ alienum sanguinem eidem venæ infundere, ex qua proprius evocatus est? Cur non potius proprius sanguis in vasis suis relictus est? Nonne hoc aliâ manu detrahare, aliâq; idem, vel deterius substituere, adeoq; actum agere esset? Sic sentient, qui me, re benè reputatâ, rectè intelligent, simulq; mecum fatebuntur, & hunc Transfusioni attributum usum nullum esse frustra; commentatum.

Notum porro est, & in confesso, quòd, dum potiones medicamentosæ aliâq; medicamina Venter ac intestina pervadunt, in iis insignes pati mutationes necesse habeant, &, antequam ad sanguinem, ipsamq; partem affectam pertingant, maximam virtutum suarum partem amittant. Constat quoque & hoc, plurima eorum medicamentorum, quæ per os assumi debent, vi singularium fermentorum suorum Venter & intestina haud raro ita labefactare, ut non possint non perniciosæ inde enasci cruditates. Quod si verò crebrior Transfusionis Sanguinis usus apud nos invalesceret,

ret, non solum ejus beneficio integram transfusi beluini & quidem maximè convenientis sanguinis virtutem velut medicamentosam sine tantis ambagibus, & saltu quasi superato Ventriculo, cum ægrotantis hominis sanguine, ad ejus partem affectam deducere liceret, sed & omnis simul querimonia, quæ de Ventriculi cruditate ac imbecillitate à multo medicaminum usu aliàs pronasci nonnunquam solitâ haberi consuevit, averti posset. Hoc eorum argumentum, qui novi hujus Inventi causam agunt, bimembre est, & consistit partim in commodo, quod Transfusio præstare putatur; partim etiam in incommodo, quod ejusdem Operationis ope evitari posse perhibetur.

Equidem nemo facilè inficias ibit, quin omnia propemodum interna medicamenta in Ventriculo suas patiantur mutationes defectionesq; , & multum virium suarum amittant, antequam ad illam perveniant partem, cui potissimum dicata sunt. Concedimus quoque, multa esse pharinaca, quæ Ventriculo non parum incommodare solent. Anne verò tantæ causæ hæ sunt, ut eas propter omnia medicamina ore delibanda proscribamus, ac susque deque habeamus? quod certè fieri deberet, si dictum commodum ex Sanguinis Transfusione impetrare velimus, quia omnium, vel saltem plerorumque medicamentorum vis aliquantis per exspirare solet, priusquam affecta pars eam sentiat, multaq;

taq; pharmaca nauſcanti Stomacho ſæpe ſæpius obtrudi debent, quæ minùs ei benefactura certò ſcimus. Quod verò hoc *μὴ γὰρ λίσαν ἀγτιμα*?

Si quis in jugulo arteriam aſperam cum in finem perforaret, ut per intruſum canaliculum appropriatos liquores infundere poſſet, quò medicamentosa eorum virtus, quæ in longiori aliàs viâ multum evaneſcit, integris viribus malè affectis pulmonibus ſine ullo circuitu offeratur, quid commodi inde ægrotantem percepturum crederes? commodum verò? imò ineluctabile damnum & præſentiſſimum ſuffocationis periculum ei acceleraretur, qui fortassis adhuc aliquandiu ſervari potuiſſet, ſine temeraria illâ ſi fuiſſet perforatione. Sic quoque res ſe habere videtur cum Transfuſione, quæ etiam memorati commodi ergo adhibita plus damni, quam utilitatis ægrotanti afferet. Evaporet interdum bene multa medicamentosa virtutis portio, antequam ad affectam perveniat partem; aggraventq; aliquantò Stomachum ſaſtidiſa pharmaca; quando aliter fieri non poteſt. Ergone propterea toties beluinus ſanguis transfundendus, quoties integris medicamenti viribus opus eſt, aut Ventriculi indignationem pertimeſcimus? id quod ſi faceres, nonne inſanire, & ægrum datâ operâ excrutiare ac interimere velle videris? Certo mihi perſuadeo, ægrum quidvis potiùs perlaturum, & vel ſine ullo remedio

morbū exitum, funestum licet certò futurum, patienti animo expectaturum, quàm sæpius iteratam Sanguinis Transfusionem admissurum esse. Hanc enim si semel sine emolumento frustra; experiretur, (experiretur autem frustra, & sine dubio cum damno etiam) postea, certò scio, nec vi, nec precibus ullis amplius eam admissurus esset. Continuetur potius dexter convenientium medicamentorum usus, & longè tutius, jucundius atque certius ille defectus eo resarciatur, qui ex medicamento per longiorem circuitum metuendā expiratione contingere solet. Sic namque & ab usurpati remedii usu minus, quàm à Transfusionē agrotanti imminet periculum, & tollitur nihilo secius morbus, siquidem aliàs possibile fuerit, etiamsi in longiori à Ventriculo ad partem usque affectam viâ non nihil virtutis medicamento decedat, aut Ventriculo acerbior paulò bolus nonnunquam obtrudendus sit. Quis enim nescit, quantum continuatus medicamentorum usus in domandis morbis possit? Et quis non malit remedium ut ut aliquandiu continuandum, tutum tamen, quàm citum quidem, sed periculosum, anceps, dubiūq; eventus? Quid juvat, Transfusionē facere, ut integris viribus beluinus sanguis ad locum affectum pertingat, si adhuc incertum est, an is unquam affectam hominis partem à morbo liberaverit, aut liberaturus sit? de quo jam supra dubitavimus; neque adhuc

adhuc ejus poenitet: Vel, quid juvat, Sanguinis Transfusione evitare, ne aliena labes Ventriculo à medicamento affricetur, inter ea autem aliis humani corporis partibus, ipsique etiam menti, vim ac inevitabile damnum inferre? Annon magis è re foret, Stomachantem fortè ab assumpto pharmaco Stomachum communibus roborantibus, & decantatis Stomachicis iterum placare, quam novi hujus Transfusorii Præsidi administratione ægrotum manifesto exponere periculo? Non tanta apud nos medicamentorum penuria est, ut uni alterive Ventriculo minus amico adhærere necessario cogamur. Seligere ex innumero eorum numero licet, quæ maximè ad præsentem morbum debellandum facere videbuntur. Parvam medicamentorum penum illum struxisse, oportet, qui, ubi Ventriculus paulò imbecillior arguitur, talia invenire medicamina nesciat, quæ Ventriculum minus lædere, & tamen causam morbificam æque tollere solent, ac illa, quæ Ventriculo non nihil adversantur, eandemq; morbi causam demere, apta nata aliàs dicuntur. Nempe enim non satis est, in omni morborum curatione, co- respicere, ut morbus præsens, si possibile, auferatur, sed & decet, altero quoque oculo, videre, ne illà curatione alii morbo ansa præbeatur, neve præsentì morbo opposita remedia aliam quampiam noxam inferant. Sic improvidi minusq; circumspècti Medici

esset, si is, v. g. calidam Hepatis intemperiem restincturus, refrigerantes potiones immoderatiùs exhiberet, sine ullo habito ad Ventriculum respectu, aut necessariâ curâ, ne ejus fermento inde labefactato, appetitus prosteratur, concoctio lædatur, sicq; gravius, quàm Hepatis erat intemperies, pronascatur malum.

Denique imperfecta foret Medicinâ, nisi, quæ Venæsectionem habet, quâ sanguinis abundantiam subito imminuere licet, eadem haberet & tale remedium, quo sanguinis defectum subito supplere possit, quale Sanguinis Transfusio à quibusdam esse creditur. Hic in antecessum advertendum, defectum sanguinis potissimum vel à defectu alimenti, vel à nimia & subitanâ quacunque hæmorrhagiâ proficisci. Defectum alimenti eusarca & euchyma abundè supplere apta nata sunt; ut nullo prorsus alio potiori aut vehementiori præsidio, multò minùs Transfusionē, opus sit. Et in hæmorrhagiis quàm nullum penitus locum usumq; habeat beluini Sanguinis Transfusio, ob non contemnendas fortè rationes, jam supra innuimus. Quare neutiquam ideo imperfecta dicenda Medicinâ, etiamsi non habeat, quo sanguineam massam subito unâq; vice augere possit; quemadmodum habet, quo unâ vice ac subito sanguinem imminuere potest, quia sanguinem in quibusdam casibus subito imminuere quidem, extrema sæpe postulat.

lat necessitas; at augere sanguinem, idq; subito, simul, ac unâ vice, & quidem alieni sanguinis additione, nec opus unquam est, nec commodè ac sine noxa licet. Taceo, quòd, etsi tale remedium Medicina haberet, quo sanguinem subito in hominem transfundere, atque adeo alium in profusi locum mox iterum substituere commodè posset, tamen propterea nondum omnibus numeris perfecta esset.

Ditata quidem est saluberrima servandorum hominum Ars, intra aliquot tantum lustra, egregiis, multiq; usus Inventis; neque tamen etiamnum ad id perfectionis culmen adscendit, ut perfectior reddi nequeat. Guilielm. Harveus anno 1628. primus publico Scripto docuit, quo motu modoq; sanguis eat redeatque velut actus in orbem. Quis antè quicquam scivit de Venis lacteis, quam eos Casp. Asellius anno 1622. densissimis quasi tenebris obrutas in aprium produxit? Ductum Thoracicum à Bartholom. Eustachio jam anno 1563. tanquam per transennam quidem visum Joh. Pecquetus anno 1651. demum plenius detexit, ejusq; usum ostendit. Vasa lymphatica invenit Thom. Bartholinus anno 1653; vel, ut aliis placet, Olaus Rudbeck anno 1658, vel potius Londinensis ille Jolivius anno 1652. Ductum Pancreaticum Joh. Georg. Virsungus primum anno 1642. monstrasse vulgò creditur. Ductus salivales superiores Nicolaus Steno-

D 5

anno

anno 1661; & inferiores paulò antè Thom. Wartonus primus vidisse dicitur. Hæc, inquam, Inventa, (de tot noviter excogitatis Instrumentis Chirurgicis, multisq; partim Chymicis, partim exoticis Veteribus ignotis medicamentis nequid dicam,) ad rei Medicæ complementum multum quidem faciunt; nullum tamen est dubium, quin plura adhuc restent, eaq; non minùs fortassis proficua futura, quæ etiamnum desiderantur. Quod ideo solùm dico, ne Transfusionis Patroni sibi persuadeant, hoc suum Inventum almam Medicinam nostramunicè perfectam reddere posse. Imò palam fateri cogimur, mutilam hodiernum esse, & in multis imperfectam non solùm Medicinam, sed & plerasque alias disciplinas. Exclamare & nos necesse habemus: quantum est, quod nescimus! Multa procul dubio adhuc nobis abscondita sunt, quæ, si sciremus, ad Medicinæ perfectionem non parum fortassis factura essent.

Verùm ita omninò comparatum est cum prudentissimâ Naturâ, ut opera sua haud raro sipario quodam velut obvelata non simul & semel revelet, sed Posteris etiam aliquid relinquat, quod nos latere voluit. Interea licèt in immensum his nostris temporibus creverit Medicinæ scientia, nemini tamen aliquid vel ulterius inveniendi, vel adjiciendi occasio sublata est. Sunt adhuc morbi incurabiles, vel curatu admodum difficiles, quos

quos si quis novo demumque inveniendō remedio, vel certiori methodo, per sanare doceret, nā! is magnam ab omnibus Æsculapii Filiis, ipsisq; etiam infirmis iniret gratiam, multumq; perfectionis Medicæ Arti adjiceret. Adhuc enim nescit, tollere nodosam Medicinā podagram; adhuc nescit, eradicare Cancrum; adhuc nescit, addere, quæ à nativitate deficiunt. Sic quis Medicus novit, illi loco, quo, v. g. digitus manus aut pedis à nativitate deficit, naturalem digitum adaptare, suāq; Arte producere? Quemadmodum igitur Medicinā membrum aliquod à corpore suo, e. g. digitum à manu avellere quidem scit, addere autem vel apponere digitum nescit; ita sanguinem quidem per Venæsectionem sine mora imminuere, & quasi rescindere novit, sanguineam autem massam ex tempore augere & vasa sanguiflua alio sanguine sine damno replere, adhuc ignorare potest, idq; sine notabilioris imperfectionis exprobratione.

CAP. V.

Phænomena, numero sex, pro Transfusionē adducta ventilantur, & ad ea ita respondetur, ut cuncta nihil probare ostendatur.

Superavimus brevi examine & hos quatuor secundarios sive speciales Transfusoriæ Arti assignatos usus. Placet nunc, ulterius progredi, eādemq; brevitate

vitae illa phaenomena perstringere, quae Transfusionis Invento lucem foenerari, & applausum assensumq; conciliare creduntur. Scilicet novam hanc Sanguinis Transfusionem ipsa rerum omnium magistra, Natura, digito quasi nobis monstravit, quando similem penè cum illâ in modum à materni uteri placenta per venam umbilicalem in foetus hepâr sanguis transfunditur, ut cotenellum corpusculum nutriatur. Sic opinantur, qui novæ huic Transfusionis operationi litant. Mirum certè, si Natura novum hoc Transfusionis Artificium tam pulchro typo nobis præformavit, id tam diu, & usque ad hæc nostra tempora ignotum latuisse. Verone simile sit, Majores nostros, qui nec ipsi cerebrum in calcaneo gesserunt, tam speciosum Artificium, si exerceri cum hominis emolumento posset, à Natura non didicisse jam dudum? Quid dicendum? Fortassis non observarunt; vel, si observarunt, eum rem nullius, vel saltem exiguius suspreverunt, nec dignam judicarunt, quam literis posteritati commendarent. Sit ut sit. Mihi certè, nî omnes mei sensus fallunt, magnum discrimen intercedere videtur inter hanc noviter artificiosè excogitatam, & illam à matre in foetum suum contingentem Transfusionem. Hic enim ejusdem qualitatis sive proprietatis, vel non multum inter se diversus est placenta uteri in foetum transmeat sanguis; ibi verò beluinus, eum specie & formâ, adeoq;

adeoq; qualitate ab humano sanguine plurimum differens sanguis in hominem transfundi jubetur. Hic ingens, inter matrem nempe & foetum conformitas seu similitudo; ibi verò notabilissima, inter brutum puta & hominem, se offert diversitas. Et quod magis, hic foetus in utero non purpureo sanguine, sed, vel materiâ albugineâ in placenta consistâ oviq; albo non ab simili, vel lacte aut chylo materno per peculiare ductus ad uterum, & imprimis uterinum hepar confluente, gravissimorum Anatomicorum probabilissima opinione, alitur; ibi verò rubicundus cruor à bruto in hominem intermediarii canaliculi beneficio derivatur. His si appenderimus, quòd foetus in utero, juxta stringentissima divi Coi nostri argumenta, per os potius, quàm per umbilicum nutriri videatur, hui! quàm citò cadet omnis comparatio inter nutritionem foetus & hodiernam Sanguinis Transfusionem effecta. Ut non tam mirari subeat, quòd Veteribus foetus nutritio nullam, Sanguinis Transfusionem inveniendi, occasionem præbuerit, quàm quòd Recentiores nonnulli Transfusoriae Artis ortum exinde deducere ausint.

Sunt etiam, qui dicunt, nos velci variorum animalium carnibus, itemq; lacte frui, & nutriri inde lautè; hincq; putant, nos similiter brutorum sanguine uti, cumq; adhuc calentem intra venas nostras commodè recipere posse, ne quicquam veriti, ne cum sanguine

sanguine bruti natura atque mores, aut graviora fortè damna, in hominem transplantentur; quod alios tam anxie timere sciunt. At enim verò magna est differentia inter carnes animalium, quas comedere quotidie consuecimus, nec non lac, quod ore delibare solemus, & inter sanguinem brutorum, qui Transfusoriæ Chirurgiæ lege venæ alicui hominis instillatur. Carnis enim frustum à corpore suo divulsum non amplius eâ gaudet flammæ sive caloris vitalis virtute, quam, dum corpori vivo adhuc cohærebat, ab animati sanguinis præsentia obtinuit. Sanguis verò bruti, qui in hominem per canaliculum, Transfusionis artificio, derivatur, flammeus & fervidus, adeoq; animatus adhuc, sive brutali animâ suâ quasi imprægnatus est. Hinc esus carnis hominis temperamentum, naturam, aut mores immutare nequit; sanguis verò beluinus, maxime recens, calens, & immediatè venæ instillatus & immutavit, ut ex historiis infra narratis nobis constat, & immutabit sine dubio. Deinde pecorum carne non crudâ, non recenti, non vitali igne & animali calore adhuc turgidâ; sed prius refrigeratâ, sæpe satis diu in aqua aut aceto maceratâ, hincq; probè emollitâ ac præparatâ, atque tum demum vel coctâ vel assâ vescimur, idq; ob hanc dubio procul rationem, ut virtus, quam sibi à vitali flammâ appropriatam habuit, unâ cum cruore ante esum, quantum possibile, eluatur ac secedat.

Ast sanguis novâ hâc Transfusionis Operatione integer, sine ulla præviâ præparatione, &, ut diximus, igneus, animatus, sive animâ suâ quasi incrustatus à bruto in hominem traducitur. His addo, quòd caro, quam manducamus, in Ventrículo ac intestinis prius concoqui inq; chylum converti, sicq; ibidem multas mutationes subire necesse habeat, quàm sanguineæ massæ se immisceat, quòd interea longiori hâc viâ morâq; humanæ naturæ familiarior fiat, & paulatim assuescat, ne subita mutatio, quæ plerumque periculosa, contingat. Ex quibus luculenter apparet, quàm ingens intercedat discrimen inter carnes animalium, quas comedimus, & inter sanguinem bruti, qui à Neotericis quibusdam in hominem transfunditur, quæq; sit ratio, quòd illâ commodè vesci, hunc autem intra venas nostras nunquam tutò admittere nobis liceat.

Lac quod attinet, itidem à sanguine non parùm differt, estq; illius in cibis, & hujus in Transfusionis usus diversissimus. Lac namq; longè vilior, crudior, minùsq; excoctus, & hinc etiam minùs potens succus est, quàm sanguis arteriosus, quem in Transfusionis adhibent. Hincq; credendum, lacti non tantam alterandi datam esse facultatem, quàm sanguini. Lac ceu ex chylosa materiâ generatum tantas non subiit in corpore animalis mutationes, quàm sanguis, qui totum corpus subinde peragrat, ipsumq; caloris focum,

focum, Cor puta, non unâ vice transit. Unde non potest non naturæ character sanguini altius imprimi, quàm lacti. Unde non potest non sanguis animalis naturam, temperamentum, atque mores tenaciùs in se continere, & exactius referre, quàm lac. Unde tandem non potest non sanguis hujus animalis ab alio intra corpus suum receptus huic suam naturam, temperamentum atque mores quadantenus, nisi gravius quid impediverit, affricare, cumprimis, si is adhuc caleat. Amplius, Lac vel frigidum bibitur, vel ut plurimum prius coquitur, quàm assumatur; quâ coctione fit, ut ejus portiones subtiliores, potentiores, magisq; activæ, animalis naturam potissimum redolentes, maximam partem expirent, abscedantq; , & loco nativî caloris, adscititius sive externus calor lacti impertiatur. Sanguis autem absque ulla præviâ coctione, fervidus, suâq; flammâ vitali & nativo temperamento adhuc instructus transfunditur. Et quod præcipuum est, Lac non nisi per os ingeritur, idq; rarò proprio calore calens, sed culinari tantum igne excalesfactum. At sanguis in Transfusionis Operatione ex sui caloris præsentia æstuans vivensq; ex ipsa beluæ arteriâ per brevem tubulum immediate venam hominis subire cogitur. Rarius autem, imò rarissimè licet lac ex ipsis animalis uberibus exsugatur, tamen quoties id fit, & quidem continuato imprimis usu, plerun-

plerunque ita fieri constat, ut cum lacte illius animalis temperamentum, &, quamvis non præcipuæ, aliquæ tamen saltem, proprietates in illud simul transeant animal, quod lac ex ipsis uberibus hausit. Sic, Nobilis ille Genuensis puer, qui paulò post partum, mortuâ matre, lac ex ipsis vaccæ uberibus sugere jussus est, ut melius nutritur, vaccæ mores inde catenus induit, ut post, velut hoc animalis genus solet, similiter perpetuò ruminarit. Et de alio puero refertur, eum à cervæ lacte nutritum cervos fugientes per saltus ac juga montium eadem ferè pedum pernecitate, quâ ipsi cervi polent, sequi solitum fuisse. Nec minùs ille, quem capra lacte suo aluit, semper, cum adolevisset, saltare immoderatiùs, plantarumq; locustas, ut pendentes rupe capellæ amant, arroderet petulantiùs consuevit.

Quid? quòd idem ingeniorum ac proprietatis cum lacte tradux non solum à bruto in hominem, sed & à bruto in brutum, hominemq; in hominem haud rarò fieri animadvertatur. Notum enim est, quòd, si hædi ovium, aut agni caprino lacte, alantur, his lana durior, & illis capillus contingat tenerior. Unde hoc? nisi quòd cum lacte ab ove in hædum aliqua ovina, & à capra in agnum nonnulla caprinae proprietatis pars transmigret. Obq; eandem rationem experimur, lac nutricis annosæ infanti alumno conciliare imbecillitatem membrorum, bre-

venem senectam, maturamq; canitiem; libidinosa verò & salacis lac efficere puerum multis libidinum passionibus obnoxium. Ut hinc minimè mirum sit, illos pudicarum licet mulierum liberos, qui ab impudicis nutricibus, quales pleræque apud nos esse solent, lactati sunt, sæpe nec corporibus, nec animis parentibus suis similes existerē. Unde hoc? nisi quòd, ut Aul. Gellius *Noct. Attic. Libr. 12. c. 1.* rectissimè arguit, in moribus inoleſcendis, ipsoq; fortassis corpore effingendo magnam ferè partem ingenium altricis & natura lactis teneat. Quod adeo verum est, ut communi loquendi modo populiq; iudiciis & mores, & morbi, & sanitas cum lacte primo bibi dicantur. Hoc itaque ex alieni lactis duntaxat nutritu, succi licet crudioris & tantas alterationes in animalis corpore subire non soliti, proptereaq; ejus naturam minus redolentis si contingit, quid fieret, si Transfusoriae Artis lege plures unciae beluini sanguinis, & quidem, calentis ac arteriosi, qui naturam animæ cujuscunque indiviui reverà imitatur, in venam hominis immediate derivarentur?

Nec porro plus roboris habet illa argumentatio, quæ à sanguinis pro quorundam morborum curatione hausti usu ad hanc sanguinis in Transfusionis Operatione usitatam adhibitionem extenditur. Non, inquam, valet consequentia: Sanguis etiam calens sine noxâ, medicamento loco, prodebet.

debellandis morbis quibusdam, bibitur & per os assumitur; quid ni ergo sanguis aliqujus bruti etiam in venam hominis, mediante brevi tubulo, innoxie non solum, sed & utiliter transfundi possit? Nam ut taceam, & hic inter sanguinis immediatam in venam hominis Transfusionem, & ejus potationem, notabile iterum occurrere discrimen; falsum præterea est, sanguinem calentem recte ac sine noxa bibi.

Notum quidem est ex *Plin. Natural. Histor. Libr. 28. c. 1.* jam olim apud Romanos fuisse, qui in Theatro & arenâ jugulatorum gladiatorum adhuc spirantem sanguinem, unâq; ipsam animam, uti loquitur, tanquam arcanum contra epilepsiam præsidium, ex ipsis vulnerum osculis sorpserint. Verum enim verò tantum abest, ut ipse Plinius hoc remedii genus approbet, ut potius paulò post vehementissimè illud excretur, jurisq; humani everforis ac monstrorum artificis, Diaboli, inventum vocet, ratus, hunc solum, quod cæde humanâ & sanguinis humani effusione delectetur, ex hominum sanguine pharmaca fraudulenter instituisse, hominibusq; persuasisse, ut pro arcendo Comitiali morbo sanguinem humanum haurirent. In hanc sententiam etiam it non inelegans Scriptor Joh. Bruyrinus, qui de *Re Cibariâ Libr. 2. c. 4.* id auxilii Christiano homine indignum, eosq; , qui ostenderint primum, & literis prodiderint, ab Anthropophagis

oriundos judicet ; haud secùs , ac Doctissimus Joh. Langius , qui *Epistol. Medicinal. 24. Libr. 1.* cum Tertulliano calentis sanguinis potationem , ceu Dæmonum præstigiam , quum per Christum nobis illuxerit veritas , contemnit & irridet. Et quamvis Celsus *Libr. 3. c. 23.* quendam , jugulati gladiatoris calido sanguine epoto , à Comitiali morbo sese liberasse scribat ; tamen mox addit , miserum hoc auxilium , tolerabile , miserius fecisse malum. Unde conjicere licet , quòd , etsi hîc humani sanguinis potus epilepsiam averruncârit , tamen non sine omni noxa fuerit , quin imò aliud ipsâ epilepsiâ atrocius damnum incusserit. Quid ? quòd Aretæus *Libr. 1. de Curat. Dint. Morb. c. 4.* nonnullos quidem viderit , qui jugulati hominis vulneri phialam subjecerint , atque inde haustum cruorem biberint ; sed & eos adeo severe increpuit , ut indignabundus exclamârit : ô ! ingentem necessitatem , quempiam sustinere , malum malo piaculo depellere. Taceo , neminem verè nominato Scriptori affirmare potuisse , quenquam temerariorum istorum heluonum sanitatem exinde recepisse.

Sed quid attinet , plura testimonia atque exempla infelicitè ausuq ; prorsus impio hausti humani sanguinis ex Veterum monumentis eruere atque corradere ? Prostant & nova , quibus idem non minùs confirmare licet. Thom. Bartholinus stupendum illud non modò Daniæ , sed totius propemodum litera-

rii Orbis Decus, *Disquisit. Med. de Sanguine*
Vetito, de quodam Mendico narrat, quod is,
hausto cruore decollati hominis, eo insanix
devenerit, ut linguæ magnam partem sibi
ipsi dentibus absciderit, sine dubio convul-
sionibus in maxilla auctis; testaturq; , etiam
in sua Urbe Hassniâ fuisse, qui majori fidu-
ciâ, quàm felicitate istud remedii genus ex
decollatis ad morbum Herculeum tentarint,
indeq; nauseam omnibus successisse, sanita-
tem autem nulli. Dan. Beckerus *Spagy.*
Microcosm. c. 14. Regiomonti Civem quen-
dam novit, qui suasu muliercularum ada-
mante cutem aperuerit, & quamvis sanguinis
promanantis non nisi unam atque alteram
guttulam filiolo suo exhibuerit, tamen id fe-
cerit miserrimo exitu. Refert etiam ibidem,
audaculum quendam præservationis ergo
sanguinem jugulati hausisse, indeq; subito
in epilepsiam incidisse, cum tamen eâ ante
hac nunquam fuisset tentatus. Et Zacutus
Lusitanus *Pract. Med. Admir. Libr. 3. obs. 79.*
annotatum reliquit, juvenem quendam ini-
mico suo, amicitia simulatâ, ad convivium in-
vitato, inter potandum obtrudisse poculum
vini cum unciis duabus sanguinis humani
ex homine ruffo venæsectione emissi, ad-
jecto etiam saccharo; unde cum illud in-
cautus exhausisset, post triduum delira lo-
qui cæperit, & in perpetuum fatuus reman-
serit, adeo, ut nullo prorsus remediorum ge-
nere curari potuerit.

Nec mirum hoc videri debet, cùm fieri vix possit, quin sanguis vasis suis egressus, & ab homine potus, in Ventriculo, propter innumeram, quâ præditus est, fibrarum multitudinem, coeat, concreseat; mox corrumpatur, putrescat; sæpe etiam singularem malignitatem induat, & gravissimorum morborum mater fiat, ut: mania, lipothymia, torminum Ventris, difficilis respirationis, marasmi, convulsionum, lepra, oblivionis, ipsiusq; denique mortis, velut Medicorum annales passim denunciant. Ut adeo humanus sanguis, isq; adhuc calens nequaquam innoxie delibetur; dolendumq; modò sit, tantum huic crudeli potioni hodiernum à vulgo Christianorum tribui, ut dubia valetudinis aleam cruento remedio exponant, à quo potius quivis unus, cui propria Salus curæ Cordiq; est, diligenter sibi caveat, certò persuasus, truculentam ac inhumanam hanc medicinam non aliunde, quàm ab ipso Dæmone vanisq; ac superstitiosis hominibus nefarie excogitatam esse.

Idem autem penè, quod de pernicioso calentis humani sanguinis interno usu diximus, dici etiam non immeritò potest de beluini sanguinis, maximè, adhuc calentis detestando ac abominabili potu. Vulgò notum est, eos, qui taurinum delibarunt sanguinem, non solum in horrenda incurrisse symptomata, sed & ipsos tauros vaccasve seputasse. Qui Canis sanguinem gularunt, ejus

ejus ululatum simul ac rabiem nonnunquam imitantur. Nec adeo rarum est, eos, qui lupi sanguinem biberunt, ululatum ac rabiem luporum similiter aliquando æmulatos esse. Et apud Weinrichium *de Monstris* c. 15. legimus, quendam suillo sanguine pastum, post luto similiter ad fastidium usque se delectasse. Scribitq; Idem Author ibidem, quod, cum puella quædam Uratislavienſis pro debellandâ, quâ detinebatur, epilepsiâ, felinem sanguinem bibisset, inde felis naturam induerit, &, quod id animal in ædibus solet, idem hæc voce, saltu, gestu, vestigiis, mures in silentio, angustissimis etiam in foraminibus, venata, tam diu imitata fuerit, quamdiu paroxysmi vehementia duravit; luculento certe argumento, etiam cum poto bruti alicujus sanguine, cum primis si is calidus fuerit, ejusdem animalis mores in hominem nonnunquam transire; ne dum si is immediate venæ hominis instilletur.

Et quamvis hoc non semper eveniat, notumq; vicissim sit, sanguinem Canis à Dioscorid. *Libr. 2. c. 97.* contra morsum canis rabidi; Phocæ vero itemq; Rangiferi, teste Sennerto *Libr. 3. de Scorbuto. P. 5. Sect. 2. c. 2.* & Thom. Bartholino *de Sanguine Vetus.* à Norwegis contra scorbutum; nec non Aquilæ ab Aldrovando *Ornithogal. Part. 1. L. 1. ut & Cervi* ab Eodem Authore *Tom. 1. Libr. 12. c. 13.* item Agni ab Ægineta *Lib. V. II. de Ra-*

Medic. c. 3. Testudinis quoque à Petr. Bayro *Præf. Libr. 2. c. 16.* atque Weckero *Antid. Spec. Libr. 1. Sect. 24.* & imprimis Mustelæ ab Horat. Augenio *Consil. & Epist. Medicinal. Tom. II. L. 8.* aliisq; contra epilepsiam, ceu arcanum ac præstantissimum remedium, si bibatur, deprædicari; tamen primò adhuc dubium est, an dictorum animalium sanguis cum effectum reverâ ediderit, & adhuc præstiturus sit, quem præstare nudè dicitur. Quis nescit, multa hujusmodi fabulosa remedia à Veteribus ad nos propagata eodem pretio à Modernis vendi, quo ab antiquis Scriptoribus acceperunt, sine ullis sæpe factis sufficientibus circa ea experimentis? Quis nescit, sæpe sæpius in Medicina committi fallaciam non causæ, ut causæ? Ecquis tandem spondebit, cruentum hoc remedium non idem quandoque, vel aliud grave secutum esse damnum, quod sanguinem taurinum, caninum, lupinum, porcinum, felinum intulisse diximus? Anne piaculum sit, suspicari, eos fortassis, qui id præsidii commendarunt, inde prognatam noxam, ut sit, datâ operâ reticuisse?

Deinde cum paulò suprà laudato Thom. Bartholino *de Sanguin. Vetit.* censeo, nunquam non rectius, majoriq; pietate, quia sanguinis experimentum scrupulum in animis Christianorum movet, loco sanguinei hujus medicamenti alia substitui, quæ simili prorsus facultate ac virtute prædita contra eandem

dem morbi speciem dimicare apta nata sunt, contra quam beluini sanguinis ingurgitatio vulgò deprædicatur. Legitima enim & à Deo concessa remedia quia pro morbis abundè hodie nobis suppetunt, quibus sanitatem redintegremus, jure meritoq; quivis Christianus Medicus illa abominatur, quæ vel superstitionem, vel Magiam, vel impietatem quamcunque redolent; maximè, cum & quoad experientiam, ut jam jam audivimus, & quoad rationes, internus calentis sanguinis usus, Clarissimorum Scriptorum testimoniis, reprobatus sit; quos inter, ut Cœlium Aurelianum *Libr. I. Chron. c. 4.* Unzerum *de Epilepsia L. 2. c. 12.* aliosq; silentio præteream, solum Sennertum, communem illum Præceptorem nostrum, allegare hîc juvabit. Quid autem is? Sanguis, inquit, *Instaur. Med. Libr. 2. Part. 3. Sect. 2. cap. 4.* potissimum adhuc calens & spiritibus plenus potus miras mutationes in homine inducit, ut vel generatim saltem bestiarum feritatem exprimat, vel etiam speciatim alicujus bestię mores imiteretur. Nam cum sanguis naturam animalis sui habeat, & omnes animalis actiones potissimum spirituum & caloris nativi beneficio perficiantur, illo ab homine assumpto, in spiritibus ejus & calore, ac consequenter in humoribus & solidis etiam partibus fieri mutationem credibile est; cum omne alteratum naturam alterantis sequatur, nî actio interrumpatur, aut accidentarium quid eveniat.

Nec est, ut quis hîc ogganniat, lupos sæpe multum ovini cruoris ingurgitare, nec tamen eapropter ovinam induere naturam; & mustelas sive martes sanguinem gallinarum aut columbarum voracissimè haud rarò exsorbere, nec tamen quicquam mitiores evadere, suamve feritatem exsuere; adeoq; nullam à sanguinis potu fieri mutationem in similem dispositionem ei, cujus fuit sanguis. Facile enim huic occurremus objectioni, si dixerimus, ideo in his animalibus nullam fieri ad simile mutationem, quod ipsorum natura sit *ἐνεργὴς καὶ ὁρμητικὴ*, mutetq; violentius cibum, quam ipse mutetur. Dein etsi ad aliquam lenitatem à cibo hoc spirituosio sanguineoq; redigantur, tamen quia ferina consortia suaq; loca non mutant, sed ad ea protinus revertuntur, & ex consuetudine à teneris habitu naturæq; ingenerato instinctu pristinam immanitatem recipiunt, fieri aliter non potest, quin motus hic fortior alterum elidat, hoc est, luporum, ac mustelarum sive martum potens feroxq; sanguis ovium & gallinarum columbarumq; blandissimum minusq; activum intra dictorum animalium viscera receptum sanguinem ita obliteret, infringat ac obtundat, ut hunc in sui quidem naturam convertat & commutet, ipse autem nil quicquam, aut certè non nisi parvissimè inde mutetur; quæ ipsa ratio videtur, quòd, quando transfusus sanguis imbecillior est illo, cum quo permisceri debet, nulla

nulla morum inde sequatur mutatio, nullaq;
contingat notabilis noxa.

Hoc ergo si ita est, uti reverà esse hactenus
evicimus, quid vetat, audacter tandem con-
cludere, quod, quemadmodum sanguinem,
sive is sit humanus sive beluinus, per os in-
gerere non licet; sic multò minus liceat ali-
cujus bruti adhuc calentem, vivum, anima-
tum, & idealem illius animalis, cujus est,
proprietaem referentem sanguinem in ho-
minis venam immediate transfundere, idq;
ob argumenta, testimonia atque exitiosa
usque huc adducta exempla.

Joh. Hartmannus *Prax. Chymiar.* c. 2.
sanguinem asini ex vena pone aures missum
lineteo mundo, nulliq; antè usui adhibito,
& quidem duos digitos lato, unumq; polli-
cem longo excipere, dein exsiccare, mox
iterum aquæ fontanæ hauustu diluere, hancq;
tandem asinino cruore probè tinctam aquam,
pro una dosi, per tres continuos dies, omni
mane semel repetendâ in mania propinare
jabet, testatus, se anno 1615. æstatis tempo-
re fabrum quendam lignarium hoc ipso præ-
sidio restituisse; id quod non solum de
Transfusione Sanguinis cogitandi ansam
nonnullis jam olim præbuisse, sed & ean-
dem hodiernum admodum illustrare ac con-
firmare à nonnullis dicitur; à minori ad ma-
jus argumentum ducentibus, atque ratis,
quod, si asininus cruor in linteo exsiccatus,
& aquâ fontanâ iterum dilutus mania me-
deri

deri sciat, multò magis præstiturus idem sit, ejusdem auriti, torpidi nempe & melancholico tempamento præditi animalis sanguis tranquillus, & placatus, si is calens & asinino, id est, melancholico charactere suo adhuc gaudens immediatè in venam maniaci derivaretur, spe, fore, ut, contrarietatis ratione, quæ inter asini & maniaci sanguinem intercedit, ferociens, tumultuans, effrænus ac æstuans maniaci sanguis inde restinguatur, coerceatur atque tepescat. At enim verò ut taceam, anti-maniacum hoc præsidium nondum sufficientibus experimentis (una namq; hirundo non facit ver) adeo confirmatum esse, ut inter canonica anti-maniaca remedia tutò illud referre liceat; animadvertere insuper contra præsentem positionem juvabit (1) quòd sanguis asini eo modo, quo Hartmannus jussit, usurpatus, in mania occurrenti indicationi sic quidem satis rectè; eâ verò ratione, quâ in Transfusione adhiberi deberet, nequaquam satisfacere videatur. Nam sanguis asini exsiccatus spirituosas activasq; portiones suas qualescunque jam amisit, & non nisi terrestrioribus, crassioribus ac fixis constat, quarum ille ratione, velut medicamentum præcipitandi vi pollens, (qualia in mania utrumque ferunt punctum,) maniaci sanguinis ferociam fortassis demulcebit ac compescet. At sanguis asini calens Transfusionis lege in venam maniaci derivandus spiritibus suis activis.

activisq; & volatilibus quibuscunque particulis adhuc turget, quæ, tantum abest, ut maniacum sanguinem refrænaturæ, ut potius eum novo quasi addito fermento magis concitaturæ, inq; majorem effervescentiam & inordinatiorem motum acturæ essent.

(2) Quid? si cum animato asini quoque sanguine, cui ipsa idea & proprius animalis character immerfus est, illius mores similiter, ut ex felini & porcini sanguinis potu contigit, aliquantum traducerentur in hominem, sicq; ex maniaco fieret stipes, caudex, asinus? quod futurum anxius vererer, si asinus in hominem paulo largius transfusus sanguis maniacy sanguinem viribus superaret. Aliquot saltem guttæ autem, aut non nisi unica fortè uncia, asinini sanguinis si in hominem infereretur, vererer, ut inde quicquam resipisceret maniacus, aut aliquid sensurus esset commodi, eò quòd maniacy sanguis potentior asinum procul dubio in sui naturam converteret quidem, ipse verò ab imbecilliori mutaretur nil quicquam.

(3) Aliud est, sanguinem exsiccatum cum convenienti vehiculo, aut ex eo arte paratum medicamentum, adhibere, & aliud sanguinem nativo suo calore adhuc fumantem intrò assumere, aut in venam hominis immediate transfundere. Sanguis hircinus exsiccatus quidem grumofum sanguinem resolvit, atteritq; calculum; & cervinus alvi fluxus quoscunque sistere dicitur; de aliorum

rum animalium sanguinibus, & ex iis præparatis variis medicamentis non contemnendorum multiplicium internorum atque externorum usum ut nihil hâc dicam. Quis verò potentiùs adhuc grumofum sanguinem resoluturus, calculumq; attriturus hirci; aut alvi fluxum sine morâ cohibiturus, cervi, calentem sanguinem in venam ægrotantis immediate transfundere aufit, idq; hâc sponfione, fore, ut Transfusio hæc non modò tutò fieri possit, sed & eadem ex ea cò certius speranda sit medela? Ita etsi concedatur, exsiccatum asini cruorem in aqua simplici solutum ac propinatum maniaco furori advenfari; tamen nondum in liquido res est, etiam calentem ejusdem animalis sanguinem in maniaci venam commodè ac sine periculo derivari posse; cum ingens sit discrimen, quod, uti dictum, inter hunc atque illum asinini sanguinis in mania se offert usum.

Commune axioma est, ab Aristotele profectum: Si senex haberet oculum juvenis, videret, ut juvenis. Ad eundem penè sensum audire videor hanc objectionem: Si senex haberet sanguinem juvenis, viveret, id est, tam vegetus esset, ut juvenis. Cur ergo senis sanguis, si sâ venâ, nō emittitur, ejusq; loco robusti juvenis, aut validi alacrisq; junioris animalis sanguis Transfusorii Artificii ope substituitur? Egregium per fidem! Inventum, cujus beneficio facere li-

cet,

cet, ut senex juvenescat ! Anne humano generi gravior utiliorq; unquam obtigit medicina? Grata quidem utique, bone Vir! & utilissima omnino futura, si æquè exerceri Ars hæc posset, ac docetur. Sanguinem hominis juvenis omnem aut maximam ejus partem nemo Christianus in senem juvenescere cupientem elutriare audebit. Quid enim aliud ageret, quàm ut juvenem datâ operâ enecaret? quod carnificis aut latronis, non autem Christiani Medici est. Imò utrumque dubio procul interficeret; & juvenem quidem, quia omnem aut maximam sanguinis partem ei surriperet, sine quo vita hominis ne momentum quidem consistere potest; senem verò perimeret, quia eodem temporis articulo, quo ex ejus vena sanguinem extraheret, (quod necessariò fieri deberet, ut succedenti locus daretur,) juvenis sanguinem transfundere impossibile esset; unde intermedio temporis spatio sanguine suo orbus immeritissimò Nabothi pœnam luere cogeretur, sine commisso peccatò. Omnis autem aut certè maxima sanguinis pars ex juvene in senem derivari deberet, quia, si secus fieret, etiam post celebratam hanc Transfusionem, senex, juvenis sanguinem habere, dici nequaquam posset. Et bruti junioris cujuscunque sanguinem senis venæ infundere partim cum eodem senis periculo conjunctum, partim etiam ideo inconsultum esset, quoniam, ut iterum repetamus, & hîc maxime

humano miscela per Transfusionem oriundis concepimus, persuasi, exinde potius salutem ac sanitatis amissæ redintegrationem homini sperandam esse. Huic ut satis faciamus dubio, necesse est, submonere, illud, quod præcipuam inter omnes sanguinum species constituit differentiam, non esse externam formam, nec tam promptè in oculos incurrere, sed esse quoddam internum principium, à quo cujuslibet sanguinis operationes potissimum dependent, quod sive ipsam animam voces, sive flammam vitalem sanguinem quasi modificantem ac informantem, perinde erit. Ad hunc sensum D. Mauricius Hoffmannus, Vir quovis titulorum firmate major, Fautor & Collega noster Venerandus, *Prudent. Med. Disputat. 6.* disertè, ut omnia, Sanguis, inquit, licèt in viventibus sanguineis omnibus ex flamma vitali maturante rutillet; non tamen omnibus unus idemq; habetur, sed pro diversitate flammæ animatæ ipsi cohærentis variat; hincq; pro me concludit, ideo ex sanguinis adhuc ferventis cum alterius sanguine communione sive per os, sive per vasa, non posse non corporis pristinum temperamentum in discrimen vocari, adeoq; animi mores, temperamentum sequentes, mutationem subire. Nam, ut paulò curatius rem explicemus, quoniam cujuslibet animalis specifica forma per sanguinem potissimum operatur, indeq; morum etiam ac temperamentorum diversitas

tas resultat; necessario sequitur, inter ipsas quoque sanguinum species ingens occurrere discrimen, & aliter fieri non posse, quin ex calentis adhuc & animati beluini sanguinis per Transfusionem institutā in hominem insitione, ob utriusque sanguinis dissimilitudinem & heterogeneam pororum ac figurarum constitutionem, non solum perniciosa in homine pullulet dyscrasia, sed & temperamentum simul atque mores ejus mutantur; ut silentii sipario involvam, etiam accuratum oculorum examen adhibenti inter brutorum atque hominum sanguinem se aliquam manifestare solere diversitatem; quandoquidem ille ob eruditatem alimenti & caloris nativi plerunque crassior; hominum sanguis autem & quidem bene valentium, bonoq; corporis habitu præditorum comparatè loquendo per naturam, ob flammæ vitalis puritatem, ut plurimum tenuior puriorq; reverā apprehendatur.

Imò ne quidem rectè instituitur comparatio inter sanguinem bruti atque hominis in patinam effusum jamq; refrigeratum, eo quod non refrigeratus & in patinam prius effusus bruti sanguis, sed calens adhuc, & quidem immediatè, per brevem saltem tubulum, in hominis venam transfundi præcipiatur, sanguisq; refrigeratus & extra vasa sua delatus cruor potius dicendus, & non nisi *non est sanguis*, nec propriè magis sit sanguis, quam

quàm cadaver humanum homo est. Differt ergo utique inter se sanguis beluinus & humanus propriè dictus; caduntq; & hi causâ suâ, qui ex dissimillimâ falsoq; creditâ utriusque similitudine pro Sanguinis beluini in hominem Transfusionem argumentum depromere satagunt.

CAP. VI.

Positiones, siue argumenta aliquot ex sacris & profanis Scripturis contra Transfusionem afferuntur, quæ Romæ & Lutetiis Paris. interdicta est; & ab aliis etiam Cl. Viris improbatæ. Duplici gravissima occurritur objectioni.

Actenus in refutatione eorum argumentorum occupati fuimus, quæ vel reverâ à quibusdam eruditissimis aliis Viris pro Transfusionis Invento afferri novimus, vel pro eâ afferri posse visa nobis sunt. Nunc positiones quasdam adducemus, quæ nudè idem Artificium impugnare ac dissuadere videntur. Non autem dicam, aliquot jam abhinc annis Romæ, & nî fallor, Lutetiis quoque Parisiorum publicè interdictum esse, ne quis posthac circa sanguinis è bruto in hominem Transfusionem faciat experimenta, idq; dubio procul ideo, ut, cum infelix plerunque, sæpe etiam funestus ea exceperit eventus, alii cautius mercari, & beluinâ hâc Operatione penitus in posterum desistere discant. Nec huc in

meas partes traham, quòd aliis etiam non inglorii nominis Viris novus hic, sanguinem à bruto in hominem elutriandi, modus non solum à primo statim ejus exortu, ob prægnantes rationes, suspectus, sed & itidem indignus visus fuerit, quem posteritas imitetur; adeo, ut impense mirari subeat, esse nihilominus hodiernum etiam in Germania, qui noviter excogitatam Artem hanc publice extantibus Scriptis propugnare ac commendare ausint. Sed id potissimum hîc loci agemus, ut, quæ restant argumenta, in nostræ sententiæ patrocinium congeramus, & sacrarum literarum non minus, quàm profanorum Scriptorum, ex sanguinis naturâ eruendis testimoniis evincamus, beluini sanguinis, maximè, calentis esum usumq; internum homini interdictum atque noxium esse; ut hinc constet, multò minus cum immediate in venam hominis transfundere licere.

Ipsæ sapientissimus Deus, cujus consilia inscrutabilia sunt, non uno sacrarum literarum loco, Mystis suis præconibus, beluini sanguinis usum sub indignationis pœnâ humano generi prohibuit; ut videre est, *Genes. c. 9. vers. 4. Levit. c. 3. vers. 17. & cap. 7. vers. 26. 27. itemq; cap. 17. vers. 10. 12. 13. nec non cap. 19. vers. 26. Deuteronom. cap. 12. vers. 16. Samuel. cap. 4. vers. 33. & 34. &c.* Hæc interdictio etsi nobis sine ullâ additâ ratione sufficientissima, & tanta omnino esse possit, ut, ne
latum

latum quidem unguem, ab ea discedere nobis liceat: *Ἀὐτὸς* enim *ἰφθα*, cujus autoritas scrupulosissimis etiam sciolorum rationibus præstat, cujusq; oraculo nudè acquiescere tenemur; tamen *Levit. imprimis cap. 17. vers. 11. & 14.* ponderosissimam subnectit rationem, quod nempe anima omnis carnis in sanguine sit; vel, ut nonnulli gravissimi interpretes, apud Thom. Bartholinum, de *Sanguine Vento*, allegati reddunt, sanguis, maxime, brutorum, nil nisi ipsa anima, sive *ψυχὴ καὶ πνεῦμα* sit; unde nominatus, nec unquam satis laudandus Author, ubicunque, inquit, sanguis animalis, ibi ejusdem anima est. Ipsa quippe anima illius, nil nisi sanguis. Jam si hoc Dei præceptum, quod nondum ullibi verè abrogatum legimus, quodq; non paucos, quibus veteres mores hodieq; inter Christianos curæ cordiq; sunt, adhuc religiosè, ne feros mores vel induant, vel testentur, servant, esum duntaxat beluini sanguinis vetuit; ipsi judicent, qui nobis adversari fortè cogitant, annon optimo jure idem ad Transfusoriam quoque Chirurgiam applicare liceat, & annon multò magis, bruti alicujus spirantem calentemq; sanguinem, immediatè in hominis venam derivare, interdici videatur?

Profanorum Scriptorum huc facientia testimonia quod concernit, præter ea jam suprà hinc inde in medium allata, notum est, sanguinem à quibusdam magni nominis Vi-

ris dici naturale animæ vinculum & instrumentum: visibilem animæ substantiam: animæ genium, & tantum non animam ipsam. Imò ex Aristotele *de Anima Libr. 1. text. 32.* constat, Critiam, Philosophum quendam, conceptis verbis sanguinem vocasse animam. Et Virgilius *Aeneid. Libr. 9. vers. 350.* Rhætum ab Euryalo ense confossum purpuream vomuisse animam, id est, sanguinem, canit. Andr. Libavius *de Indicio & Explorat. Homicida. nefar. ex sanguine interempti vi injustâ*, Sanguis, inquit, instar totius est: omnium enim membrorum potentias obtinet; & paulò antè: in sanguine, ait, videtur naturæ aliquis characterismus positus. Nec hinc abiit Jacob. Martini, *de Cognitione sui, Dissutat. 1. Probl. 6.* qui itidem in sanguine characterem mysticum esse ex Oraculis divinis & sacrificiis vetustatis testatum facit; quæ omnia eleganter confirmat Andr. Vallesius, *Sacr. Philosoph. cap. 5.* quando quærit: quid est, quod ferveat per iram, fugiat per timorem, per mœstitiam pigrescat, per gaudium effundatur, per pudorem in faciem occurrat, quam sanguis & vitales spiritus? Necessè igitur est, animam, cujus sunt hi affectus, in sanguine esse aliquo modo, quo in nullâ aliâ re eorum, quæ ad corpus nostrum pertinent; siquidem nulla alia ita movetur per animæ affectiones. Est igitur anima in sanguine modo quodam diviniore, quam in ullo alio instrumento, quia nulla alia in re mani-

manifestius, quam in eo operatur. Quin potius videtur, ipse sanguis, animæ proprias operationes operari, esseq; velut alia quædam anima corporalis, & manifesta, exprimens suis operationibus illam primam & veram animam. Hæc hætenus dicta etsi non omnia accuratam Philosophorum limam sustineant, certum tamen est, ad brutorum sanguinem aptius quadrare, quam ad sanguinem hominis, qui diviniore utique naturæ animâ gaudet; quanquam & ipse brutorum sanguis spiritu plenus, ejusq; admistione calens elementorum naturam reverâ transcendat. Sanguis, inquam, calens, quem perpetuò hîc intellectum volo, probè memor, sanguinem refrigeratum propriè non sanguinem, sed cruorem rectius appellandum, & de sanguinis propriè dicti formali essentiâ esse, ut caleat, animatus sit, & vivat. Interea, nil vetat, quin vereamur, ne, si sanguis bruti ejus animæ genius, imò instar totius est, id est, totius animalis proprietates atque naturam refert, omniumq; membrorum potentias obtinet, & naturæ characterismum impressum habet, humano sanguini per Transfusoriam Artem affusus bruti naturam, genium ac proprietates homini ita impressurus & affricurus sit, ut hic ferinam inde naturam habitumq; fortassis, aliquantum induat, maximè, cum ex Aristotelis, quem primo loco nominare debuissemus, *Libr. 2. de Anim. Part. cap. 3. & 4.* præterea

constet, cum sanguine semper communica-
ri aliquid ejus naturæ, cujus propriè est
sanguis.

Porro non prætereundum, sanguinem ad
intellectum, rationem & prudentiam pluri-
mum facere; quod Divi Hippocratis impri-
mis autoritate liquet. Ita namq; *Libr. 1. de*
Morb. Sanguis, inquit, in homine maximam
confert partem ad intellectum, nonnulli
etiam dicunt, omnem: & *Libr. de Flatibus*
edit. Foes, p. 300. existimo, ait, imprimis
nihil magis eorum, quæ in corpore nostro
sunt, conferre ad prudentiam, quàm sangui-
nem. Hic enim si in consistenti habitu, situ
& naturali dispositione manserit, manet &
prudentia; mutato verò sanguine, permuta-
tur & degenerat prudentia. Atqui hoc ita se
habente, quæ homini à transfuso bruti san-
guine speranda prudentia? Si qualis sanguis,
talis etiam ratio, nonne verendum, ne obli-
teratâ à beluino sanguine humanâ ratione
homo obbrutescat, nec ultra brutum, amissâ
ratione, deinceps sapiat? Mutatur enim ho-
minis sanguis à traducto bruti sanguine,
quam ipsam mutationem prudentiæ dege-
neratio, ex Hippocratis mente, sequitur.

Hic autem duplex exsurgit difficultas,
cui, antequam hinc abeamus, occurrere,
non abs re erit. Una est, quâ objicitur,
omnium animalium sanguinibus eandem
adhærere flammam vitalem, nec unam ab al-
terâ differre, esseq; eam in brutis nihil aliud,
quam

quàm ipsam eorum animam; atque hinc ex
transfuso bruti in hominem sanguine nul-
lam metuendam animarum confusionem,
nullamque humanæ naturæ in beluinam mu-
tationem, eo quòd bruti anima seu flamma
vitalis ab hominis flamma vitali nihil diffe-
rat. Verum adhuc probatione indiget,
omnibus animalibus unam eandemq; flam-
mam esse vitalem. Dicere, non satis est, sed
& probare decet. Negabunt certè & perne-
gabunt alii plurimi. Et mihi quoque nequa-
quam videtur, certò potius persuaso, omni-
bus quidem animalibus brutis unam ean-
demq; ingeneratam esse genericam formam,
sed singulis eorum speciebus specificam,
præterea datam esse formam, pro cujus di-
versimodâ varietate ipsa quoque flamma vi-
talis & sanguis, nec non exinde potissimum
resultans temperamentorum & morum con-
stitutio, variet. Secundum hanc specificam
sive peculiarem formam quodlibet animal
est, quod est, differtq; unum ab altero, sine
quâ si esset, nec canis à felle, nec agnus à vi-
tulo differret. Secundum genericam enim
sive universalem formam ut omnia bruta in-
ter se conveniunt, nempe in brutalitate, ita
nec sanguinem, nec ejus vitalem flammam
secundum eandem variare dici verè po-
terit. At specifica cujuslibet bruti forma
sanguinem ejusq; flammam vitalem ita in-
formare ac modificare videtur, ut non possit
non inde quoque sanguinis flammæq; vita-
lis

lis varietas contingere, quam certò, testantur & arguunt varia animalium temperamenta, & varii eorum mores. Nam quâ aliàs fronte Aristoteles *loc. cit.* asserere potuisset, cum sanguine communicari aliquid ejus naturæ, cujus propriè est sanguis; aut Libavius: in sanguine naturæ characterismum positum esse; nisi uterque intellectum voluisset, cum sanguine animalis proprios simul ejus mores à specificâ formâ dependentes & ex peculiari crasi fluentes communicari. Sic illa Uratislaviensis puella ex ingurgitato felino sanguine non generaliter feritatem, sed felis in specie naturam atque mores, prout jam suprà relatum, sibi contraxit. Sic ille superius memoratus suillo sanguine pastus, non generalem bruti naturam, sed porcorum speciales mores induit, & ut illud ipsum animalium genus solet, luto similiter ad fastidium usque se delectavit, teste Sperlingio, *Institut. Physic. Libr. I. c. 3. ad Precept. 3. p. m. 82.* Haud secus in aliis quoque suprà adductis contingit exemplis. Sic deniq; canes naturâ mitissimi, calido bestiarum cruore hausto, earundem peculiarem indolem imitari discunt, similiterq; mordacissimi, & non tantum ad pecudum instigationem, sed & ad leporum propulsionem utilissimi sunt.

Nondum itaque nos pœnitet, jam suprà dixisse, & sanguinem & flammam vitalem in animalibus plurimum variare. hicq; etiam
numa

num arguimus, ex transfuso in hominem fervido, vivo, vitalisq; flammæ & spiritus saturo, vel, ut Helmontius *Magnet. Vulner. Curat.* §. 156. & 170. effert, animam adhuc continente, bruti alicujus sanguine perniciosam animarum confusionem & beluinarum morum traductionem omnino metuendam esse, cum bruti anima seu flamma vitalis ab hominis flammâ vitali utique differat.

Alterâ difficultate quæritur, utrum bruti in hominem derivatus sanguis hominis sanguinem mutet, an potius ille ab hoc mutetur? Illud communiter fieri creditur; quandoquidem in hac mutatione præcipuus Transfusionis usus consistere ab ejus Patronis putatur, huncq; ipsum in finem bruti integer ac intaminatus sanguis in hominem malè se habentem ac infirmum traduci præcipitur, ut ille hominis corruptum sanguinem immutet, hoc est, corrigat; quod certò futurum perhibetur, quòd bruti sanguis illibatus, adeoq; potentior hominis sanguinem vitiosum, hincq; viribus inferiorem, factâ utriusque in hominis vasis miscelâ, facile subjugare, in sui naturam convertere ac emendare posse videatur, maximè, si paulò plus beluini sanguinis in hominem derive-
tur. Hoc autem ubi evenerit, nonne iterum verendum, ne beluinus sanguis domi-
nium in homine potitus bruti sui naturam, quam refert, atque mores, simul ei affricaturus sit? Nihil enim est, quod Vir quidam Cla-

rissimus

rissimus

rissimus in doctissimis ad me aliquando datis literis suis regessit : hoc non metuum dum esse ex parte tantum beluini in hominem transfusi sanguinis, sed tum demum, si omnis bruti sanguis in hominem elutriaretur, quod specifica animalis forma per universam sanguinis massam diffusa exeuntem è venis sanguinis partem deserat, inq; residuo sanguine remaneat. Sed partem etiam, & non tantum totam sanguinis massam sacra Scriptura. supra *cit. locc.* ob jam aliquoties commemoratas rationes comedere prohibuit. Nec credibile est, Aristotelem intellexisse, cum totam sanguinis massam aliquid ejus naturæ communicari, cujus propriè est sanguis, sed sine omni dubio, cum parte etiam tantum sanguinis. Accedit, quod nihil obstat, quo minus etiam de brutorum animam affirmemus, eam totam esse in toto, & totam in qualibet parte, idq; eo audacius, cum anima brutorum æquè ac vegetabilium suo modo divisibilis sit, ac sui multiplicativa.

Alii verò defendere malunt, factam beluini sanguinis in hominem Transfusionem, illum potius ab hominis sanguine mutari in sui naturam, cum primis, si aliquot saltem illius guttæ, aut una tantummodo atque altera uncia in hominis venam immissa fuerit, rati, quemadmodum una tantum mensura exquisitissimi & delicatissimi saporis vini totam amphoram vini accescere incipientis aut alterius

terius non adeo boni saporis emendare ac restituere nescit, sed similiter

sincerum est nisi vas, quod, cumq, in fundis acescit;
ita etiam paucam beluini sanguinis in hominem inserti quantitatem, a præexistente hominis sanguine mox in sui naturam raptum ac commutatum iri; attestante id etiam elegante experimento, quo constat, sanguinem scabiosi canis in boni habitus canem derivatum ab hujus sanguine ita immutatum esse, ut scabiei nullam prorsus notam in illo cane, qui scabiosi canis sanguinem recepit, deprehendere licuerit; haud obscuro indicio, sanguinem canis scabiosi alterius canis sanguinem nequicquam alterasse, sed illumpotius ab hoc alteratum esse. At hoc si contingit, nullum video usum Transfusoriæ Chirurgiæ, nullumq; emolumentum, quod ex ea in hominem redundet. Quid ergo? Anhe fortassis mediâ viâ incedere, ac dicere libet, sanguinem bruti hominis venæ infusum partim hominis sanguinem alterare, partim etiam per reactionem alterari? Sic verò non tanta, nec major efficacia ex Transfusionem speranda, quàm ex vulgari-
bus morbo ritè oppositis medicamentis. Ut adeò ob solam elementitiam humani sanguinis alterationem non laboriosam illam & periculo plenissimam Operationem adhibere, necesse, sed medicamentis tantum uti consultius, videatur. Itaque quoquo se verterint, caput allident, nihilq; agent; sive hoc,

hoc, siue illud, siue istud, dicant. Prius autem quia plerisque placet, & fundamenti quasi loco pro asserendo Transfusoriae Artis praecipuo usu habetur, ideo, si fieret, exinde metuenda damna, aliquot insuper similibus, quibus nostra, contra Transfusionem, sententia, si non probari, certe tamen illustrari posse videtur, ulterius Capite sequenti ostendere conabor.

CAP. VII.

Aliquot Similitudinibus nostra sententia contra Transfus. Sanguin. illustratur.

PAuxillæ saltem prolifici utriusque seminis in fecundo utero invicem copulati guttulæ illius animantis, à quo defluxere, ideam quasi in se continent, hincq; totum sibi simile, id est, ut Aristoteles, *de Generat. Animal. L. I. c. 18.* explicat, cum quoad corpus, tum quoad animam, producere aptæ natæ sunt. Quid nî ergo bruti sanguis, ad plures sæpe uncias, isq; animæ suæ præsentia non minus turgens, hominis venæ brevi saltem intermedio tubulo instillatus ectypam quasi sui imaginem ita in homine relinquere possit, ut verendum sit, ne ita similiter in idem penè brutum inde degeneraturus sit?

A pyro divulsus ramulus, pomoq; insertus, suam indolem non mutat, inq; pomo non poma, sed pyra facit. Sic vero consentaneum

nūm videtur, sanguinem bruti in hominem derivatum, suam non exuturum beluinam naturam, inq; homine non humanas, sed beluinas potius, tanquam fructus, editurum esse actiones.

Ita plantæ quoque semen formam atque animam totius plantæ complectitur, suiq; simile, fœcundæ terræ commissum, propignere solet, sine destructione aut corruptione plantæ; cujus anima etsi per se non sit quantitas, dividitur tamen suo modo ad divisionem materiæ, & una numero actu existens, multiplex est potentiâ, sitq; actu per semina multiplex, ad subjecti corporis divisionem, docente id nos fidelissimo Dan. Sennerto nostro *Hypomnem. Physic. I. cap. 3. sub fin.* Pari ratione sanguis bruti calens, Transfusionis lege, in hominem propagatus, totius bruti ideam comprehendere, eamq; homini ita imprimere posse videtur, ut similes bruti actiones in homine inde pullulent, idq; sine interitu ipsius bruti, quippe quod suam numero tantum unam animam nihilominus retinet, ut ut eam per generationem & hanc sanguinis fortassis infusionem, quâdam quasi divisione, in aliud etiam corpus traducere posse videatur; consimili dubio procul modo, quo flamma candelam, eodem lumine translato, accendit, sine sui extinctione.

Canis rabidus morfu suo, per salivæ communicationem, eosdem penè homini aspergit affectus, quos sibi proprius habet, fa-

citq;

citq;

citq; , ut homo non minùs , ac ipse solet ,
 aquas , & quævis propemodum liquida , ab-
 horreat , obvios torvum intueatur , & qui-
 dem rubentibus oculis , notos ignotosq;
 dentibus impetat , spumam ex ore emittat ,
 linguam exerat , nonnunquam etiam latret ,
 aliaq; hydrophobis familiaria patiatur sym-
 ptomata , idq; non aliunde , quàm quòd rabi-
 di animalis saliva , velut peregrinum ac pecu-
 liare quoddam fermentum , sanguinem præ-
 cipue spiritusq; hominis impetuosisimè
 concitet , & potenti suâ activitate in sui quasi
 naturam convertat , atque hinc hominem in
 similem furorem agat. Haud multò secius
 sanguis bruti in homine quoque pristinas
 facultates suas retinebit inq; actum deducet;
 adeo , ut post homo , sanguine suo inde adul-
 terato , ejusdem bruti affectiones imitari
 discat.

Sic etiam Tarantula morfu , cum viroso hu-
 more , quandam potentiam animæ suæ , quæ
 itidem ad habitudinem materiæ divisibilis
 habetur , in hominem simul transfert , hincq;
 ei non modò amorem ejusdem rerum colo-
 ris , quo mordens bestia nitet , ingenerat , sed
 & facit , ut Tarantismo affectus eodem Mu-
 sicæ modulo delectetur , & ad choreas invite-
 tur , ad quem Tarantula , quæ morsum in-
 fluxit , tripudiare solet. Ad hunc modum
 quin bruti sanguis hominis venæ infusus , in
 hoc illius animæ præsentiam per actiones
 beluinas manifestare possit , nulli penè dubi-
 tamus.

Canta-

Contagiosorum morborum ea est natura, ut in aliud dispositum corpus facile transeant, eiq; , translato eodem contagio, homogeneam inferant affectionem. Cum itaque contagiosum hoc seminarium, quod sive peculiarium fuliginum, sive atomorum, aut minimarum particularum formâ, ab eo, qui contagioso morbo laborat, in aliud subjectum transiit, tantæ est efficaciæ, ut, huic communicatum, eundem affectum, quo detinebatur is, à quo emanavit, vitali nectare à pristino statu ad sui quasi naturam flexo, affricare valeat; cur vitio nobis vertatur, si suspicemur, sanguinem bruti recentem, activum, potentemq; humano sanguini affusum, ei suam energiam ita impressurum, ut homo, inde ad bruti naturam vergens, ejusdem actiones, quæ ab anima per sanguinem fiunt, deinceps æmulaturus sit?

Deniq; quemadmodum medicamenta, præcipuè occulta vulgò dicta, non solum caliditate, frigidityte, humiditate aut siccitate, sed potissimum specificâ, formali & peculiari qualitate, quâ sunt, quod sunt, quâq; à se invicem distinguuntur, in corpus nostrum operantur, eamq; non amittunt; ita censendum, sanguinem bruti, in hominem derivatum, non solâ caliditate, frigidityte, humiditate aut siccitate in humanum sanguinem acturum, sed specificam suam proprietatem simul inveciturum; adeo, ut postea

secundum eam in homine etiam acturus sit id, quod egit in bruto: quo non potest aliter fieri, quin insolens in corpore non temperamenti solum, sed & morum haud raro fiat mutatio.

Hæ hæcenus in medium productæ similitudines etiam, ut omnes solent, in quibusdam nonnihil claudicare, suasq; pati instantias videri possint; tamen, si suo sensu applicentur, mentem nostram non parum illustraturas confidimus.

CAP. VIII.

Reliqua damna atq; pericula ex Transfusione metuenda in medium proferuntur.



Superest, ut, quæ restant, damna atq; pericula ex beluini sanguinis in hominem Transfusione metuenda porro breviter persequamur; quæ inter primo loco illud nominandum, quod verendum sit, ne illo animali, cujus sanguis in hominem traductus est, vel graviter ægro tante, vel ipsam vitam cum morte commutante, ipse quoque homo, qui istius animalis sanguinem intra venas suas fovet, ob mutuam sympathiam, aliquid adversi in corpore suo similiter sensurus, vel vitam etiam cum morte commutaturus sit; id quod futurum, per aliquot haud contemnenda phenomena declarare placet.

Artificialis nasus, pro tollenda deformitate

tate ejus , qui genuino naso orbatus est, à Casp. Taliacotio inventus, putredine corrumpi ac decidere dicitur, quamprimum ille, ex cujus carne nasus iste factitius constat, supremum diem obit. Titius ex Claudii intra carnem suam conclusis aliquot saltem sanguinis guttulis, ob singularem magnetismum, Claudii fortunam, valetudinem & obitum rescire posse creditur. Non secus ac Veteres, pro confirmandis fœderibus, mutuum potasse sanguinem legimus; ut inter utrumque ex sanguinis arcanâ conspiratione perpetua stabiliretur amicitia. Hos nonnulli etiam moderni seculi imitantur, mutuâ sanguinis communicatione amicam sui memoriam similiter invicem commendantes, spe, fore, ut etiam inter absentes certis notis ea perennet. Et, ut fide dignissimi Authores referunt, Burggravius ex sanguine humano lampada confecit, quæ, semel accensa, jugiter ardebat, quoad homo ille, è cujus sanguine parabatur, vitalem duxit spiritum: extincta autem eodem horæ momento est, quo ille obiit. Is, cujus sanguis venæsectione extractus malè tractatur, exinde aliquod in se quoque nocumentum sentit: obq; hanc ipsam causam sanguis emissus torrenti committi solet. Hinc etiam, ex lactis in ignem effusione, uberum dolore afficitur illud animal, cujus lac est. Et, combustis alvinis excrementis, is, cujus ipsa sunt, ex intestinis laborare incipit. Imo surculus quoque, per

infitionis modum arbori implantatus, plerunque deficit, deficiente ipsâ arbore. Et quæ sunt hujus commatis alia Transplantationis & mirabilis sympathiæ exempla. Ex quibus haud difficulter colligere est, quanto cum periculo è bruto in hominem celebretur Transfusio, & quidem eò majori, quò illa animalia, quæ ad hanc Operationem adhiberi solent, brevioris, præ homine, plerunq; sunt vitæ.

Deinde, siue sanguis bruti hominis partes nutrire, siue non nutrire posse dicatur, utrinque periculum imminet. Et quidem ibi, quia sanguis bruti omnium ejus membrorum potentias obtinet, hincq; verendum est, ne, nutriendis hominis membris subinde appositus, tandem ea secundum suas potentias transformaturus, & in beluinam propemodum speciem conversurus sit: idq; non sine scèdâ dedecoratione, & inæstimabili damno; cum nutritum nutrientis naturam nunquam non sequi soleat. Atqui nutriendus hîc ejus animalis sanguis est, cujus membra ab hominis membris conformatione plurimum discrepant; unde, quin illæ sanguinis istius particulæ, quæ solummodo vituli aut agni carnem cutemve hirsutam nutrire aptæ natæ sunt, hominis carnem cutemve turpiter defœdaturæ sint, nullum pene est dubium; quomodo jam supra, in hædis & agnis, ex inverso lactis tantum nutritu talem lanæ degenerationem contingere

tingere solere , ex Gellio retulimus.

Si verò statuatur, quòd, quemadmodum simile animal non generatur à diversæ speciei seminibus , etsi utrumque semen colore & substantiâ inter se sit similitum ; ita sanguis illius quidem animalis , in quo generatus est, non autem alterius specie ab illo differentis partes nutrire possit, licèt hic sanguis ab illo sanguine quoad sensum externum similiter nihil differat ; idq̃ ; ob hanc præterea rationem, quòd cujuslibet sanguinis ideales & singulariter signatæ particulæ, huic vel illi corporis parti alendæ dicatæ, suam figuram suumq̃ ; characterem mutare, aliamq̃ ; propriam dispositionem recipere debeant, si velimus, ut aliûs etiam animalis partibus nutriendis aptæ reddantur ; id quod autem quia impossibile , impossibile etiam quibusdam videri possit, ut sanguis bruti nutriat partes hominis. Hoc, inquam, si statuatur, hui ! quàm ingens iterum metendum damnum.

Nam ut de illis incommodis , quæ hominem ideo manent, quia rarò bruti atque hominis, in quo Transfusionem celebrare animus est, exactè sibi invicem respondet temperamentum ; metus præterea est, ne sanguis bruti, in hominem transfusus, dum hujus partes non nutrit, vitium contracturus, multorumq̃ ; malorum fons & origo futurus sit : quandoquidem ex maximè heterogænearum inter se portionum sanguinis belui.

ni & humani, puri item & impuri in humano corpore miscelâ non potest non sanguinis turbatio, fermentatio, & non modo februm incendium, sed & alia inde pronascoli symptomata, pessimis ejus hominis, in cujus corpore hæc contingunt, concitari.

Ultimò sicut Hippocrates scribit, & experientia testatur, sanguinem, sicubi extra propria vasa sua digressus fuerit, vitium capere ac concreescere; ita non levis suspicio incidit, bruti sanguinem, per canaliculum in hominem derivatum, in hoc velut extra vasa sua non minus constitutum, nî suam indolem retineat (retinet autem adhuc majori cum hominis pernecie) labem similiter contracturum, & cum ejus hominis, in cujus venis tale quid contingit, ingenti damno coiturum esse. Nec est, ut quis hîc inferat, sanguinis motum, dum is ab uno animali in aliud transfunditur, neutiquam intercipi, nec in illis canalibus, per quos sanguis transmeat, modò probè incaluerint, nullumq; intra cavitatem suam aerem admittant, ullo modo inhiberi, adeoq; nullam sanguinis beluini concretionem in hominis sanguifluis vasis metuendam esse. Utiq; enim adhuc inconcussa Hippocratis videtur sententia, quâ docuit, sanguinem vasis suis, propriis scilicet & adæquatis, elapsum corrumpi. Propria autem & adæquata, pro continendo hominis sanguine, vasa, nec canales qualescunque, etiamsi calefacti, nec va-

sa bruti esse possunt. Siquidem cujuslibet animalis sanguinis vasa propria & adæquata illa solummodò sunt, quæ illud animal per corpus suum dispora habet. Ita vasa propria Petri, Petri vasa sunt, & non Pauli; multò minùs alicujus bruti. Hinc sanguis bruti, per canales in hominem derivatus, propriis vasis suis omninò egressus videtur, non sine metu, ne eo, quo diximus, modo, juxta Divi Senis nostri latum effatum, coiturus, & humano corpori multifariam incommodaturus sit.

CAP. IX.

Transfusio Sanguinis ex homine in hominem duplici modo fieri potest: nec approbatur, nec improbat, sed in medio relinquitur, & ad experientia examen relegatur.

TOronidis quasi loco succinctum, necesse placet Discursum, de tertia Transfusionis Sanguinis specie: intellige illam, quæ fit ex homine in hominem. Hujus duplex methodus atque ratio est. Primam Clariss. Johanna, Daniel Major, *De lib. Hybern. Nov. Invent. Medic. II.* brevi velut sciagraphiâ exhibet, & primus articulatè, his penè verbis descripsit: In promptu sint duo homines, quorum alter athleticò, hoc est, carnosò, sanguineo ac valdè salubri corporis habitu gaudeat; alter verò valetudinarius sit, & pravis humoribus

„ abundet. Prægressâ blandiusculâ alvi
„ laxatione, utrique ligatura fiat in brachio
„ dextro vel sinistro. Locentur sic, ut sibi
„ faciem obvertant, & brachia eorum liga-
„ ta decussatim sibi admoveantur, cum opus
„ est, h. e. quando Instrumentum Infuso-
„ rium mox mox applicandum erit. Vena
„ enim utrique prius secanda est, ordine se-
„ quenti: Primum aperiatur vena per lan-
„ ceolam Valetudinario, & permittantur ef-
„ fluere sanguinis unciaë tres, quatuor, plus
„ minus. Elapsis his, solvatur ligatura, & in
„ loco humiliori brachii, infra foramen,
„ venæ inflatum, rursus adstringatur, ut In-
„ strumentum Infusorium, mox describen-
„ dum, quoad angustiores sui extremita-
„ tem, intrudi in venam, nec ab affluente
„ ullo, ex regione manûs extremæ, sangui-
„ ne multum perturbari possit. Instrumen-
„ tum, foramini sectæ venæ insertum, ab Ad-
„ ministro tantisper quietim teneatur, ne
„ retrorsum tendat, usque dum vena alteri
„ quoque homini secta sit; id quod sine am-
„ plioribus moris fieri debet. Continuo
„ itaque vena etiam sano homini secetur, ut
„ sanguis profluat ad totidem circiter un-
„ cias, sed cum hac differentiâ, ut hic poste-
„ rior sanguis effluens externum aerem non
„ attingat, quia in usum Medicum converti,
„ & derivari per Instrumentum in venam
„ valetudinarij hominis debet, ut is in me-
„ liorem valetudinis statum reducatur.

Instru-

Instrumenti autem species ita formata,
requiritur : Fiat Canalis vel Tubulus ar-
genteus, longitudine circiter duorum di-
gitorum (loquor hîc physicè, & digitos
intelligo non geometricos, sed vulgares,
ad manum pertinentes, annulares vel in-
dices) amplitudine æquali, & qui qua-
tuor, quinque vel sex uncias aquæ, vel
liquoris alterius, possit capere. Ita orifi-
cium anterius respondebit præter propter
orificio cucurbitulæ vitreæ minoris. Et
quemadmodum cucurbitulæ vitreæ arctis-
simè cuti affiguntur; ita Instrumentum
istud Transplantatorium etiam notabili
orificio gaudere debet, quò cutim in bra-
chio hominis sani arctè complectatur, &
missum ex vena sanguinem, statim atque
vena secta est, recipiat, ne quicquam il-
lius foràs prolabatur. Alterum verò ori-
ficium Instrumenti non patère, sed maxi-
mam partem clausum esse convenit, nisi
quod in canaliculum subtilem, brevem, &
curvum terminetur, qui venam sectam ho-
minis valetudinarij initio statim subeat;
ut paulò antè innuimus, & transmissioni
inserviat sanguinis, ex corpore hominis
sani derivandi. Ubi itaque duo isti homi-
nes, debito modo collocati, & mediante
Instrumento hoc, quoad brachia sibi
juncti, magnam Inventi nostri partem dex-
trè admiserint, atque ex vena hominis sa-
ni jam tantum sanguinis effluerit, quan-

„ tum replendo canali sufficere, extempo-
 „ ris intercedentis mensurâ exercitatus ve-
 „ risimiliter colligit Chirurgus; tum homo-
 „ sanus dimittatur, venaq; secta eidem ab
 „ Administro aliquo obligetur. Ipse Chirur-
 „ gus verò agili manu orificium Instrumen-
 „ ti obtegat, ne aliquid sanguinis promanet,
 „ vel partes ejus qualescunque spirituosio-
 „ res transpirando in auras eant, & cruor
 „ exanguis in tubulo relinquatur. Hinc
 „ continuo embolum vel scapum intrudat,
 „ qui suâ crassitie & rotunditate cavitati tu-
 „ buli exactè respondere debet. Usus ejus
 „ est, ut, quò profundius (sensim tamen,
 „ nec violenter) intrusus in fistulam fuerit,
 „ sanguine repletam, eò magis magisq;
 „ idem sanguis in venam Valetudinarii de-
 „ rivetur. Atque ut hæc Sanguinis Trans-
 „ fusio felicius succedat, utq; tantò minus
 „ sanguis ad ullam sui concretionem intra
 „ tubulum inclinet, inspergi prius intrò pos-
 „ sunt Salis volatilis Cornu Cervi, vel flo-
 „ rum Salis Ammoniaci grana aliquot. Præ-
 „ terea extrinsecus etiam, circa ambitum
 „ tubuli transplantatorii, posset quid admo-
 „ veri, unde sanguinis per ipsum derivandi
 „ fluor conservetur: carbo ardens videlicet,
 „ sicut prope fornaculam Chymicam acci-
 „ dit, ut, in destillatione Butyri Antimonia-
 „ lis, forinsecus rostro retortæ carbo vivus
 „ admovetur.

Alterius, sanguinem ab homine in homi-
 nem

nem transfundendi, Methodi ante plures annos meminisse recordor supra laudatum Mauricium Hoffmannum. Nimirum uterque homo, fellæ infidens, latus lateri ita invicem conserat, ut ejus, qui sanguinem dat, dextra manus sinistræ manui recipientis sanguinem quàm proximè adaptari possit, sicq; dantis dextrum latus recipientis sinistrum latus tegat. Tunc utriusque vena extantior, in dorso manus, vulgari phlebotomo, tundatur; & quidem primùm illius, qui sanguinem dat; mox etiam illius, qui sanguinem recipere debet. Hoc facto, actutum, ac sine ulla morâ ejus, qui sanguinem dat dextræ in dorso manus incisæ venæ brevissimus, isq; non incurvatus, sed rectus & simplicissimus ejus materiæ, quæ huic Operi accommodatior videbitur, quàm fieri potest agilissimâ manu, insinuetur tubulus; & quidem alterâ extremitate versus extremos digitos directus; altera verò ejusdem tubuli extremitas illius, qui sanguinem recipit, sinistræ in dorso manus venæ, cubitum sive cor respiciens, eâdem dexteritate, unoq; quasi ac eodem momento immittatur; probè nunquam non cavendo, ne aër fortè illabatur, aut sanguinis viva virtus longiori morâ altquantisper evanescat.

Transfunduntur autem hac methodo non plures unciae, sed paucae tantum guttæ sanguinis. Hæ enim, quia animatæ sunt, summaq; activitatis, ideo sufficientes esse creduntur.

duntur, quæ minùs sanam mentem, minusq; rectè se habens corpus ejus, in quem transferuntur, quasi per infitionem, restaurare, massamq; ejus sanguineam, velut novo imprægnatam fermento, in contrariam dispositionem cogere possint; quod futurum facile speratur, cum pauca etiam tantum fermenti grana satis magnam massam inquinare ac alterare queant; & ex minima duntaxat scintillula ingens exsurgere possit flamma.

Et is homo, à quo sanguis in alium transfertur, sanæ mentis saniq; corporis, & optimi ac saluberrimi habitus, quin & præterea ejus naturæ, complexionis ac temperamenti sit, cujus sanguis sanguini ejus, cui ille affundendus, qualitatibus contrariari putabitur. Ita Melancholico animosi, alacris, lætiq; Juvenis sanguis infundendus; Maniaco verò, phrenetico aut furioso mœsti, demissi, melancholici, aut fortassis hypocho-ridriaci aliquot sanguinis guttas instillare, vi contrarietatis, præstabit; quò post felix à morbo in sanitatem, velut in contrarium, succedat mutatio.

Cæterum utriusque hætenus descriptæ methodi maximam partem una eademq; finalis causa, seu idem usus esse dicitur, in quorundam, curatu aliàs admodum difficile morborum curatione potissimum consistens, & quidem nominatim eorum imprimis, qui à graviore sanguinis vitio aut corruptione dependent, nec non eorum, qui
hære-

hæreditarii dicuntur, itemq; epilepsiæ, lepræ, rabiei, luis Venereæ, arthritidis, &c. Pro his, inquam, similibusq; morbis vel infringendis, vel pellendis nova hæc, ex homine in hominem sanguinem transfundendi Ars præcipuè laudari consuevit. Imò & senectutem integrâ sanitate gaudentis Juvenis sanguis dicto modo transfusus retardare nonnihil posse creditur. De singulari illo usu, quem ex hoc sanguinis ab homine in hominem Transfusionem sperandum nonnulli autumant, ut nihil hîc dicam. Perhibent autem, hac Sanguinis communicatione etiam disidentium fratrum Germanorum, aut Conjugum discordes animos conciliare licere. Sed de quo judicium meum qualecunque suspendere malo, quàm, cum Doctiorum offensâ, præcipitanter ferre, satius fore ratus, circa hanc Transfusionis speciem in genere, quoad singulos ejus usus, experientiæ judicatum prius expectare.

Nam etsi religioni neutiquam mihi ducam, palam confiteri, hanc Sanguinis Transfusionem, ex homine in hominem quæ celebratur, præ illâ, quæ è bruto in hominem exerceri consuevit, & naturæ ipsi convenientiorem, & homini utiliorem futuram, & cum minori conjunctam videri periculo; tamen pro indubitato ac infallibili præsidio, experimentorum certitudine destitutus, præfractè jactitare nondum audeo. Non hîc tam pernicioſa metuenda animarum confusio, indeq;

indeq; resultans morum abominabilis mutatio. Non verendum, ne nutritionis exinde contingat fœda degeneratio. Non verendum, ne sanguis humanus in sanguine humano tam facillè putrescat, coeat; vitium capiat, maximè, si guttatim tantùm transplante-
tetur. Nec denique verendum, ne vel ille, qui sanguinem dat, vel qui sanguinem recipit, aliud gravius damnum sensurus sit. Solus etiam ille metus, qui ibi concipitur, ne, deficiente illo, qui sanguinem communicat, deficiat & alter, qui sanguinem recepit, tantus hîc non est, partim quia sanguis vel parcius, vel guttatim tantùm, à benè valente in ægrum derivatur; partim quia nunquam non homo incorruptâ sanitate præditus eligitur, à quo sanguis ducatur in infirmum; adeò ut spes lucida affulgeat, illum longior-
em hîc victurum esse vitam.

Hinc nequaquam audiendi sunt illi, qui asseverare non erubescunt, sanguinem brutorum, præ hominum sanguine, ad Transfusionis Opus accommodatiorem esse. Falsum est, quòd bruti sanguis purior sit, quàm sanguis hominis optimè se habentis & planè integri. Et quamvis bruta pro lubitu locare, ligare, imò etiam sine piaculo, pro hominis usu, enecare, &, quæ modò placet, sanguiflua eorum vasa aperire licet; tamen graviora ex beluini sanguinis Transfusione imminet superiùs hinc inde commemorata plura damna, quàm ex hominis in hominem

Trans-

Transfusione, quippe quæ sine omni certè periculo, tutoq; & æquè facile celebrari posse videtur; etiamsi vel maximè is ipse ejus usus, quem Medicus intendit, non usque succederet. Taceo, quòd nec homo uterque laboriosè ad Operationem accommodari, aut difficili molestâq; positurâ multum excarnificari debeat. Quin & hîc vulgari tantum phlebotomo, prout in venæsectione fieri assolet, utriusque vena incidenda, sine dolorosa excoriatione, aut periculosa ejus denudatione; ut adeo major hîc, quàm ibi, non requiratur apparatus. Quid? quòd hic facilius præterea exerceri posse videatur Operatio; cum quia homo semetipsum accommodare potest, & ut convenit, locare; tum etiam quia hîc, & imprimis in Hoffmannianâ Methodo, non tot sanguinis uncia, aut libræ ex eo, qui alterius sanguinem intra venas suas recipere decrevit, prius extrahendæ sunt; quemadmodum ibi fieri debet. Ad hæc hîc quoque miscela utriusque humani sanguinis multò facilior, sineq; tantâ turbatione speranda. Nam ut inter animam hominis & hominis major utique convenientia ac paritas est, quàm inter animam bruti & hominis; ita inter sanguinem flammamq; vitalem, sive calidum nativum duorum hominum major se offert similitudo, quàm inter sanguinem flammamq; vitalem, sive calidum nativum bruti & hominis; ut adeò non possit non duorum homi-

hominum sanguis facilius, & sine tam periculosa mutatione, se invicem permiscere, ac sanguis bruti & hominis se invicem miscet.

Denique si, quod primo loco dicendum fuisset, Veterum authoritati aliquid tribuendum, Ovidii, Marfilii Ficini, Andr. Libavii, & imprimis Johannis Collis, de transfundendo sanguine latum qualecunque testimonium multo rectius huic ex homine in hominem, quam è bruto in hominem instituendæ Transfusioni, suo modo, quadantenus applicare licebit. Quis enim horum Authorum sanguinem è bruto in hominem derivare jubet? Jubent autem sanè, ut hominis prosperam valetudine affecti sanguis in hominem aut morbo aut senectute confectum, & vel convalescere, vel juvenescere cupientem, traducatur.

Fiant ergo crebriora, circa hanc Transfusionis Sanguinis speciem, experimenta, quando, ut diximus, innoxie, vel certè sine tanto periculo, facere ea licet; ut deinceps exactius constet, præstetne hoc Artificium imitari, an potius despiciari.



INDEX RERUM.

A.

- A**limenta pleraque aliquid impuritatis habent. 48.
 à medicamentis quomodo differant? 46. omnia in
 Ventriculo prius concoqui debent. 45. 46. 47
Amentia non curatur Transfusione Sanguinis bel. 18. 19.
 nativa incurabilis. 20
Anima quomodo dicatur esse in sanguine? 28
Animal ad Transfus. quale adhibendum? 1. 2
Alini sanguis an contra maniam? 75. 76

C.

- C**ancer non curatur Transfusione Sangu. bel. 38
Caro, quam comedimus, non mutat mores. 82. cur non
 comedatur cruda? 16. à sanguine bel. transfuso in
 quibus differat. 62. 63
Cervinus sanguis ad quid utilis? 77
Contagiosi morbi quomodo fiunt? 97

E.

- E**lephantiasis non curatur Transfusione sangu. bel. 32. 33
Epilepsia non curatur Transfusione Sangu. bel. 40. 41
Erysipelas non curatur Transfusione Sangu. bel. 35

F.

- F**ebbris nulla Transfusione Sangu. bel. curatur. 27. 28. 29.
 tertiana duplex curari non adeo difficilis. 27
Fœtus & matris sanguis in quibus conveniat? 60. 61
Fœtus in utero per os nutritur. 61

H.

- H**æmorrhagia narium & uteri non curantur Trans-
 fusione Sangu. bel. 37. 38. 39. quibus remediis
 curanda? 37. 38
Hircinus sanguis ad quid utilis? 77
Hydrophobia Vid. Rabies.

I.

- I**nflammationes interna non curantur Transfusione
 Sangu. bel. 37
Instrumenta pro Transfus. Sangu. qualia? 2. 3
Iuvlescere an sit possibile? 79

INDEX RERUM.

L.

- Lac animalium.** 63. 64. 66. cur plerumq, prius coquatur? 64. suctum ex uberibus animalis, ejus proprietates simul communicat. 63. 66.
- Lampas ex sanguine humano.** 99
- Lepra quid?** 32. 33. non curatur Transfusionem Sangu. bel. 32. 33. recens curatu difficilis, 32. inveterata incurabilis. 32. 33
- Lethargus non curatur Transf. Sangu.** bel. 21. 22. 23. 24 25 quibus remedijs curandus? 23. quae habeat causas? ibid.
- Lymphatica Vasa quando, & à quo inventa?** 37

M.

- Mania qualia medicamenta poscat?** 76
- Medicamenta continuanda.** 54. Ventriculum ledunt. 51. cur raro integra ad partem affectam perveniant? 51. 52
- Medicina an imperfecta?** 36. 37 38
- Morbi incurabiles.** 58. 59. chronici subito & uno remedio tolli nequeunt. 15
- Morborum curatio quos scopos habeat?** 35
- Morbus qualis esse debeat pro Transfus. Sangu.** 17. 43. nullus Transfusionem Sangu. bel. curari potest, 18. neque ad 42

N.

- Nasus artificialis.** 98. 99
- Natura an Transfusionem Sanguinis monstraverit?** 60

O.

- Occulta medicamenta quomodo agant?** 97

P.

- Panacea non datur.** 15. 16
- Pancreaticus ductus quando, & à quo inventus?** 57
- Phthisis non curatur Transfusionem Sangu.** bel. 26. cur curatu difficilis? ibid.
- Pleuritis non curatur Transfusionem Sangu.** bel. 37

R.

- Rabies non curatur Transfusionem Sangu.** bel. 39. quomodo fiat? 39. 40. 95. quâ methodo curanda? 39. quibus signis se prodant? 95
- Saliva.

INDEX RERUM.

S.

- Salivales ductus quando, & à quo inventi? 37. 38
- Sanguis quid propriè indigitet? 82. 83. omnium animalium an idem? 88. 89. 90. Canis an contra rabiem? 71. Phoca & Rangiferi an contra scorbutum? ibid. Agni, Aquila, Mustela, Testudinis an contra epilepsiam? 72
- Sanguis beluinus transfusus mutat mores, 62. usque ad 94. recens potus mutat mores. 70. 71. non semper mutat mores, & cur? 74. recens non bibatur. 72. 73. 75. transfusus non faciliat sanguificationem in homine. 45. humano mixtus qua damna pariat? 15. 38. 100. 101 ab humano in quibus differat? 80. 81. 82.
- Sanguis bruti qualis transfundendus? 62. 63. 64
- Sanguis humanus præ beluino præstat pro Transf. 110. an turò & rectè bibatur? 67. 68 bibenti varia damna infert. 67. 68. 69. 70
- Sanguinis circulatio quando, & à quo inventa? 57. defestus unde? 56. præstantia. 86. 87. 88
- Sanguinis beluini usus in Sacris interdictus. 84. 85
- Semen animalium. 94
- Semina plantarum. 93
- Sympathiz exempla varia. 98. 99. 100.

T.

- Tarantismus quomodo fiat? 96
- Thoracicus ductus quando, & quo inventus? 37
- Transfusio Sanguinis in genere quid? 1. quoduplex? 1. 2. an Veteribus quibudam nota fuerit? 4. 5. 6. 7. 8. à quibus verè inventa? 8. 9. 10. quos usus habeat. 11. 12. 43. & seqq. non prolongat vitam. 13. 14. 15. 16. non est impossibile. 30. 11
- Transfusio Sangu. bel. quem habeat usum? 1. 30. nullum curat morbum. 18. usque ad 42. interdicta est. 83. Clarr. quibudam viri improbat. 84. in hominem quomodo fiat? 3. 4. cur non semper ledat? 31. 32
- Transfusio Sangu. è bruto in brutum ad Medicum non pertinet. 11. 12
- Trans-

INDEX RERUM.

Transfusio Sangu. ex homine in hominem dupliti-
mo fit: 102. & seqq. quos habeat usus? 102. in quibus
morbis conveniat? 103. 109. non est periculosa. 109.
110. 111. facilis est. 111

II.

Variola non curantur Transfusionem Sangu. bel. 36. non
admittunt V. S. ibid.
Vena in homine qua aperienda pro Transfus. 2. 104. 109
Vena secta qualis sanguis effluat? 49
Venæsectio non corrigit sanguinem, sed tantum immi-
nuit. 49. 50. non indicatur. 50
Venæsectionis usus seu scopus. 48. 49. 50
Venerca lues quibus remediis curanda? 34. 35
non curatur Transfusionem Sang. bel. ibid.
Ventriculus male affectus an Transfusionem Sanguinis
poscat? 43. 44. 45
Vitæ prolongatio in quo consistat? 16. non impetratur
medicamentis, sed diætâ. ibid.
Ulcera nulla curantur Transfusionem Sangu. bel. 35
Vulnera non sanantur Transfusionem Sang. bel. 37. 38

ERRATA.

Pro exigua, leg. exigua p. 3. lin. 2.
Pro è bruto, leg. ex homine p. 9. lin. 24.
Pro redintegrescat, leg. redintegrascat. p. 11. lin. 29.
Pro interredit, leg. intercedit, p. 13. lin. 31.
Pro irrationale, leg. irrationate, p. 14. lin. 32.
Pro Transusione, leg. Transfusionem, p. 18. lin. 27.
Pro quod, cunq, leg. quodcunq, p. 93. lin. 3.

F I N I S.

BIBLIOTECA NAZ.
ROMA
VITTORIO EMANUELE.



